

明
史

冊
七



明史卷八十一

志第五十七

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

食貨五

錢鈔

坑冶 附鐵冶銅場

商稅

市舶

馬市

錢幣之興自九府圜法歷代遵用鈔始於唐之飛錢宋之交會金之交鈔元世始終用鈔錢幾廢矣太祖初置寶源局於應天鑄大中通寶錢與歷代錢兼行以四百文爲一貫四十文爲一兩四文爲一錢及平陳友諒命江西行省置貨泉局頒大中通寶錢大小五等錢式卽位頒洪武通寶錢其制凡五等曰當十當五當三當二當一當十錢重一兩餘遞降至重一錢止各行省皆設寶泉局與寶源局並鑄而嚴私鑄之禁洪武四年改鑄大中洪武通寶大錢爲小錢初寶源局錢鑄京字於背後多不鑄民間無京字者不行故改鑄小錢以便之尋

令私鑄錢作廢銅送官償以錢是時有司責民出銅民毀器皿輸官頗以爲苦而商賈沿元之舊習用鈔多不使用錢七年帝乃設寶鈔提舉司明年始詔中書省造大明寶鈔命民間通行以桑穰爲料其制方高一尺廣六寸質青色外爲橫文花欄橫題其額曰大明通行寶鈔其內上兩旁復爲篆文八字曰大明寶鈔天下通行中圖錢貫十串爲一貫其下云中書省奏準印造大明寶鈔與銅錢通行使用僞造者斬告捕者賞銀二十五兩仍給犯人財產若五百文則畫錢文爲五串餘如其制而遞減之其等凡六曰一貫曰五百文四百文三百文二百文一百文每鈔一貫準錢千文銀一兩四貫準黃金一兩禁民間不得以金銀物貨交易違者罪之以金銀易鈔者聽遂罷寶源寶泉局越二年復設寶泉局鑄小錢與鈔兼行百文以下止用錢商稅兼收錢鈔錢三鈔七十三年以鈔用久昏爛立倒鈔法令所在置行用庫許軍民商賈以昏鈔納庫易新鈔量收工墨直會中書省廢乃以造鈔屬戶部鑄錢屬工部而改寶鈔文中書省爲戶部與舊鈔兼行十五年置戶部寶鈔廣源庫廣惠庫入則廣源掌之出則

廣惠掌之在外衛所軍士月鹽皆給鈔各鹽場給工本鈔十八年天下有司官祿米皆給鈔二貫五百文準米一石二十二年詔更定錢式生銅一斤鑄小錢百六十折二錢半之當三至當十準是爲差更造小鈔自十文至五十文二十四年諭權稅官吏凡鈔有字貫可辨者不問爛損卽收受解京抑勒與僞充者罪之二十五年設寶鈔行用庫於東市凡三庫各給鈔三萬錠爲鈔本倒收舊鈔送內府令大明寶鈔與歷代錢兼行鈔一貫準錢千文提舉司於三月內印造十月內止所造鈔送內府充賞賚明年罷行用庫又罷寶泉局時兩浙江西閩廣民重錢輕鈔有以錢百六十文折鈔一貫者由是物價翔貴而錢法益壞不行三十年乃更申交易用金銀之禁成祖初犯者以姦惡論惟置造首飾器皿不在禁例永樂二年詔犯者免死徙家戍興州陝西都司僉事張豫坐抵易官鈔論戍江夏民父死以銀營葬具當戍邊帝以其迫於治葬非玩法特矜宥之都御史陳瑛言比歲鈔法不通皆緣朝廷出鈔太多收斂無法以致物重鈔輕莫若暫行戶口食鹽法天下人民不下千萬戶官軍不下二百萬家誠令計

口納鈔食鹽可收五千餘萬錠帝令戶部會羣臣議大口月食鹽一斤納鈔一貫小口半之從其議設北京寶鈔提舉司稅糧課程贓罰俱折收鈔其直視洪武初減十之九後又令鹽官納舊鈔支鹽發南京抽分場積薪龍江提舉司竹木鬻之軍民收其鈔應天歲辦蘆柴徵鈔十之八帝初卽位戶部尙書夏原吉請更鈔板篆文爲永樂帝命仍其舊自後終明世皆用洪武年號云仁宗監國令犯笞杖者輸鈔及卽位以鈔不行詢原吉原吉言鈔多則輕少則重民間鈔不行緣散多斂少宜爲法斂之請市肆門攤諸稅度量輕重加其課程鈔入官官取昏軟者悉燬之自今官鈔宜少出民間得鈔難則自然重矣乃下令曰所增門攤課程鈔法通卽復舊金銀布帛交易者亦暫禁止然是時民卒輕鈔至宣德初米一石用鈔五十貫乃弛布帛米麥交易之禁凡以金銀交易及匿貨增直者罰鈔府縣衛所倉糧積至十五年以上者鹽糧悉收鈔秋糧亦折鈔三分門攤課鈔增五倍塌房店舍月納鈔五百貫果園羸車並令納鈔戶部言民間交易惟用金銀鈔滯不行乃益嚴其禁交易用銀一錢者罰鈔千貫贓吏受

銀一兩者追鈔萬貫更追免罪鈔如之英宗即位收賦有米麥折銀之令遂減諸納鈔者而以米銀錢當鈔弛用銀之禁朝野率皆用銀其小者乃用錢惟折官俸用鈔鈔壅不行十三年復申禁令阻鈔者追一萬貫全家戍邊天順中始弛其禁憲宗令內外課程錢鈔兼收官俸軍餉亦兼支錢鈔是時鈔一貫不能直錢一文而計鈔徵之民則每貫徵銀二分五釐民以大困弘治元年京城稅課司順天山東河南戶口食鹽俱收鈔各鈔關俱錢鈔兼收其後乃皆改折用銀而洪武永樂宣德錢積不用詔發之令與歷代錢兼用戶部請鼓鑄乃復開局鑄錢凡納贖收稅歷代錢制錢各收其半無制錢卽收舊錢二以當一制錢者國朝錢也舊制工部所鑄錢入太倉司鑰二庫諸關稅錢亦入司鑰庫共貯錢數千百萬中官掌之京衛軍秋糧取給焉每七百當銀一兩武宗之初部臣請察覈侵蝕又以錢當俸糧者僅及銀數三之一請於承運庫給銀時中官方用事皆不聽已而司鑰庫太監龐堯言自弘治間權關折銀入承運庫錢鈔缺乏支放不給請遵成化舊制錢鈔兼收從之正德三年以太倉積錢給官俸十

分爲率錢一銀九又從太監張永言發天財庫及戶部布政司庫錢關給徵收每七十文徵銀一錢且申私鑄之禁嘉靖四年令宣課分司收稅鈔一貫折銀三釐錢七文折銀一分是時鈔久不行錢亦大壅益專用銀矣明初鑄洪武錢成祖九年鑄永樂錢宣德九年鑄宣德錢弘治十六年以後鑄弘治錢至世宗嘉靖六年大鑄嘉靖錢每文重一錢三分且補鑄累朝未鑄者三十二年鑄洪武至正德九號錢每號百萬錠嘉靖錢千萬錠一錠五千文而稅課抽分諸廠專收嘉靖錢民患錢少乃發內庫新舊錢八千一百萬文折給俸糧又令通行歷代錢有銷新舊錢及以銅造像製器者罪比盜鑄先是民間行濫惡錢率以三四十錢當銀一分後益雜鉛錫薄劣無形製至以六七十文當銀一分翦楮夾其中不可辨用給事中李用敬言以制錢與前代雜錢相兼行上品者俱七文當銀一分餘視錢高下爲三等下者二十一文當銀一分私造濫惡錢悉禁不行犯者置之法小錢行久驟革之民頗不便又出內庫錢給文武官俸不論新舊美惡悉以七文折算諸以俸錢市易者亦悉以七文抑勒予民民亦騷然

屬連歲大禋四方流民就食京師死者相枕藉論者謂錢法不通使然於是御史何廷鈺條奏請許民用小錢以六十文當銀一分戶部執不從廷鈺訐奏尙書方鈍及郎中劉爾牧帝怒斥爾牧採廷鈺議命從民便且定嘉靖錢七文洪武諸錢十文前代錢三十文當銀一分然諸濫惡小錢以初禁之嚴雖奉旨間行竟不復用而民間競私鑄嘉靖通寶錢與官錢並行焉給事中殷正茂言兩京銅價大高鑄錢得不償費宜採雲南銅運至岳州鼓鑄費工本銀三十九萬可得錢六萬五千萬文直銀九十三萬餘兩足以少佐國家之急戶部覆言雲南地僻事簡卽山鼓鑄爲便乃敕巡撫以鹽課銀二萬兩爲工本未幾巡撫王冕言費多入少乞罷鑄帝以小費不當惜仍命行之越數年巡按王諍復言宜罷鑄部議錢法壅滯者由宣課司收稅以七文當一分姦民乘機阻撓錢多則惡濫相欺錢少則增直罔利故禁愈繁而錢愈滯自今準折聽民便不必定文數而課稅及官俸且俱用銀乃罷雲南鑄錢而從戶部議時所鑄錢有金背有火漆有鍍邊議者以鑄錢艱難工匠勞費革鍍車用鑪錫於是鑄工競雜鉛錫

便剝治而輪郭麤糲色澤黯黹姦偽倣倣盜鑄日滋金背錢反阻不行死罪日報終不能止帝患之問大學士徐階階陳五害請停寶源局鑄錢應支給錢者悉予銀帝乃鞠治工匠侵料減工罪而停鼓鑄自後稅課徵銀而不徵錢且民間止用制錢不用古錢而私鑄者多隆慶初錢法不行兵部侍郎譚綸言欲富民必重布帛菽粟而賤銀欲賤銀必制錢法以濟銀之不足今錢惟布於天下而不以輸於上故其權在市井請令民得以錢輸官則錢法自通於是課稅銀三兩以下復收錢民間交易一錢以下止許用錢時錢八文折銀一分禁民毋得任意低昂直隸巡按楊家相請鑄大明通寶錢不識年號部議格不行高拱再相言錢法朝議夕更迄無成說小民恐今日得錢而明日不用是以愈更愈亂愈禁愈疑請一從民便勿多爲制以亂人耳目帝深然之錢法復稍稍通矣寶鈔不用垂百餘年課程亦鮮有收鈔者惟俸錢獨支鈔如故四年始以新鑄隆慶錢給京官俸云萬曆四年命戶工二部準嘉靖錢式鑄萬曆通寶金背及火漆錢一文重一錢二分五釐又鑄鏃邊錢一文重一錢三分頒行天下俸糧

皆銀錢兼給雲南巡按郭庭梧言國初京師有寶源局各省有寶泉局自嘉靖間省局停廢民用告匱滇中產銅不行鼓鑄而反以重價購海肥非利也遂開局鑄錢尋命十三布政司皆開局採工部言以五銖錢爲準用四火黃銅鑄金背二火黃銅鑄火漆麤惡者罪之蓋以費多利少則私鑄自息也久之戶部言錢之輕重不常輕則斂重則散故無壅闕匱乏之患初鑄時金背十文直銀一分今萬曆金背五文嘉靖金背四文各直銀一分火漆鏃邊亦如之僅踰十年而輕重不啻相半錢重而物價騰踴宜發庫貯以平其直從之時王府皆鑄造私錢吏不敢訐古錢阻滯不行國用不足乃命南北寶源局拓地增爐鼓鑄而北錢視南錢昂直三之一南鑄大抵輕薄然各循其舊並行不廢天啓元年鑄泰昌錢兵部尙書王象乾請鑄當十當百當千三等大錢用龍文略倣白金三品之制於是兩京皆鑄大錢後有言大錢之弊者詔南京停鑄大錢收大錢發局改鑄當是時開局遍天下重課錢息崇禎元年南京鑄本七萬九千餘兩獲息銀三萬九千有奇戶部鑄錢獲息銀二萬六千有奇其所鑄錢皆以五十五

文當銀一錢計息取盈工匠之賠補行使之折閱不堪命矣寶泉局銅本四十萬兩舊例錢成還本太倉次年再借至是令永作鑄本三年御史饒京言鑄錢開局本通行天下今乃苦於無息旋開旋罷自南北兩局外僅存湖廣陝西四川雲南及宣密二鎮而所鑄之息不盡歸朝廷復苦無鑄本蓋以買銅而非采銅也乞遵洪武初及永樂九年嘉靖六年例遣官各省鑄錢采銅於產銅之地置官吏駐兵倣銀礦法十取其三銅山之利朝廷擅之小民所采仍予直以市帝從之是時鑄廠並開用銅益多銅至益少南京戶部尚書鄭三俊請專官買銅戶部議元籍產銅之人駐鎮遠荆常銅鉛會集處所謂采銅於產銅之地也帝俱從之既久采絳孟垣曲聞喜諸州縣銅鉛荊州抽分主事朱大受言荊州上接黔蜀下聯江廣商販銅鉛畢集一年可以四鑄四鑄之息兩倍於南三倍於北因陳便宜四事卽命大受專督之遂定錢式每文重一錢每千直銀一兩南都錢輕薄屢旨嚴飭乃定每文重八分初嘉靖錢最工隆萬錢加重半銖自啓禎新鑄出舊錢悉棄置然日以惡薄大半雜鉛砂百不盈寸掉擲輒破碎末

年敕鑄當五錢不及鑄而明亡初制歷代錢與制錢通行自神宗初從僉都御史龐尙鵬議古錢止許行民間輸稅贖罪俱用制錢啓禎時廣鑄錢始括古錢以充廢銅民間市易亦擯不用矣莊烈帝初卽位御平臺召對給事中黃承昊疏有銷古錢之語大學士劉鴻訓言北方皆用古錢若驟廢之於民不便帝以爲然旣而以御史王燮言收銷舊錢但行新錢於是古錢銷毀頓盡蓋自隋世盡銷古錢至是凡再見云鈔法自弘正間廢天啓時給事中惠世揚復請造行崇禎末有蔣臣者申其說擢爲戶部司務倪元璐方掌部事力主之然終不可行而止

坑冶之課金銀銅鐵鉛汞硃砂青綠而金銀礦最爲民害徐達下山東近臣請開銀場太祖謂銀場之弊利於官者少損於民者多不可開其後有請開陝州銀礦者帝曰土地所產有時而窮歲課成額徵銀無已言利之臣皆戕民之賊也臨淄丞乞發山海之藏以通寶路帝黜之成祖斥河池民言採礦者仁宣仍世禁止填番禺坑洞罷嵩縣白泥溝發礦然福建尤溪縣銀屏山銀場局爐局

四十二座始於洪武末年浙江溫處麗水平陽等七縣亦有場局歲課皆二千餘兩永樂間開陝州商縣鳳皇山銀坑八所遣官湖廣貴州採辦金銀課復遣中官御史往覈之又開福建浦城縣馬鞍等坑三所設貴州太平溪交趾宣光鎮金場局葛溪銀場局雲南大理銀冶其不產金銀者亦屢有革罷而福建歲額增至三萬餘兩浙江增至八萬餘宣宗初頗減福建課其後增至四萬餘而浙江亦增至九萬餘英宗下詔封坑穴撤開辦官民大蘇息而歲額未除歲辦皆洪武舊額也開辦者永宣所新增也既而禁革永煎姦民私開坑穴相殺傷嚴禁不能止下詔宥之不悛言者復請開銀場則利歸於上而盜無所容乃命侍郎王質往經理定歲課福建銀二萬餘浙江倍之又分遣御史曹祥馮傑提督供億過公稅民困而盜愈衆鄧茂七葉宗留之徒流毒浙閩久之始定景帝嘗封閉旋以盜礦者多兵部尙書孫原貞請開浙江銀場因並開福建命中官戴細保提督之天順四年命中官羅永之浙江羅珪之雲南馮讓之福建何能之四川課額浙閩大略如舊雲南十萬兩有奇四川萬三千有奇總十八萬三

千有奇成化中開湖廣金場武陵等十二縣凡二十一場歲役民夫五十五萬死者無算得金僅五十三兩於是復閉而浙江銀礦以缺額量減雲南屢開屢停弘治元年始減雲南二萬兩溫處萬兩餘罷浦城廢坑銀冶至十三年雲南巡撫李士實言雲南九銀場四場礦脈久絕乞免其課報可四川山東礦穴亦先後封閉武宗初從中官秦文等奏復開浙閩銀礦既而浙江守臣言礦脈已絕乃令歲進銀二萬兩劉瑾誅乃止世宗初閉大理礦場其後薊豫齊晉川滇所在進礦砂金銀復議開採以助大工既獲玉旺峪礦銀帝諭閣臣廣開採戶部尙書方鈍等請令四川山東河南撫按嚴督所屬一一搜訪以稱天地降祥之意於是公私交驚礦利而浙江江西盜礦者且劫徽寧天下漸多事矣隆慶初罷薊鎮開採南中諸礦山亦勒石禁止萬曆十二年姦民屢以礦利中上心諸臣力陳其弊帝雖從之意怏怏二十四年張位秉政前衛千戶仲春請開礦位不能止開採之端啓廢弁白望獻礦峒者日至於是無地不開中使四出昌平則王忠真保薊永房山蔚州則王虎昌黎則田進河南之開封彰德衛輝懷

慶葉縣信陽則魯坤山東之濟南青州濟寧沂州滕費蓬萊福山棲霞招遠文
登則陳增山西之太原平陽潞安則張忠南直之寧國池州則郝隆劉朝用湖
廣之德安則陳奉浙江之杭嚴金衢孝豐諸暨則曹金後代以劉忠陝西之西
安則趙鑿趙欽四川則邱乘雲遼東則高淮廣東則李敬廣西則沈永壽江西
則潘相福建則高窠雲南則楊榮皆給以關防并偕原奏官往礦脈微細無所
得勒民償之而姦人假開採之名乘傳橫索民財陵轢州縣有司恤民者罪以
阻撓逮問罷黜時中官多暴橫而陳奉尤甚富家鉅族則誣以盜礦良田美宅
則指以為下有礦脈率役圍捕辱及婦女甚至斷人手足投之江其酷虐如此
帝縱不問自二十五年至三十三年諸璫所進礦稅銀幾及三百萬兩羣小藉
勢誅索不啻倍蓰民不聊生雲南巡撫魏允貞上言方今水旱告災天鳴地震
星流氣射四方日報中外軍興百姓困敝而嗜利小人借開採以肆饕餮倘豐
由中作則礦夫冗役為禍尤烈至是而後求投珠抵璧之說用之晚矣河南巡
按姚思仁亦言開採之弊大可慮者有八礦盜哨聚易於召亂一也礦頭累極

勢成土崩二也礦夫殘害逼迫流亡三也僱民糧缺饑餓嗷呼四也礦洞徧開無益浪費五也礦砂銀少強科民買六也民皆開礦農桑失業七也奏官強橫淫刑激變八也今礦頭以賠累死平民以逼買死礦夫以傾壓死以爭鬪死及今不止雖傾府庫之藏竭天下之力亦無濟於存亡矣疏入皆不省識者以爲明亡蓋兆於此

鐵冶所洪武六年置江西進賢新喻分宜湖廣興國黃梅山東萊蕪廣東陽山陝西鞏昌山西吉州二太原澤潞各一凡十三所歲輸鐵七百四十六萬餘斤河南四川亦有鐵冶十四年益以茶陵十五年廣平吏王允道言磁州產鐵元時置官歲收百餘萬斤請如舊帝以民生甫定復設必重擾杖而流之海外十八年罷各布政司鐵冶既而工部言山西交城產雲子鐵舊貢十萬斤繕治兵器他處無有乃復設已而武昌吉州以次復焉末年以工部言復盡開令民得自採鍊每三十分取其二永樂時設四川龍州遼東都司三萬衛鐵冶景帝時辦事吏請復陝西寧遠鐵礦工部劾其違法下獄給事中張文質以爲不宜塞

言路乃釋之弘治十七年廣東歸善縣請開鐵冶有司課外索賂唐大贇等因作亂都御史劉大夏討平之正德十四年廣州置鐵廠以鹽課提舉司領之禁私販如鹽法嘉靖三十四年開建寧延平諸府鐵冶隆萬以後率因舊制未嘗特開云

銅場明初惟江西德興鉛山其後四川梁山山西五臺陝西寧羌略陽及雲南皆採水銀青綠太祖時廉州巡檢言州界西戎有水銀坑冶及青綠紫泥願得兵取其地帝不許惟貴州大萬山長官司有水銀硃砂場局而四川東川府會川衛山產青銀銅綠以與外番接境虞軍民潛取生事特禁飭之成化十七年封閉雲南路南州銅坑弘治十八年裁革板坑水銀場局正德九年軍士周達請開雲南諸銀礦因及銅錫青綠詔可遂次第開採嘉靖隆萬間因鼓鑄屢開雲南諸處銅場久之所獲漸少崇禎時遂括古錢以供爐冶焉

關市之征宋元頗繁瑣明初務簡約其後增置漸多行齎居鬻所過所止各有稅其名物件析榜於官署按而征之惟農具書籍及他不鬻於市者勿算應征

而藏匿者沒其半買賣田宅頭匹必投契本別納紙價凡納稅地置店曆書所
止商氏各物數官司有都稅有宣課有司有局有分司有抽分場局有河泊所
所收稅課有本色有折色稅課司局京城諸門及各府州縣市集多有之凡四
百餘所其後以次裁併十之七抽分在南京者曰龍江大勝港在北京者曰通
州白河盧溝通積廣積在外者曰真定杭州荊州太平蘭州廣寧又令軍衛自
設場分收貯柴薪河泊所惟大河以南有之河北止鹽山縣凡稅課徵商估物
貨抽分科竹木柴薪河泊取魚課又有門攤課鈔領於有司太祖初征酒醋之
稅收官店錢卽吳王位減收官店錢改在京官店爲宣課司府縣官店爲通課
司凡商稅三十而取一過者以違令論洪武初命在京兵馬指揮領市司每三
日一校勘街市度量權衡稽牙儉物價在外城門兵馬亦令兼領市司彰德稅
課司稅及蔬果飲食畜牧諸物帝聞而黜之山西平遠主簿成樂秩滿來朝上
其考曰能恢辦商稅帝曰稅有定額若以恢辦爲能是剝削下民失吏職也州
考非是命吏部移文以訊十年戶部奏天下稅課司局征商不如額者百七八

十處遂遣中官國子生及部委官各一人覈實立爲定額十三年吏部言稅課司局歲收額米不及五百石者凡三百六十四處宜罷之報可胡惟庸伏誅帝諭戶部曰曩者姦臣聚斂稅及織悉朕甚恥焉自今軍民嫁娶喪祭之物舟車絲布之類皆勿稅罷天下抽分竹木場明年令以野獸皮輸魚課製裘以給邊卒初京師軍民居室皆官所給比舍無隙地商貨至或止於舟或貯城外駟僮上下其價商人病之帝乃命於三山諸門外瀕水爲屋名塌房以貯商貨永樂初定制嫁娶喪祭時節禮物自織布帛農器食品及買旣稅之物車船運己貨物魚蔬雜果非市販者俱免稅準南京例置京城官店塌房七年遣御史監生於收課處權辦課程二十一年山東巡按陳濟言淮安濟寧東昌臨清德州直沽商販所聚今都北平百貨倍往時其商稅宜遣人監權一年以爲定額帝從之洪熙元年增市肆門攤課鈔宣德四年以鈔法不通由商居貨不稅由是於京省商賈湊集地市鎮店肆門攤稅課增舊凡五倍兩京蔬果園不論官私種而鬻者塌房庫房店舍居商貨者驟驢車受僱裝載者悉令納鈔委御史戶部

錦衣衛兵馬司官各一於城門察收舟船受僱裝載者計所載料多寡路近遠納鈔鈔關之設自此始其倚勢隱匿不報者物盡沒官仍罪之於是有溇縣濟寧徐州淮安揚州上新河潞野九江金沙洲臨清北新諸鈔關量舟大小修廣而差其額謂之船料不稅其貨惟臨清北新則兼收貨稅各差御史及戶部主事監收自南京至通州經淮安濟寧徐州臨清每船百料納鈔百貫侍郎曹弘言塌房月鈔五百貫良苦有鬻子女輸課者帝令覈除之及鈔法通減北京蔬地課鈔之半船料百貫者減至六十貫正統初詔凡課程門攤俱遵洪武舊額不得藉口鈔法妄增未幾以兵部侍郎于謙奏革直省稅課司局領其稅於有司罷濟寧徐州及南京上新河船料鈔移溇縣鈔關於河西務船料當輸六十貫者減爲二十貫商民稱便九年王佐掌戶部置彰義門官房收商稅課鈔復設直省稅課司官征榷漸繁矣景泰元年于謙柄國船料減至十五貫減張家灣及遼陽課稅之半大理卿薛瑄言抽分薪炭等匿不報者準舶商匿番貨罪盡沒之過重請得比匿稅律帝從之成化七年增置蕪湖荊州杭州三處工部

官初抽分竹木止取鈔其後易以銀至是漸益至數萬兩尋遣御史權稅孝宗初御史陳瑤言崇文門監稅官以培克爲能非國體乃命客貨外車輛毋得搜阻又從給事中王敞言取回蕪湖荊州杭州抽分御史以府州佐貳官監收其稅十三年復遣御史正德十一年始收泰山碧霞元君祠香錢從鎮守太監言也十二年御史胡文靜請革新設諸抽分廠未一年太監鄭璽請復設於順德廣平工部尙書李鐸依阿持兩端橫征之端復起尋命中官李文馬俊之湖廣浙江抽分廠與主事分權稅世宗初抽分中官及江西福建廣東稅課司局多所裁革又革真定諸府抽印木植中官京城九門之稅弘治初歲入鈔六十六萬餘貫錢二百八十八萬餘文至末年數大減自正德七年以後鈔增四倍錢增三十萬嘉靖三年詔如弘治初年例仍減錢三十萬直省關稅成化以來折收銀其後復收錢鈔八年復收銀遂爲定制始時鈔關估船料定稅旣而以估料難核乃度梁頭廣狹爲準自五尺至三丈六尺有差帝令以成尺爲限勿科畸零太監李能請於山海關權商稅行之數年主事鄔閱言廣寧八里鋪前

屯衛既有權場不宜再權罷之其後復山海關稅罷八里鋪店錢四十二年令各關歲額定數之外餘饒悉入公帑隆慶二年始給鈔關主事關防敕書尋令鈔關去府近者知府收解去府遠者令佐貳官收貯府庫季解部主事掌覈商所報物數以定稅數收解無有所與神宗初令商貨進京者河西務給紅單赴崇文門併納正條船三稅其不進京者河西務止收正稅免條船二稅萬曆十一年革天下私設無名稅課然自隆慶以來凡橋梁道路關津私擅抽稅罔利病民雖累詔察革不能去也迨兩宮三殿災營建費不貲始開礦增稅而天津店租廣州珠權兩淮餘鹽京口供用浙江市舶成都鹽茶重慶名木湖口長江船稅荊州店稅寶坻魚葦及門攤商稅油布雜稅中官遍天下非領稅卽領礦驅脅官吏務朘削焉權稅之使自二十六年千戶趙承勛奏請始高竈於京口暨祿於儀真劉成於浙李鳳於廣州陳奉於荊州馬堂於臨清陳增於東昌孫隆於蘇杭魯坤於河南孫朝於山西邱乘雲於四川梁永於陝西李道於湖口王忠於密雲張曙於盧溝橋沈永壽於廣西或徵市舶或徵店稅或專領稅務

或兼領開採姦民納賄於中官輒給指揮千戶劄用爲爪牙水陸行數十里卽樹旗建廠視商賈懦者肆爲攘奪沒其全貲負戴行李亦被搜索又立土商名目窮鄉僻塢米鹽雞豕皆令輸稅所至數激民變帝率庇不問諸所進稅或稱遺稅或稱節省銀或稱罰贖或稱額外贏餘又假買辦孝順之名金珠寶玩貂皮名馬雜然進奉帝以爲能甚至稅監劉成因災荒請暫寬商稅中旨仍徵課四萬其嗜利如此三十三年始詔罷採礦以稅務歸有司而稅使不撤李道詭稱有司固却乞如舊便帝遽從之又聽福府承奉謝文銓言設官店於崇文門外以供福邸戶部尙書趙世卿屢疏不聽世卿又言崇文門河西務臨清九江潞墅揚州北新淮安各鈔關歲徵本折約三十二萬五千餘兩萬曆二十五年增銀八萬二千兩此定額也乃二十七年以後歷歲減縮至二十九年總解二十六萬六千餘兩究厥所由則以稅使苛斂商至者少連年稅使所供卽此各關不足之數也疏入不省寶坻銀魚廠永樂時設穆宗時止令估直備廟祀上供及是始以中官坐採又徵其稅後并稅武清等縣非產魚之處增葦網諸稅

且及青縣天津九門稅尤苛舉子皆不免甚至擊殺覲吏事聞詔法司治之監
豎爲小戢至四十二年李太后遺詔減天下稅額三之一免近今畸零小稅光
宗立始盡蠲天下額外稅撤回稅監其派入地畝行戶人丁間架者概免之天
啓五年戶部尙書李起元請復權水陸衝要依萬曆二十七八年例量徵什一
允行之崇禎初關稅每兩增一錢通入關增五萬兩三年復增二錢惟臨清僅
半而崇文門河西務俱如舊戶部尙書畢自嚴議增南京宣課司稅額一萬爲
三萬南京戶部尙書鄭三俊以宣課所收落地稅無幾請稅蕪湖以當增數自
嚴遂議稅蕪湖三萬兩而宣課仍增一萬三俊悔疏爭不能已九年復議增稅
課款項十三年增關稅二十萬兩而商民益困矣凡諸課程始收鈔間折收米
已而收錢鈔半後乃折收銀而折色本色遞年輪收本色歸內庫折色歸太倉
明初東有馬市西有茶市皆以馭邊省戍守費海外諸國入貢許附載方物與
中國貿易因設市舶司置提舉官以領之所以通夷情抑姦商俾法禁有所施
因以消其覺隙也洪武初設於太倉黃渡尋罷復設於寧波泉州廣州寧波通

日本泉州通琉球廣州通占城暹羅西洋諸國琉球占城諸國皆恭順任其時至入貢惟日本叛服不常故獨限其期爲十年人數爲二百舟爲二艘以金葉勘合表文爲驗以防詐僞侵軼後市舶司暫罷輒復嚴禁瀕海居民及守備將卒私通海外諸國永樂初西洋刺泥國回回哈只馬哈沒奇等來朝附載胡椒與民互市有司請徵其稅帝曰商稅者國家抑逐末之民豈以爲利今夷人慕義遠來乃侵其利所得幾何而虧辱大體多矣不聽三年以諸番貢使益多乃置驛於福建浙江廣東三市舶司以館之福建曰來遠浙江曰安遠廣東曰懷遠尋設交趾雲南市舶提舉司接西南諸國朝貢者初入貢海舟至有司封識俟奏報然後起運宣宗命至卽馳奏不待報隨送至京武宗時提舉市舶太監畢真言舊制泛海諸船皆市舶司專理近領於鎮巡及三司官乞如舊便禮部議市舶職司進貢方物其汎海客商及風泊番船非敕旨所載例不當預中旨令如熊宣舊例行宣先任市舶太監也嘗以不預滿刺加諸國番船抽分奏請兼理爲禮部所劾而罷劉瑾私真謬以爲例云嘉靖二年日本使宗設宋素卿

分道入貢互爭真僞市舶中官賴恩納素卿賄右素卿宗設遂大掠寧波給事中夏言言倭患起於市舶遂罷之市舶既罷日本海賈往來自如海上姦豪與之交通法禁無所施轉爲寇賊二十六年倭寇百艘久泊寧台數千人登岸焚劫浙江巡撫朱紘訪知舶主皆貴官大姓市番貨皆以虛直轉鬻牟利而直不時給以是構亂乃嚴海禁毀餘皇奏請鑄諭戒大姓不報二十八年紘又言長澳諸大俠林恭等勾引夷舟作亂而巨姦關通射利因爲嚮導躡我海濱宜正典刑部覆不允而通番大猾紘輒以便宜誅之御史陳九德劾紘措置乖方專殺啓釁帝逮紘聽勘紘既黜姦徒益無所憚外交內訌釀成禍患汪直徐海陳東麻葉等起而海上無寧日矣三十五年倭寇大掠福建浙直都御史胡宗憲遣其客蔣洲陳可願使倭宣諭還報倭志欲通貢市兵部議不可乃止三十九年鳳陽巡撫唐順之議復三市舶司部議從之四十四年浙江以巡撫劉畿言仍罷福建開而復禁萬曆中復通福建互市惟禁市硝黃已而兩市舶司悉復以中官領職如故

永樂間設馬市三一在開原南關以待海西一在開原城東五里一在廣寧皆以待朵顏三衛定直四等上直絹八疋布十二次半之下二等各以一遞減既而城東廣寧市皆廢惟開原南關馬市獨存大同馬市始正統三年巡撫盧睿請令軍民平價市駝馬達官指揮李原等通譯語禁市兵器銅鐵帝從之十四年都御史沈固請支山西行都司庫銀市馬時也先貢馬互市中官王振裁其馬價也先大舉入寇遂致土木之變成化十四年陳鉞撫遼東復開三衛馬市通事劉海姚安肆侵牟朵顏諸部懷怨擾廣寧不復來市兵部尙書王越請令參將布政司官各一員監之毋有所侵剋遂治海安二人罪尋令海西及朵顏三衛入市開原月一市廣寧月二市以互市之稅充撫賞正德時令驗放入市者依期出境不得挾弓矢非互市日毋輒近塞垣嘉靖三十年以總兵仇鸞言詔於宣府大同開馬市命侍郎史道總理之兵部員外郎楊繼盛諫不從俺答旋入寇抄大同市則寇宣府宣府市則寇大同幣未出境警報隨至帝始悔之召道還然諸部嗜馬市利未敢公言大舉而邊臣亦多畏懼以互市啗之明年

罷大同馬市宣府猶未絕抄掠不已乃并絕之隆慶四年俺答孫把漢那吉來降於是封貢互市之議起而宣大互市復開邊境稍靜然撫賞甚厚朝廷爲省客兵餉減哨銀以充之頻年加賞而要求滋甚司事者復從中乾沒邊費反過當矣遼東義州木市萬曆二十三年開事具李化龍傳二十六年從巡撫張思忠奏罷之遂并罷馬市其後總兵李成梁力請復而薊遼總督萬世德亦疏於朝三十九年復開馬木二市後以爲常

明史卷八十一

明史卷八十二

志第五十八

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

食貨六

上供採造

採造

柴炭

採木

珠池

織造

燒造

俸餉

會計

採造之事累朝侈儉不同大約靡於英宗繼以憲武至世宗神宗而極其事目繁瑣徵索紛紜最鉅且難者曰採木歲造最大者曰織造曰燒造酒醴膳羞則掌之光祿寺採辦成就則工部四司內監司局或專差職之柴炭則掌之惜薪司而最爲民害者率由中官明初上供簡省郡縣貢香米人參葡萄酒太祖以爲勞民却之仁宗初光祿卿井泉奏歲例遣正官往南京採玉面狸帝叱之曰小人不達政體朕方下詔盡罷不急之務以息民豈以口腹細故失大信耶宣

宗時罷永樂中河州官買乳牛造上供酥油者以其牛給屯軍命御史二人察視光祿寺凡內外官多支及需索者執奏英宗初政三楊當軸減南畿孳牧黃牛四萬糖蜜果品脍脯酥油茶芽稷糯粟米藥材皆減省有差撤諸處捕魚官卽位數月多所撙節凡上用膳食器皿三十萬七千有奇南工部造金龍鳳白瓷諸器饒州造硃紅膳盒諸器營膳所造以進宮中食物尙膳監率乾沒之帝令備帖具書如數還給景帝時從于謙言罷真定河間採野味直沽海口造乾魚內使天順八年光祿果品物料凡百二十六萬八千餘斤增舊額四之一成化初詔光祿寺牲口不得過十萬明年寺臣李春請增禮部尙書姚夔言正統間雞鵝羊豕歲費三四萬天順以來增四倍暴殄過多請從前詔後二年給事中陳越言光祿市物概以勢取負販遇之如被劫掠夫光祿所供昔皆足用今不然者宣索過額侵漁妄費也大學士彭時亦言光祿寺委用小入買辦假公營私民利盡爲所奪請照宣德正統間例斟酌供用禁止買辦於是減魚果歲額十之一弘治元年命光祿減增加供應初光祿俱預支官錢市物行頭吏役

因而侵蝕乃令各行先報納而後償價遂有游手號爲報頭假以供應爲名抑價倍取以充私橐御史李鸞以爲言帝命禁止十五年光祿卿王珩列上內外官役酒飯及所畜禽獸料食之數凡百二十事乃降旨有仍舊者有減半者有停止者於是放去乾明門虎南海子貓西華門鷹犬御馬監山猴西安門大鴿等減省有差存者減其食料自成化時添坐家長隨八十餘員傳添湯飯中官百五十餘員天下常貢不足於用乃責買於京師鋪戶價直不時給市井負累兵部尙書劉大夏因天變言之乃裁減中官歲省銀八十餘萬武宗之世各宮日進月進數倍天順時廚役之額當仁宗時僅六千三百餘名及憲宗增四之一世宗初減至四千一百名歲額銀撙節至十三萬兩中年復增至四十萬額派不足借支太倉太倉又不足乃令元供司府依數增派於是帝疑其乾沒下禮部問狀責光祿寺具數以奏帝復降旨詰責乃命御史稽覈月進揭帖兩月間省銀二萬餘兩自是歲以爲常先是上供之物任土作貢曰歲辦不給則官出錢以市曰採辦其後本折兼收採辦愈繁於是召商置買物價多虧商賈匿

迹二十七年戶部言京師召商納貨取直富商規避應役者皆貧弱下戶請覈實編審給事中羅崇奎言諸商所以重困者物價賤則減而貴則不敢增且收納不時一遭風雨遂不可用多致賠累既收之後所司更代不常不卽給直或竟沈閣幸給直矣官司折閱於上番役齟齬於下名雖平估所得不能半諸弊若除商自樂赴奚用編審帝雖納其言而仍編審如戶部議穆宗朝光祿少卿李健奏十事帝乃可之頗有所減省停止承天香米外域珍禽奇獸罷寶坻魚鮮凡薦新之物領於光祿寺勿遣中官又從太監李芳請停徵加增細粳米白青鹽命一依成弘閒例御史王宗載請停加派部議悉準元額果品百七萬八千餘斤牲口銀五萬八千餘兩免加派銀二萬餘未行而神宗立詔免之世宗末年歲用止十七萬兩穆宗裁二萬止十五萬餘經費省約矣萬曆初年益減至十三四萬中年漸增幾三十萬而鋪戶之累滋甚時中官進納索賂名鋪墊錢費不訾所支不足相抵民不堪命相率避匿乃僉京師富戶爲商令下被僉者如赴死重賄營免官司密鉤若緝姦盜宛平知縣劉曰淑言京民一遇僉商

取之不遺毫髮貲本悉罄請厚估先發以甦民困御史王孟震斥其越職曰淑
自劾解官去至熹宗時商累益重有輸物於官終不得一錢者

洪武時宮禁中市物視時估率加十錢其損上益下如此永樂初斥言採五色
石者且以温州輸礬困民罷染色布然內使之出始於是時工役繁興徵取稍
急非土所有民破產購之軍器之需尤無算仁宗時山場園林湖池坑冶果樹
蠶蜜官設守禁者悉予民宣宗罷開辦金銀其他紙錠紵絲紗羅縠緞香貨銀
硃金箔紅花茜草麂皮香蠟藥物果品海味硃紅餞金龍鳳器物多所罷減副
都御史弋謙言有司給買辦物料價十不償一無異空取帝嘉納之諭工部察
懲又因泰安州稅課局大使郝智言悉召還所遣官敕自今更不許輒遣自軍
器軍需外凡買辦者盡停止然寬免之詔屢下內使屢敕撤還而奉行不實宦
者輒名採辦虐取於民誅袁琦阮巨隊等十餘人患乃稍息英宗立罷諸處採
買及造下西洋船木諸冗費多敕省正統八年以買辦擾民始令於存留錢糧
內折納就近解兩京先是仁宗時令中官鎮守邊塞英宗復設各省鎮守又有

守備分守中官布列天下及憲宗時益甚購書採藥之使搜取珍玩靡有子遺抑賣鹽引私採禽鳥糜官帑納私賂動以巨萬計太嶽太和山降真諸香通三歲用七千斤至是倍之內府物料有至五六倍者孝宗立頗有減省甘肅巡撫羅明言鎮守分守內外官競尙貢獻各遣使屬邊衛搜方物名曰採辦實扣軍士月糧馬價或巧取番人犬馬奇珍且設膳乳諸房僉廚役造酥油諸物比及起運沿途騷擾乞悉罷之報可然其後靡費漸多至武宗任劉瑾漁利無厭鎮守中官率貢銀萬計皇店諸名不一歲辦多非土產諸布政使來朝各陳進貢之害皆不省世宗初內府供應減正德什九中年以後營建齋醮採木採香採珠玉寶石吏民奔命不暇用黃白蠟至三十餘萬斤又有召買有折色視正數三倍沈香降香海漆諸香至十餘萬斤又分道購龍涎香十餘年未獲使者因請海舶入澳久乃得之方澤朝日壇爵用紅黃玉求不得購之陝西邊境遣使覓於阿丹去土魯番西南二千里太倉之銀頗取入承運庫辦金寶珍珠於是貓兒睛祖母碌石綠撒字尼石紅刺石北河洗石金剛鑽朱藍石紫英石甘黃

玉無所不購穆宗承之購珠寶益急給事中李己陳吾德疏諫己下獄吾德削籍自是供億寢多矣神宗初內承運庫太監崔敏請買金珠張居正封還敏疏事遂寢久之帝曰黷貨開採之議大興費以鉅萬計珠寶價增舊二十倍戶部尙書陳藻言庫藏已竭宜加撙節中旨切責而順天府尹以大珠鴉青購買不如旨鑄級至於末年內使雜出採造益繁內府告匱至移濟邊銀以供之熹宗一聽中官採造尤夥莊烈帝立始務釐剔節省而庫藏已耗竭矣

永樂中後軍都督府供柴炭役宣府十七衛所軍士採之邊關宣宗初以邊木以扼敵騎且邊軍不宜他役詔免其採伐令歲納銀二萬餘兩後府召商買納五年置易州山廠命工部侍郎督之僉北直山東山西民夫轉運而後府輸銀召商如故初歲用薪止二千萬餘斤弘治中增至四千萬餘斤轉運既艱北直山東山西乃悉輸銀以召商正德中用薪益多增直三萬餘兩凡收受柴炭加耗十之三中官輒私加數倍逋負日積至以三年正供補一年之耗尙書李鏊議令正耗相準而主收者復私加乃以四萬斤爲萬斤又有輸納浮費民弗能

堪世宗登極乃酌減之隆慶五年後府採納艱苦改屬兵部車駕司萬曆中歲計柴價銀三十萬兩中官得自徵比諸商酷刑悉索而人以惜薪司爲陷阱云採木之役自成祖繕治北京宮殿始永樂四年遣尙書宋禮如四川侍郎古析如江西師達金純如湖廣副都御史劉觀如浙江僉都御史史仲誠如山西禮言有數大木一夕自浮大谷達於江天子以爲神名其山曰神木山遣官祠祭十年復命禮採木四川仁宗立已其役宣德元年修南京天地山川壇殿宇復命侍郎黃宗載吳廷用採木湖廣未幾因旱災已之尋復採大木湖廣而諭工部酌省未幾復罷其他處亦時採時罷弘治時發內帑修清寧宮停四川採木正德時採木湖廣川貴命侍郎劉丙督運太監劉養劾其不中梁棟責丙陳狀工部尙書李鏊奪俸嘉靖元年革神木千戶所及衛卒二十年宗廟災遣工部侍郎潘鑑副都御史戴金於湖廣四川採辦大木二十六年復遣工部侍郎劉伯躍採於川湖貴州湖廣一省費至三百三十九萬餘兩又遣官覈諸處遺留大木郡縣有司以遲誤大工逮治褫黜非一並河州縣尤苦之萬曆中三殿工

興採楠杉諸木於湖廣四川貴州費銀九百三十餘萬兩徵諸民閒較嘉靖年費更倍而採鷹平條橋諸木於南直浙江者商人逋直至二十五萬科臣劾督運官遲延侵冒不報虛糜乾沒公私交困焉

廣東珠池率數十年一採宣宗時有請令中官採東莞珠池者繫之獄英宗始使中官監守天順閒嘗一採之至弘治十二年歲久珠老得最多費銀萬餘獲珠二萬八千兩遂罷監守中官正德九年又採嘉靖五年又採珠小而嫩亦甚少八年復詔採兩廣巡撫林富言五年採珠之役死者五十餘人而得珠僅八十兩天下謂以人易珠恐今日雖以人易珠亦不可得給事中王希文言雷廉珠池祖宗設官監守不過防民爭奪正德間逆賢用事傳奉採取流毒海濱陛下御極革珠池少監未久旋復驅無辜之民蹈不測之險以求不可必得之物而責以難足之數非聖政所宜有皆不聽隆慶六年詔雲南進寶石二萬塊廣東採珠八千兩神宗立停罷既而以太后進奉諸王皇子公主冊立分封婚禮令歲辦金珠寶石復遣中官李敬李鳳廣東採珠五千一百餘兩給事中包見

捷力諫不納至三十二年始停採四十一年以指揮倪英言復開

明制兩京織染內外皆置局內局以應上供外局以備公用南京有神帛堂供應機房蘇杭等府亦各有織染局歲造有定數洪武時置四川山西諸行省浙江紹興織染局又置藍錠所於儀真六合種青藍以供染事未幾悉罷又罷天下有司歲織緞疋有賞賚給以絹帛於後湖置局織造永樂中復設歙縣織染局令陝西織造駝羯正統時置泉州織造局天順四年遣中官往蘇松杭嘉湖五府於常額外增造綵緞七千疋工部侍郎翁世資請減之下錦衣獄謫衡州知府增造坐派於此始孝宗初立停免蘇杭嘉湖應天織造其後復設乃給中官鹽引鬻於淮以供費正德元年尙衣監言內庫所貯諸色紵絲紗羅織金閃色蟒龍斗牛飛魚麒麟獅子通袖膝襪並胸背斗牛飛仙天鹿俱天順間所織欽賞已盡乞令應天蘇杭諸府依式織造帝可之乃造萬七千餘匹蓋成弘時頒賜甚謹自劉瑾用事倖璫陳乞漸廣有未束髮而僭冒章服者濫賞日增中官乞鹽引關鈔無已監督織造威劫官吏至世宗時其禍未訖卽位未幾卽令

中官監織於南京蘇杭陝西穆宗登極詔撤中官已而復遣萬曆七年蘇松水災給事中顧九思等請取回織造內臣帝不聽大學士張居正力陳年饑民疲不堪催督乃許之未幾復遣中官居正卒添織漸多蘇杭松嘉湖五府歲造之外又令浙江福建常鎮徽寧揚廣德諸府州分造增萬餘匹陝西織造羊絨七萬四千有奇南直浙江紵絲紗羅綾紬絹帛山西潞紬皆視舊制加丈尺二三年間費至百萬取給戶工二部搜括庫藏扣留軍國之需部臣科臣屢爭皆不聽末年復令稅監兼司姦弊日滋矣明初設南北織染局南京供應機房各省直歲造供用蘇杭織造間行間止自萬曆中頻數派造歲至十五萬疋相沿日久遂以爲常陝西織造絨袍弘正間偶行嘉隆時復遣亦遂沿爲常例燒造之事在外臨清甄廠京師琉璃黑窯廠皆造甄瓦以供營繕宣宗始遣中官張善之饒州造奉先殿几筵龍鳳文白瓷祭器磁州造趙府祭器踰年善以罪誅罷其役正統元年浮梁民進瓷器五萬餘償以鈔禁私造黃紫紅綠青藍白地青花諸瓷器違者罪死宮殿告成命造九龍九鳳膳案諸器既又造青龍

白地花缸王振以爲有壘遣錦衣指揮杖提督官敕中官往督更造成化間遣中官之浮梁景德鎮燒造御用瓷器最多且久費不貲孝宗初撤回中官尋復遣弘治十五年復撤正德末復遣自弘治以來燒造未完者三十餘萬器嘉靖初遣中官督之給事中陳臯謨言其大爲民害請罷之帝不聽十六年新作七陵祭器三十七年遣官之江西造內殿醮壇瓷器三萬後添設饒州通判專管御器廠燒造是時營建最繁近京及蘇州皆有甄廠隆慶時詔江西燒造瓷器十餘萬萬曆十九年命造十五萬九千既而復增八萬至三十八年未畢工自後役亦漸寢

國家經費莫大於祿餉洪武九年定諸王公主歲供之數親王米五萬石鈔二萬五千貫錦四十疋紵絲三百匹紗羅各百匹絹五百匹冬夏布各千匹綿二千兩鹽二百引茶千斤皆歲支馬料草月支五十匹其緞匹歲給匠料付王府自造靖江王米萬石鈔萬貫餘物半親王馬料草二十匹公主未受封者紵絲紗羅各十疋絹冬夏布各三十匹綿二百兩已受封賜莊田一所歲收糧千五

百石鈔二千貫親王子未受封視公主女未受封者半之子已受封郡王米六千石鈔二千八百貫錦十匹紵絲五十匹紗羅減紵絲之半絹冬夏布各百匹綿五百兩鹽五十引茶三百斤馬料草十匹女已受封及已嫁米千石鈔千四百貫其緞匹於所在親王國造給皇太子之次嫡子并庶子既封郡王必俟出閣然後歲賜與親王子已封郡王者同女俟及嫁與親王女已嫁者同凡親王世子與已封郡王同郡王嫡長子襲封郡王者半始封郡王女已封縣主及已嫁者米五百石鈔五百貫餘物半親王女已受封者郡王諸子年十五各賜田六十頃除租稅爲永業其所生子世守之後乃令止給祿米二十八年詔以官吏軍士俸給彌廣量減諸王歲給以資軍國之用乃更定親王萬石郡王二千石鎮國將軍千石輔國將軍奉國將軍鎮國中尉以二百石遞減輔國中尉奉國中尉以百石遞減公主及駙馬二千石郡王及儀賓八百石縣主郡君及儀賓以二百石遞減縣君鄉君及儀賓以百石遞減自後爲永制仁宗卽位增減諸王歲祿非常典也時鄭越襄荊淮滕梁七王未之藩令暫給米歲三千石遂

爲例正統十二年定王府祿米將軍自賜名受封日爲始縣主儀賓自出閣成婚日爲始於附近州縣秋糧內撥給景泰七年定郡王將軍以下祿米出閣在前受封在後以受封日爲始受封在前出閣在後以出閣日爲始宗室有罪革爵者曰庶人英宗初頗給以糧嘉靖中月支米六石萬曆中減至二石或一石初太祖大封宗藩令世世皆食歲祿不授職任事親親之誼甚厚然天潢日繁而民賦有限其始祿米盡支本色旣而本鈔兼支有中半者有本多於折者其則不同厥後勢不能給而冒濫轉益多姦弊百出不可究詰自弘治間禮部尙書倪岳卽條請節減以寬民力嘉靖四十一年御史林潤言天下之事極弊而大可慮者莫甚於宗藩祿廩天下歲供京師糧四百萬石而諸府祿米凡八百五十三萬石以山西言存留百五十二萬石而宗祿二百十二萬以河南言存留八十四萬三千石而宗祿百九十二萬是二省之糧借令全輸不足供祿米之半況吏祿軍餉皆出其中乎故自郡王以上猶得厚享將軍以上多不能自存飢寒困辱勢所必至常號呼道路聚詬有司守土之臣每懼生變夫賦不可

增而宗室日益蕃衍可不爲寒心宜令大臣科道集議於朝且諭諸王以勢窮弊極不得不通變之意令戶部會計賦額以十年爲率通計兵荒蠲免存留及王府增封之數共陳善後良策斷自宸衷以垂萬世不易之規下部覆議從之至四十四年乃定宗藩條例郡王將軍七折鈔中尉六折鈔郡縣主郡縣鄉君及儀賓八折鈔他冒濫者多所裁減於是諸王亦奏辭歲祿少者五百石多者至二千石歲出爲稍紓而將軍以下益不能自存矣明初勳戚皆賜官田以代常祿其後令還田給祿米公五千石至二千五百石侯千五百石至千石伯千石至七百石百官之俸自洪武初定丞相御史大夫以下歲祿數刻石官署取給於江南官田十三年重定內外文武官歲給祿米俸鈔之制而雜流吏典附焉正從一二三四品官自千石至三百石每階遞減百石皆給俸鈔三百貫正五品二百二十石從減五十石鈔皆百五十貫正六品百二十石從減十石鈔皆九十貫正從七品視從六品遞減十石鈔皆六十貫正八品七十五石從減五石鈔皆四十五貫正從九品視從八品遞減五石鈔皆三十貫勳之

石吏員月俸一二品官司提控都吏二石五斗掾史令史二石二斗知印承差
吏典一石二斗三四品官司令史書吏司吏二石承差吏典半之五品官司司
吏一石二斗吏典八斗六品以下司吏一石光祿寺等吏典六斗教官之祿州
學正月米二石五斗縣教諭府州縣訓導月米二石首領官之祿凡內外官司
提控案牘州吏目縣典史皆月米三石雜職之祿凡倉庫關場司局鐵冶遞運
批驗所大使月三石副使月二石五斗河泊所官月米二石閘壩官月米一石
五斗天下學校師生廩膳米人日一升魚肉鹽醢之屬官給之宦官俸月米一
石二十五年更定百官祿正一品月俸米八十七石從一品至正三品遞減十
三石至三十五石從三品二十六石正四品二十四石從四品二十一石正五
品十六石從五品十四石正六品十石從六品八石正七品至從九品遞減五
斗至五石而止自後爲永制洪武時官俸全給米間以錢鈔兼給錢一千鈔一
貫抵米一石成祖卽位令公侯伯皆全支米文武官俸則米鈔兼支官高者支
米十之四五官卑者支米十之七八惟九品雜職吏典知印總小旗軍並全支

米其折鈔者每米一石給鈔十貫永樂二年乃命公侯伯視文武官吏米鈔兼支仁宗立官俸折鈔每石至二十五貫宣德八年禮部尙書胡濙掌戶部議每石減十貫而以十分爲準七分折絹絹一匹抵鈔二百貫少師蹇義等以爲仁宗在春宮久深憫官員折俸之薄故卽位特增數倍此仁政也詎可違濙不聽竟請於帝而行之而卑官日用不贍矣正統中五品以上米二鈔八六品以下米三鈔七時鈔價日賤每石十五貫者已漸增至二十五貫而戶部尙書王佐復奏減爲十五貫成化二年從戶部尙書馬昂請又省五貫舊例兩京文武官折色俸上半年給鈔下半年給蘇木胡椒七年從戶部尙書楊鼎請以甲字庫所積之布估給布一匹當鈔二百貫是時鈔法不行一貫僅直錢二三文米一石折鈔十貫僅直二三十錢而布直僅二三百錢布一匹折米二十石則米一石僅直十四五錢自古官俸之薄未有若此者十六年又令以三梭布折米每匹抵三十石其後麤闊棉布亦抵三十石梭布極細者猶直銀二兩麤布僅直三四錢而已久之定布一匹折銀三錢於是官員俸給凡二曰本色曰折色其

本色有三曰月米曰折絹米曰折銀米月米不問官大小皆一石折絹絹一匹當銀六錢折銀六錢五分當米一石其折色有二曰本色鈔曰絹布折鈔本色鈔十貫折米一石後增至二十貫絹布折鈔絹每匹折米二十石布一匹折米十石公侯之祿或本折中半或折多於本有差文武官俸正一品者本色僅十之三遞增至從九品本色乃十之七武職府衛官惟本色米折銀例每石二錢五分與文臣異餘並同其三大營副將參游佐員每月米五石巡捕營提督參將亦如之巡捕中軍把總官月支口糧九斗旗牌官半之天下衛所軍士月糧洪武中令京外衛馬軍月支米二石步軍總旗一石五斗小旗一石二斗軍一石城守者如數給屯田者半之民匠充軍者八斗牧馬千戶所一石民丁編軍操練者一石江陰橫海水軍稍班碇手一石五斗陣亡病故軍給喪費一石在營病故者半之籍沒免死充軍者謂之恩軍家四口以上一石三口以下六斗無家口者四斗又給軍士月鹽有家口者二斤無者一斤在外衛所軍士以鈔準永樂中始令糧多之地旗軍月糧八分支米二分支鈔後山西陝西皆然而

福建兩廣四川則米七鈔三江西則米鈔中半惟京軍及中都留守司河南浙
江湖廣軍仍全支米已而定制衛軍有家屬者月米六斗無者四斗五升餘皆
折鈔凡各衛調至京操備軍兼工作者米五斗其後增損不一而本折則例各
鎮多寡不同不能具舉凡各鎮兵餉有屯糧有民運有鹽引有京運有主兵年
例有客兵年例屯糧者明初各鎮皆有屯田一軍之田足贍一軍之用衛所官
吏俸糧皆取給焉民運者屯糧不足加以民糧麥米豆草布鈔花絨運給戍卒
故謂之民運後多議折銀鹽引者召商入粟開中商屯出糧與軍屯相表裏其
後納銀運司各存而實亡京運始自正統中後屯糧鹽糧多廢而京運日益矣
主兵有常數客兵無常數初各鎮主兵足守其地後漸不足增以募兵募兵不
足增以客兵兵愈多坐食愈衆而年例亦日增云

明田稅及經費出入之數見於掌故者皆略可考見洪武二十六年官民田總
八百五十萬七千餘頃夏稅米麥四百七十一萬七千餘石錢鈔三萬九千餘
錠絹二十八萬八千餘匹秋糧米二千四百七十二萬九千餘石錢鈔五千餘

錠弘治時官民田總六百二十二萬八千餘頃夏稅米麥四百六十二萬五千
餘石鈔五萬六千三百餘錠絹二十萬二千餘匹秋糧米二千二百十六萬六
千餘石鈔二萬一千九百餘錠萬曆時官民田總七百一萬三千餘頃夏稅米
麥總四百六十萬五千餘石起運百九十萬三千餘石餘悉存留鈔五萬七千
九百餘錠絹二十萬六千餘匹秋糧米總二千二百三萬三千餘石起運千三
百三十六萬二千餘石餘悉存留鈔二萬三千六百餘錠屯田六十三萬五千
餘頃花園倉基千九百餘所徵糧四百五十八萬四千餘石糧草折銀八萬五
千餘兩布五萬匹鈔五萬餘貫各運司提舉大小引鹽二百二十二萬八千餘
引歲入之數內承運庫慈寧慈慶乾清三宮子粒銀四萬九千餘兩金花銀一
百一萬二千餘兩金二千兩廣惠庫河西務等七鈔關鈔二千九百二十八萬
餘貫錢五千九百七十七萬餘文京衛屯鈔五萬六千餘貫天財庫京城九門
鈔六十六萬五千餘貫錢二百四十三萬餘文京通二倉并薊密諸鎮漕糧四
百萬石京衛屯豆二萬三千餘石太倉銀庫南北直隸浙江江西山東河南派

剩麥米折銀二十五萬七千餘兩絲綿稅絲農桑絹折銀九萬餘兩綿布苧布折銀三萬八千餘兩百官祿米折銀二萬六千餘兩馬草折銀三十五萬三千餘兩京五草場折銀六萬三千餘兩各馬房倉麥豆草折銀二十餘萬兩戶口鹽鈔折銀四萬六千餘兩薊密永昌易遼東六鎮民運改解銀八十五萬三千餘兩各鹽運提舉餘鹽課鹽稅銀一百萬三千餘兩黃白蠟折銀六萬八千餘兩霸大等馬房子粒銀二萬三千餘兩備邊并新增地畝銀四萬五千餘兩京衛屯牧地增銀萬八千餘兩崇文門商稅牙稅一萬九千餘兩錢一萬八千餘貫張家灣商稅二千餘兩錢二千八百餘貫諸鈔關折銀二十二萬三千餘兩泰山香稅二萬餘兩贓罰銀十七萬餘兩商稅魚課富戶曆日民壯弓兵并屯折改折月糧銀十四萬四千餘兩北直隸山東河南解各邊鎮麥米豆草鹽鈔折銀八十四萬二千餘兩諸雜物條目繁瑣者不具載所載歲入但計起運京邊者而存留不與焉歲出之數公侯駙馬伯祿米折銀一萬六千餘兩官吏監生俸米四萬餘石官吏折俸絹布銀四萬四千餘兩錢三千三百餘貫倉庫

草場官攢甲斗光祿太常諸司及內府監局匠役本色米八萬六千餘石折色銀一萬三千餘兩錦衣等七十八衛所官吏旗校軍士匠役本色米二百一萬八千餘石折色銀二十萬六千餘兩官員折俸絹布銀二十六萬八千餘兩軍士冬衣折布銀八萬二千餘兩五軍神樞神機三大營將卒本色米十二萬餘石冬衣折布銀二千餘兩官軍防秋三月口糧四萬三千餘石營操馬匹本色料二萬四千餘石草八十萬餘束巡捕營軍糧七千餘石京營巡捕營錦衣騰驤諸衛馬料草折銀五萬餘兩中都留守司山東河南二都司班軍行糧及工役鹽糧折銀五萬餘兩京五草場商價一萬六千餘兩御馬三倉象馬等房商價十四萬八千餘兩諸邊及近京鎮兵餉宣府主兵屯糧十三萬二千餘石折色銀二萬二千餘兩民運折色銀七十八萬七千餘兩淮長蘆河東鹽引銀十三萬五千餘兩京運年例銀十二萬五千兩客兵淮蘆鹽引銀二萬六千餘兩京運年例銀十七萬一千兩大同主兵屯糧本色七萬餘石折色銀一萬六千餘兩牛具銀八千餘兩鹽鈔銀一千餘兩民運本色米七千餘石折色銀四

十五萬六千餘兩屯田及民運本色草二百六十八萬餘束折草銀二萬八千餘兩淮蘆鹽四萬三千餘引京運年例銀二十六萬九千餘兩客兵京運銀十八萬一千兩淮蘆鹽七萬引山西主兵屯糧二萬八千餘石折色銀一千餘兩草九萬五千餘束民運本色米豆二萬一千餘石折色銀三十二萬二千餘兩淮浙山東鹽引銀五萬七千餘兩河東鹽課銀六萬四千餘兩京運銀十三萬三千餘兩客兵京運銀七萬三千兩延綏主兵屯糧五萬六千餘石地畝銀一千餘兩民運糧料九萬七千餘石折色銀十九萬七千餘兩屯田及民運草六萬九千餘束淮浙鹽引銀六萬七千餘兩京運年例銀三十五萬七千餘兩客兵淮浙鹽引銀二萬九千餘兩京運年例銀二萬餘兩寧夏主兵屯糧料十四萬八千餘石折色銀一千餘兩地畝銀一千餘兩民運本色糧千餘石折色銀十萬八千餘兩屯田及民運草一百八十三萬餘束淮浙鹽引銀八萬一千餘兩京運年例銀二萬五千兩客兵京運年例銀萬兩甘肅屯糧料二十三萬二千餘石草四百三十餘萬束折草銀二千餘兩民運糧布折銀二十九萬四千

餘兩京運銀五萬一千餘兩淮浙鹽引銀十萬二千餘兩固原屯糧料三十一萬九千餘石折色糧料草銀四萬一千餘兩地畝牛具銀七千一百餘兩民運本色糧料四萬五千餘石折色糧料草布花銀二十七萬九千餘兩屯田及民運草二十萬八千餘束淮浙鹽引銀二萬五千餘兩京運銀六萬三千餘兩犒賞銀一百九十餘兩遼東主兵屯糧二十七萬九千餘石荒田糧四百餘兩民運銀十五萬九千餘兩淮山東鹽引銀三萬九千餘兩京運年例銀三十萬七千餘兩客兵京運年例銀十萬二千餘兩荊州主兵民運銀九千餘兩漕糧五萬石京運年例銀二十萬六千餘兩客兵屯糧料五萬三千餘石地畝馬草折色銀萬六千餘兩民運銀萬八千餘兩山東民兵工食銀五萬六千兩遵化營民壯工食銀四千餘兩鹽引銀萬三千餘兩京運年例銀二十萬八千餘兩撫賞銀一萬五千兩犒軍銀一萬三千餘兩永平主兵屯糧料三萬三千餘石民運糧料二萬七千餘石折色銀二萬八千餘兩民壯工食銀萬二千餘兩京運年例銀十二萬二千餘兩客兵屯草折銀三千餘兩民運草三十一萬一千

餘東京運銀十一萬九千餘兩密雲主兵屯糧六千餘石地畝銀二百九十兩
民運銀萬兩有奇漕糧十萬四千餘石京運銀十六萬兩有奇客兵民運銀萬
六千餘兩民壯工食銀九百餘兩漕糧五萬石京運銀二十三萬三千餘兩昌
平主兵屯糧折色銀二千四百餘兩地畝銀五百餘兩折草銀一百餘兩民運
銀二萬兩有奇漕糧十八萬九千餘石京運年例銀九萬六千餘兩客兵京運
年例銀四萬七千餘兩易州主兵屯糧二萬三千餘石地畝銀六百餘兩民運
銀三十萬六千餘兩客兵京運銀五萬九千兩井陘主兵屯糧萬四千餘石地
畝銀八千餘兩民運本色米麥一萬七千餘石折色銀四萬八千餘兩客兵京
運年例銀三千餘兩他雜費不具載

明史卷八十二

史卷八十二

...

...

...

...

...

...

...

...

...

...

...

...

明史卷八十三

志第五十九

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

河渠一

黃河上

黃河自唐以前皆北入海宋熙寧中始分趨東南一合泗入淮一合濟入海金明昌中北流絕全河皆入淮元潰溢不時至正中受害尤甚濟寧曹鄆間漂沒千餘里賈魯爲總制導使南匯淮入海明洪武元年決曹州雙河口入魚臺徐達方北征乃開塌場口引河入泗以濟運而徙曹州治於安陵塌場者濟寧以西耐牢坡以南直抵魚臺南陽道也八年河決開封太黃寺堤詔河南參政安然發民夫三萬人塞之十四年決原武祥符中牟有司請興築帝以爲天災令護舊堤而已十五年春決朝邑七月決滎澤陽武十七年決開封東月堤自陳橋至陳留橫流數十里又決杞縣入巴河遣官塞河蠲被災租稅二十二年河

沒儀封徙其治於白樓村二十三年春決歸德州東南鳳池口逕夏邑永城發興武等十衛士卒與歸德民併力築之罪有司不以聞者其秋決開封西華諸縣漂沒民舍遣使振萬五千七百餘戶二十四年四月河水暴溢決原武黑洋山東經開封城北五里又東南由陳州項城太和潁州潁上東至壽州正陽鎮全入於淮而賈魯河故道遂淤又由舊曹州鄆城兩河口漫東平之安山元會通河亦淤明年復決陽武汜陳州中牟原武封邱祥符蘭陽陳留通許太康扶溝杞十一州縣有司具圖以聞發民丁及安吉等十七衛軍士修築其冬大寒役遂罷三十年八月決開封城三面受水詔改作倉庫於滎陽高阜以備不虞冬蔡河徙陳州先是河決由開封北東行至是下流淤又決而之南永樂三年河決温縣堤四千丈濟滌二水交溢滄民田四十餘里命修堤防四年修陽武黃河決岸八年秋河決開封壞城二百餘丈民被患者萬四千餘戶沒田七千五百餘頃帝以國家藩屏地特遣侍郎張信往視信言祥符魚王口至中欒下二十餘里有舊黃河岸與今河面平濬而通之使循故道則水勢可殺因繪圖

以進時尚書宋禮侍郎金純方開會通河帝乃發民丁十萬命與安伯徐亨侍郎蔣廷瓚偕純相治併令禮總其役九年七月河復故道自封邱金龍口下魚臺塌場會汶水經徐呂二洪南入於淮是時會通河已開黃河與之合漕道大通遂議罷海運而河南水患亦稍息已而決陽武中鹽堤漫中牟祥符尉氏工部主事藺芳按視言堤當急流之衝夏秋泛漲勢不可驟殺宜捲土樹椿以資捍禦無令重爲民患而已又言中灤導河分流使由故道北入海誠萬世利但緣河堤埽止用蒲繩泥草不能持久宜編木爲囤填石其中則水可殺堤可固詔皆從其議十四年決開封州縣十四經懷遠由渦河入於淮二十年工部以開封土城堤數潰請濬其東故道報可宣德元年霖雨溢開封州縣十三年以河患徙靈州千戶所於城東六年從河南布政使言濬祥符抵儀封黃陵岡淤道四百五十里是時金龍口漸淤而河復屢溢開封十年從御史李懋言濬金龍口正統二年築陽武原武滎澤決岸又決濮州范縣三年河復決陽武及邳州灌魚臺金鄉嘉祥越數年又決金龍口陽穀堤及張家黑龍廟口而徐呂二

洪亦漸淺太黃寺巴河分水處水脈微細十三年方從都督同知武興言發卒疏濬而陳留水夏漲決金村堤及黑潭南岸築垂竣復決其秋新鄉入柳樹口亦決漫曹濮抵東昌衝張秋潰壽張沙灣壞運道東入海徐呂二洪遂淺澀命工部侍郎王永和往理其事永和至山東修沙灣未成以冬寒停役且言河決自衛輝宜敕河南守臣修塞帝切責之令山東三司築沙灣趣永和塞河南入柳樹疏金龍口使河由故道明年正月河復決聊城至三月永和濬黑洋山西灣引其水由太黃寺以資運河修築沙灣堤大半而不敢盡塞置分水閘設三空放水自大清河入海且設分水閘二空於沙灣西岸以泄上流而請停入柳樹工從之是時河勢方橫溢而分流大清不肅向徐呂徐呂益膠淺且自臨清以南運道艱阻景泰二年特敕山東河南巡撫都御史洪英王暹協力合治務令水歸漕河暹言黃河自陝州以西有山峽不能爲害陝州以東則地勢平緩水易泛溢故爲害甚多洪武二十四年改流從汴梁北五里許由鳳陽入河者爲大黃河其支流出徐州以南者爲小黃河以通漕運自正統十三年以來河

復故道從黑洋山後徑趨沙灣入海但存小黃河從徐州出岸高水低隨濬隨塞以是徐州之南不得飽水臣自黑洋山東南抵徐州督河南三司疏濬臨清以南請以賁英未幾給事中張文質劾暹英治水無績請引塌場水濟徐呂二洪濬潘家渡以北支流殺沙灣水勢且開沙灣浮橋以西河口築閘引水以灌臨清而別命官以責其成詔不允仍命暹英調度時議者謂沙灣以南地高水不得南入運河請引耐牢坡水以灌運而勿使經沙灣別開河以避其衝決之勢或又言引耐牢坡水南去則自此以北枯澀矣甚者言沙灣水湍急石鐵沉下若羽非人力可爲宜設齋醮符咒以禳之帝心甚憂念命工部尙書石璞往治而加河神封號璞至濬黑洋山至徐州以通漕而沙灣決口如故乃命中官黎賢阮洛御史彭誼協治璞等築石堤於沙灣以禦決河開月河二引水以益運河且殺其決勢三年五月河流漸微細沙灣堤始成乃加璞太子太保而於黑洋山沙灣建河神二新廟歲春秋二祭六月大雨浹旬復決沙灣北岸掣運河之水以東近河地皆沒命英督有司修築復敕中官黎賢武良工部侍郎趙

榮往治四年正月河復決新塞口之南詔復加河神封號至四月決口乃塞五月大雷雨復決沙灣北岸掣運河水入鹽河漕舟盡阻帝復命璞往乃鑿一河長三里以避決口上下通運河而決口亦築壩截之令新河運河俱可行舟工畢奏聞帝恐不能久令璞且留處置而命諭德徐有貞爲僉都御史崑治沙灣時河南水患方甚原武西華皆遷縣治以避水巡撫暹言黃河舊從開封北轉流東南入淮不爲害自正統十三年改流爲二一自新鄉入柳樹由故道東經延津封邱入沙灣一決滎澤漫流原武抵祥符扶溝通許洧川尉氏臨潁鄆城陳州商水西華項城太康沒田數十萬頃而開封患特甚雖嘗築大小堤於城西皆三十餘里然沙土易壞隨築隨決小堤已沒大堤復壞其半請起軍民夫協築以防後患帝可其奏太僕少卿黃仕儔亦言河分兩派一自滎澤南流入項城一自新鄉入柳樹北流入張秋會通河並經六七州縣約二千餘里民皆蕩析離居而有司猶徵其稅乞敕所司覆視免徵帝亦可其奏巡撫河南御史張瀾又言原武黃河東岸嘗開二河合黑洋山舊河道引水濟徐呂今河改決

而北二河淤塞不通恐徐呂乏水必妨漕運黑洋山北河流稍紆迴請因決口改挑一河以接舊道灌徐呂帝亦從之有貞至沙灣上治河三策一置水閘門臣聞水之性可使通流不可使堙塞禹鑿龍門闢伊闕爲疏導計也故漢武埭瓠子終弗成功漢明疏汴河踰年著績今談治水者甚衆獨樂浪王景所述制水門之法可取蓋沙灣地土皆沙易致坍決故作壩作閘皆非善計請依景法損益其間置閘門於水而實其底令高常水五尺小則拘之以濟運大則疏之使趨海則有通流之利無堙塞之患矣一開分水河凡水勢大者宜分小者宜合今黃河勢大恆衝決運河勢小恆乾淺必分黃水合運河則有利無害請度黃河可分之地開廣濟河一道下穿濮陽博陵及舊沙河二十餘里上連東西影塘及小嶺等地又數十餘里其內則有古大金堤可倚以爲固其外有八十里梁山泊可恃以爲泄至新置二閘亦頗堅牢可以宣節使黃河水大不至泛溢爲害小亦不至乾淺以阻漕運其一挑深運河帝諭有貞如其議行之有貞乃踰濟汶沿衛沁循大河道濮范相度地形水勢上言河自雍而豫出險固而

之夷斥水勢既肆由豫而克土益疎水益肆而沙灣之東所謂大洪口者適當其衝於是決焉而奪濟汶入海之路以去諸水從之而洩堤以潰渠以淤澇則溢旱則涸漕道由此阻然驟而堰之則潰者益潰淤者益淤今請先疏其水水勢平乃治其決決止乃濬其淤於是設渠以疏之起張秋金堤之首西南行九里至濮陽樂又九里至博陵陂又六里至壽張之沙河又八里至東西影塘又十有五里至白嶺灣又三里至李峯凡五十里由李峯而上二十里至竹口蓮花池又三十里至大瀦潭乃踰范暨濮又上而西凡數百里經澶淵以接河沁築九堰以禦河流旁出者長各萬丈實之石而鍵以鐵六年七月功成賜渠名廣濟沙灣之決垂十年至是始塞亦曾黃河南流入淮有貞乃克奏功凡費木鐵竹石累數萬夫五萬八千有奇工五百五十餘日自此河水北出濟漕而阿鄆曹鄆間田出沮洳者百數十萬頃乃濬漕渠由沙灣北至臨清南抵濟寧復建八閘於東昌用王景制水門法以平水道而山東河患息矣七年夏河南大雨河決開封河南彰德其秋畿輔山東大雨諸水並溢高地丈餘堤岸多衝決

仍敕有貞修築未幾事竣還京入見獎勞甚至擢副都御史天順元年修祥符護城大堤五年七月河決汴梁土城又決磚城城中水丈餘壞官民舍過半周王府宮人及諸守土官皆乘舟筏以避軍民溺死無算襄城亦決縣城命工部侍郎薛遠往視恤災戶蠲田租公廨民居以次修理明年二月開祥符曹家溜河勢稍平七年春河南布政司照磨金景輝考滿至京上言國初黃河在封邱後徙康王馬頭去城北三十里復有二支河一由沙門注運河一由金龍口達徐呂入海正統戊辰決滎澤轉趨城南并流入淮舊河支河俱堙漕河因而淺澀景泰癸酉因水迫城築堤四十里勞費過甚而水發輒潰然尙未至決城壕爲人害也至天順辛巳水暴至土城磚城並圯七郡財力所築之堤俱委諸無用人心惶惶未知所底夫河不循故道併流入淮是爲妄行今急宜疏導以殺其勢若止委之一淮而以堤防爲長策恐開封終爲魚鼈之區乞敕部檄所司先疏金龍口寬闊以接漕河然後相度舊河或別求泄水之地挑濬以平水患爲經久計命如其說行之成化七年命王恕爲工部侍郎奉敕總理河道總河

侍郎之設自恕始也時黃河不爲患恕盡力漕河而已十四年河決開封壞護城堤五十丈巡撫河南都御史李衍言河南累有河患皆下流壅塞所致宜疏開封西南新城地下抵梁家淺舊河口七里壅塞以洩杏花營上流又自八角河口直抵南頓分導散漫以免祥符鄆陵睢陳歸德之災乃敕衍酌行之明年正月遷滎澤縣治以避水而開封堤不久卽塞弘治二年五月河決開封及金龍口入張秋運河又決埽頭五所入沁郡邑多被害汴梁尤甚議者至請遷開封城以避其患布政司徐恪持不可乃止命所司大發卒築之九月命白昂爲戶部侍郎修治河道賜以特敕令會山東河南北直隸三巡撫自上源決口至運河相機修築三年正月昂上言臣自淮河相度水勢抵河南中牟等縣見上源決口水入南岸者十三入北岸者十七南決者自中牟楊橋至祥符界析爲二支一經尉氏等縣合潁水下滄山入於淮一經通許等縣入渦河下荆山入於淮又一支自歸德州通鳳陽之亳縣亦合渦河入於淮北決者自原武經陽武祥符封邱蘭陽儀封考城其一支決入金龍等口至山東曹州衝入張秋漕

河去冬水消沙積決口已淤因併爲一大支由祥符翟家口合沁河出了家道
口下徐州此河流南北分行大勢也合潁渦二水入淮者各有灘磧水脈頗微
宜疏濬以殺河勢合沁水入徐者則以河道淺隘不能受方有漂沒之虞況上
流金龍諸口雖暫淤久將復決宜於北流所經七縣築爲堤岸以衛張秋但原
敕治山東河南北直隸而南直隸淮徐境實河所經行要地尙無所統於是併
以命昂舉郎中婁性協治乃役夫二十五萬築陽武長堤以防張秋引中牟
決河出滎澤陽橋以達淮濬宿州古汴河以入泗又濬睢河自歸德飲馬池經
符離橋至宿遷以會漕河上築長堤下修減水閘又疏月河十餘以洩水塞決
口三十六使河流入汴汴入睢睢入泗泗入淮以達海水患稍寧昂又以河南
入淮非正道恐卒不能容復於魚臺德州吳橋修古長堤又自東平北至興濟
鑿小河十二道入大清河及古黃河以入海河口各建石堰以時啓閉蓋南北
分治而東南則以疏爲主云六年二月以劉大夏爲副都御史治張秋決河先
是河決張秋戴家廟掣漕河與汶水合而北行遣工部侍郎陳政督治政言河

之故道有二一在滎澤孫家渡口經朱仙鎮直抵陳州一在歸德州飲馬池與
亳州地相屬舊俱入淮今已淤塞因致上流衝激勢盡北趨自祥符孫家口楊
家口車船口蘭陽銅瓦廂決爲數道俱入運河於是張秋上下勢甚危急自堂
邑至濟寧堤岸多崩圯而戴家廟減水閘淺隘不能洩水亦有衝決請濬舊河
以殺上流之勢塞決河以防下流之患政方漸次修舉未幾卒官帝深以爲憂
命廷臣會薦才識堪任者僉舉大夏遂賜敕以往十二月巡按河南御史涂昇
言黃河爲患南決病河南北決病山東昔漢決酸棗復決瓠子宋決館陶復決
澶州元決汴梁復決蒲口然漢都關中宋都大梁河決爲患不過瀕河數郡而
已今京師專藉會通河歲漕粟數百萬石河決而北則大爲漕憂臣博采輿論
治河之策有四一曰疏濬滎鄭之東五河之西飲馬白露等河皆黃河由渦入
淮之故道其後南流日久或河口以淤高不洩或河身狹隘難容水勢無所分
殺遂泛濫北決今惟躡上流東南之故道相度疏濬則正流歸道餘波就壑下
流無奔潰之害北岸無衝決之患矣二曰扼塞既殺水勢於東南必須築堤岸

於西北黃陵岡上下舊堤缺壞當度下流東北形勢去水遠近補築無遺排障百川悉歸東南由淮入海則張秋無患而漕河可保矣三曰用人薦河南僉事張彛四曰久任則請專信大夏且於歸德或東昌建公廨令居中裁決也帝以爲然七年五月命太監李興平江伯陳銳往同大夏共治張秋十二月築塞張秋決口工成初河流湍悍決口闊九十餘丈大夏行視之曰是下流未可治當治上流於是卽決口西南開越河三里許使糧運可濟乃濬儀封黃陵岡南買魯舊河四十餘里由曹出徐以殺水勢又濬孫家渡口別鑿新河七十餘里導使南行由中牟潁川東入淮又濬祥符四府營淤河由陳留至歸德分爲二一由宿遷小河口一由亳渦河俱會於淮然後沿張秋兩岸東西築臺立表貫索聯巨艦穴而窒之實以土至決口去窒沉艦壓以大埽且合且決隨決隨築連晝夜不息決旣塞繚以石堤隱若長虹功乃成帝遣行人齎羊酒往勞之改張秋名爲安平鎮大夏等言安平鎮決口已塞河下流北入東昌臨清至天津入海運道已通然必築黃陵岡河口導河上流南下徐淮庶可爲運道久安之計

廷議如其言乃以八年正月築塞黃陵岡及荆隆等口七處旬有五日而畢蓋黃陵岡居安平鎮之上流其廣九十餘丈荆隆等口又居黃陵岡之上流其廣四百三十餘丈河流至此寬漫奔放皆喉襟重地諸口旣塞於是上流河勢復歸蘭陽考城分流逕徐州歸德宿遷南入運河會淮水東注於海南流故道以復而大名府之長堤起胙城歷滑縣長垣東明曹州曹縣抵虞城凡三百六十里其西南荆隆等口新堤起於家店歷銅瓦廂東橋抵小宋集凡百六十里大小二堤相翼而石壩俱培築堅厚潰決之患於是息矣帝以黃陵岡河口功成敕建黃河神祠以鎮之賜額曰昭應其秋召大夏等還京荆隆卽金龍也十一年河決歸德管河工部員外郎謝緝言黃河一支先自徐州城東小浮橋流入漕河南抵邳州宿遷今黃河上流於歸德州小壩子等處衝決與黃河別支會流經宿州睢寧由宿遷小河口流入漕河於是小河口北抵徐州水流漸細河道淺阻且徐呂二洪惟賴沁水接濟自沁源河內歸德至徐州小浮橋流出雖與黃河異源而比年河沁之流合而爲一今黃河自歸德南決恐牽引沁水俱

往南流則徐呂二洪必至淺阻請亟塞歸德決口遏黃水入徐以濟漕而挑沁水之淤使入徐以濟徐呂則水深廣而漕便利矣帝從其請未幾河南管河副使張彛言臣嘗請修築侯家潭口決河以濟徐呂二洪今自六月以來河流四溢潭口決齧彌深工費浩大卒難成功臣嘗行視水勢荆隆口堤內舊河通賈魯河由丁家道口下徐淮其迹尙在若於上源武陟木欒店別鑿一渠下接荆隆口舊河俟河流南遷則引之入渠庶沛然之勢可接二洪而糧運無所阻矣帝爲下其議於總漕都御史李蕙越二歲兗州知府龔弘上言副使彛見河勢南行欲自荆隆口分沁水入賈魯河又自歸德西王牌口上下分水亦入賈魯河俱由丁家道口入徐州但今秋水從王牌口東行不由丁家口而南顧逆流東北至黃陵岡又自曹縣入單南連虞城乞令守臣亟建疏濬修築之策於是河南巡撫都御史鄭齡言徐呂二洪藉河沁二水合流東下以相接濟今丁家道口上下河決堤岸者十有二處共闊三百餘丈而河淤三十餘里上源奔放則曹單受害而安平可虞下流散溢則蕭碭被患而漕流有阻濬築誠急務也

部覆從之乃修丁家口上下堤岸初黃河自原武滎陽分而爲三一自亳州鳳陽至清河口通淮入海一自歸德州過丁家道口抵徐州小浮橋一自窪泥河過黃陵岡亦抵徐州小浮橋卽賈魯河也迨河決黃陵岡犯張秋北流奪漕劉大夏往塞之仍出清河口十八年河忽北徙三百里至宿遷小河口正德三年又北徙三百里至徐州小浮橋四年六月又北徙一百二十里至沛縣飛雲橋俱入漕河是時南河故道淤塞水惟北趨單豐之間河窄水溢決黃陵岡尙家等口曹單田廬多沒至圍豐縣城郭兩岸闊百餘里督漕及山東鎮巡官恐經鉅野陽穀故道則奪濟寧安平運河各陳所見以請議未定明年九月河復衝黃陵岡入賈魯河汎溢橫流直抵豐沛御史林茂達亦以北決安平鎮爲虞而請濬儀封考城上流故道引河南流以分其勢然後塞決口築故堤工部侍郎崔巖奉命修理黃河濬祥符董益口滎澤孫家渡又濬賈魯河及亳州故河各數十里且築長垣諸縣決口及曹縣外堤梁靖決口功未就而驟雨堤潰巖上疏言河勢衝蕩益甚且流入王子河亦河故道若非上流多殺水勢決口恐難

卒塞莫若於曹單豐沛增築堤防毋令北徙庶可護漕且請別命大臣知水利者共議於是帝責巖治河無方而以侍郎李鏜代之鏜言蘭陽儀封考城故道淤塞故河流俱入賈魯河經黃陵岡至曹縣決梁靖楊家二口侍郎巖亦嘗修濬緣地高河澱隨濬隨淤水勢不多而決口又難築塞今觀梁靖以下地勢最卑故衆流奔注成河直抵沛縣藉令其口築成而容受全流無地必致迴激黃陵岡堤岸而運道妨矣至河流故道堙者不可復疏請起大名三春柳至沛縣飛雲橋築堤三百餘里以障河北徙從之六年二月功未竣鏜言陳橋集銅瓦廂俱應增築請設副使一人耑理會河南盜起召鏜還京命姑已其不急者遂委其事於副使而堤役由此罷八年六月河復決黃陵岡部議以其地界大名山東河南守土官事權不一請耑遣重臣乃命管河副都御史劉愷兼理其事愷奏率衆祭告河神越二日河已南徙尙書李鏞因請祭河且賜愷羊酒愷於治河束手無策特歸功於神曹單間被害日甚世宗初總河副都御史龔弘言黃河自正德初載變遷不常日漸北徙大河之水合成一派歸入黃陵岡前乃

折而南出徐州以入運河黃陵岡初築三埽先已決去其二懼山陝諸水橫發
加以霖潦決而趨張秋復由故道入海臣嘗築堤起長垣由黃陵岡抵山東楊
家口延袤二百餘里今擬距堤十里許再築一堤延袤高廣如之卽河水溢舊
堤流至十里外性緩勢平可無大決從之自黃陵岡決開封以南無河患而河
北徐沛諸州縣河徙不常嘉靖五年督漕都御史高友璣請濬山東賈魯河河
南鴛鴦口分洩水勢毋偏害一方部議恐害山東河南不允六年冬以章拯爲
工部侍郎兼僉都御史治河先是大學士費宏言河入汴梁以東分爲三支雖
有衝決可無大害正德末渦河等河日就淤淺黃河大股南趨之勢旣無所殺
乃從蘭陽考城曹濮奔赴沛縣飛雲橋及徐州之溜溝悉入漕河泛溢瀾漫此
前數年河患也近者沙河至沛縣浮沙湧塞官民舟楫悉取道昭陽湖春夏之
交湖面淺涸運道必阻渦河等河必宜亟濬御史戴金言黃河入淮之道有三
自中牟至荆山合長淮曰渦河自開封經葛岡小壩丁家道口馬牧集鴛鴦口
至徐州小浮橋口曰汴河自小壩經歸德城南飲馬池抵文家集經夏邑至宿

遷曰白河弘治間渦白上源堙塞而徐州獨受其害宜自小壩至宿遷小河併
賈魯河鴛鴦口文家集壅塞之處盡行疏通則趨淮之水不止一道而徐州水
患殺矣御史劉欒言曹縣梁靖口南岸舊有賈魯河南至武家口十三里黃沙
淤平必宜開濬武家口下至馬牧集鴛鴦口百十七里卽小黃河舊通徐州故
道水尙不涸亦宜疏通督漕總兵官楊宏亦請疏歸德小壩丁家道口亳州渦
河宿遷小河友璣及拯亦屢以爲言俱下工部議以爲濬賈魯故道開渦河上
源功大難成未可輕舉但議築堤障水俾入正河而已是年黃河上流驟溢東
北至沛縣廟道口截運河注鷄鳴臺口入昭陽湖汶泗南下之水從而東而河
之出飛雲橋者漫而北淤數十里河水沒豐縣徙治避之明年拯言滎陽北孫
家渡蘭陽北趙皮寨皆可引水南流但二河通渦東入淮又東至鳳陽長淮衛
經壽春王諸園寢爲患叵測惟寧陵北岔河一道通飲馬池抵文家集又經夏
邑至宿州符離橋出宿遷小河口自趙皮寨至文家集凡二百餘里濬而通之
水勢易殺而園寢無患乃爲圖說以聞命刻期舉工而河決曹單城武楊家梁

靖二口吳士舉莊衝入鷄鳴臺奪運河沛地淤填七八里糧艘阻不進御史吳仲以聞因劾拯不能辦河事乞擇能者往代其冬以盛應期爲總督河道右都御史是時光祿少卿黃綰詹事霍韜左都御史胡世寧兵部尙書李承勛各獻治河之議綰言漕河資山東泉水不必資黃河莫若濬兗冀間兩高中低之地道河使北至直沽入海韜言議者欲引河自蘭陽注宿遷夫水溢徐沛猶有二洪爲之東捍東北諸山亘列如垣有所底極若道蘭陽則歸德鳳陽平地千里河勢奔放數郡皆壑患不獨徐沛矣按衛河自衛輝汲縣至天津入海猶古黃河也今宜於河陰原武懷孟間審視地形引河水注於衛河至臨清天津則徐沛水勢可殺其半且元人漕舟涉江入淮至封邱北陸運百八十里至淇門入御河達京師御河卽衛河也今導河注衛冬春泝衛河沿臨清至天津夏秋則由徐沛此一舉而運道兩得也世寧言河自汴以來南分二道一出汴城西滎澤經中牟陳潁至壽州入淮一出汴城東祥符經陳留亳州至懷遠入淮其東南一道自歸德宿州經虹縣睢寧至宿遷出其東分五道一自長垣曹鄆至陽

穀出一自曹州雙河口至魚臺塌場口出一自儀封歸德至徐州小浮橋出一自沛縣南飛雲橋出一自徐沛之中境山北溜溝出六道皆入漕河而南會於淮今諸道皆塞惟沛縣一道僅存合流則水勢既大河身亦狹不能容故溢出爲患近又漫入昭陽湖以致流緩沙壅宜因故道而分其勢汴西則濬孫家渡抵壽州以殺上流汴東南出懷遠宿遷及正東小浮橋溜溝諸道各宜擇其利便者開濬一道以洩下流或修武城南廢堤抵豐單接沛北廟道口以防北流此皆治河急務也至爲運道計則當於湖東滕沛魚臺鄒縣間獨山新安社地別鑿一渠南接留城北接沙河不過百餘里厚築西岸以爲湖障令水不得漫而以一湖爲河流散漫之區乃上策也承勛言黃河入運支流有六自渦河源塞則北出小黃河溜溝等處不數年諸處皆塞北併出飛雲橋於是豐沛受患而金溝運道遂淤然幸東面皆山猶有所障故昭陽湖得通舟若益徙而北則徑奔入海安平鎮故道可慮單縣穀亭百萬生靈之命可虞又益北則自濟寧至臨清運道諸水俱相隨入海運何由通臣愚以爲相六道分流之勢導引使

南可免衝決此下流不可不疏濬也欲保豐沛單縣穀亭之民必因舊堤築之堤其西北使毋溢出此上流不可不堤防也其論昭陽湖東引水爲運道與世寧同乃下總督大臣會議七年正月應期奏上如世寧策請於昭陽湖東改爲運河會河決淤廟道口三十餘里乃別遣官濬趙皮寨孫家渡南北溜溝以殺上流隄武城迤西至沛縣南以防北潰會旱災修省言者請罷新河之役乃召應期還京以工部侍郎潘希曾代希曾抵官言邇因趙皮寨開濬未通疏孫家渡口以殺河勢請敕河南巡撫潘墳督管河副使刻期成功帝從其奏希曾又言漕渠廟道口以下忽淤數十里者由決河西來橫衝口上并掣閘河之水東入昭陽湖致閘水不南而飛雲橋之水時復北漫故也今宜於濟沛間加築東堤以遏入湖之路更築西堤以防黃河之衝則水不散緩而廟道口可永無淤塞之虞帝亦從之八年六月單豐沛三縣長堤成九年五月孫家渡河堤成逾月河決曹縣一自胡村寺東東南至賈家壩入古黃河由丁家道口至小浮橋入運河一自胡村寺東北分二支一東南經虞城至碭山合古黃河出徐州一

東北經單縣長堤抵魚臺漫爲坡水傍穀亭入運河單豐沛三縣長堤障之不爲害希曾上言黃由歸德至徐入漕故道也永樂間濬開封支河達魚臺入漕以濟淺自弘治時黃河改由單豐出沛之飛雲橋而歸德故道始塞魚臺支河亦塞今全河復其故道則患害已遠支流達於魚臺則淺涸無虞此漕運之利國家之福也帝悅下所司知之乃召希曾還京自是豐沛漸無患而魚臺數溢十一年總河僉都御史戴時宗請委魚臺爲受水之地言河東北岸與運道鄰惟西南流者一由孫家渡出壽州一由渦河口出懷遠一由趙皮寨出桃源一由梁靖口出徐州小浮橋往年四道俱塞全河南奔故豐沛曹單魚臺以次受害今患獨鍾於魚臺宜棄以受水因而道之使入昭陽湖過新開河出留城金溝境山乃易爲力至塞河四道惟渦河經祖陵未敢輕舉其三支河頗存故迹宜乘魚臺壅塞令開封河夫捲埽填堤逼使河水分流則魚臺水勢漸減俟水落畢工并前三河共爲四道以分洩之河患可已明年都御史朱裳代時宗條上治河二事大略言三大支河宜開如時宗計而請塞梁靖口迤東由魚臺入

運河之岔口以捍黃河則穀亭鎮迤南二百餘里淤者可濬是謂塞黃河之口以開運河黃河自穀亭轉入運河順流而南二日抵徐州徐州逆流而北四日乃抵穀亭黃水之利莫大於此恐河流北趨或由魚臺金鄉濟寧漫安平鎮則運河堤岸衝決或三支一有壅淤則穀亭南運河亦且衝決宜繕築堤岸束黃入運是謂借黃河之水以資運河詔裳相度處置十三年正月裳復言今梁靖口趙皮寨已通孫家渡方濬惟渦河一支因趙皮寨下流睢州野鷄岡淤正河五十餘里漫於平地注入渦河宜挑濬深廣引導漫水歸入正河而於睢州張見口築長堤至歸德郭村凡百餘里以防汎溢更時疏梁靖口下流且挑儀封月河入之達於小浮橋則北岸水勢殺矣夫河過魚臺其流漸北將有越濟寧趨安平東入於海之漸嘗議塞岔河之口以安運河而水勢洶湧恐難遽塞塞亦不能無橫決黃陵岡李居莊諸處不能無患徐州迤上至魯橋泥沙停滯山東諸泉水微運道必澀請創築城武至濟寧縷水大堤百五十餘里以防北溢而自魯橋至沛縣東堤百五十餘里修築堅厚固之以石自魚臺至穀亭開通

淤河引水入漕以殺魚臺城武之患此順水之性不與水爭地者也孫家渡渦河二支俱出懷遠會淮流至鳳陽經皇陵及壽春王陵至泗州經祖陵皇陵地高無慮祖陵則三面距河壽春王陵尤迫近祖陵宜築土堤壽春王陵宜砌石岸然事體重大不敢輕舉也清江浦口正當黃淮會合之衝二河水漲漫入河口以致淤塞滯運宜濬深廣而又築堤以防水漲築壩以護行舟皆不可緩往時淮水獨流入海而海口又有套流安東上下又有澗河馬邏諸港以分水入海今黃河匯入於淮水勢已非其舊而諸港套俱已堙塞不能速洩下壅上溢梗塞運道宜將溝港次第開濬海口套沙多置龍爪船往來爬盪以廣入海之路此所謂殺其下流者也河出魚臺雖借以利漕然未有數十年不變者也一旦他徙則徐沛必涸宜大濬山東諸泉以匯於汶河則徐沛之渠不患乾涸雖岔河口塞亦無虞矣工部覆如其議帝允行之未幾裳憂去命劉天和爲總河副都御史代裳是歲河決趙皮寨入淮穀亭流絕廟道口復淤天和役夫十四萬濬之已而河忽自夏邑大邱回村等集衝數口轉向東北流經蕭縣下徐州

小浮橋天和言黃河自魚沛入漕河運舟通利者數十年而淤塞河道廢壞聞座阻隔泉流衝廣河身爲害亦大今黃河旣改衝從虞城蕭碭下小浮橋而榆林集侯家林二河分流入運者俱淤塞斷流利去而害獨存宜濬魯橋至徐州二百餘里之淤塞制可十四年從天和言自曹縣梁靖口東岔河口築壓口縷水堤復築曹縣八里灣至單縣侯家林長堤各一道是年冬天和條上治河數事中言魯橋至沛縣東堤舊議築石以禦橫流今黃河旣南徙可不必築孫家渡自正統時全河從此南徙弘治間淤塞屢開屢淤卒不能通今趙皮寨河日漸衝廣若再開渡口併入渦河不惟二洪水澀恐亦有陵寢之虞宜仍其舊勿治舊議祥符盤石蘭陽銅瓦廂考城蔡家口各添築月堤臣以爲黃河之當防者惟北岸爲重當擇其去河遠者大隄中隄各一道修補完築使北岸七八百里間聯屬高厚則前勘應築諸堤舉在其中皆可罷不築帝亦從之十五年督漕都御史周金言自嘉靖六年後河流益南其一由渦河直下長淮而梁靖口趙皮寨二支各入清河匯於新莊聞遂灌裏河水退沙存日就淤塞故老皆言

河自汴來本濁而渦淮泗清新莊閘正當二水之口河淮既合昔之爲沛縣患者今移淮安矣因請於新莊更置一渠立閘以資蓄洩從之十六年冬從總河副都御史于湛言開地邱店野鷄岡諸口上流四十餘里由桃源集丁家道口入舊黃河截渦河水入河濟洪十八年總河都御史胡纘宗開考城孫繼口孫祿口黃河支流以殺歸睢水患且灌徐呂因於二口築長堤及修築馬牧集決口二十年五月命兵部侍郎王以旂督理河道協總河副都御史郭持平計議先一歲黃河南徙決野鷄岡由渦河經亳州入淮舊決口俱塞其由孫繼口及考城至丁家道口虞城入徐呂者亦僅十之二持平久治弗效降俸戴罪以旂至上言國初漕河惟通諸泉及汶泗黃河勢猛水濁遷徙不常故徐有貞白昂劉大夏力排之不資以濟運也今幸黃河南徙諸閘復舊宜濬山東諸泉入野鷄岡新開河道以濟徐呂而築長堤沛縣以南聚水如閘河制務利漕運而已明年春持平請濬孫繼口及扈運口李景高口三河使東由蕭碭入徐濟運其秋從以旂言於孫繼口外別開一渠洩水以濟徐呂凡八月三口工成以旂持

平皆被獎遂召以旂還未幾李景高口復淤先是河決豐縣遷縣治於華山久之始復其故治河決孟津夏邑皆遷其城及野鷄岡之決也鳳陽沿淮州縣多水患乃議徙五河蒙城避之而臨淮當祖陵形勝不可徙乃用巡按御史賈太亨言敕河撫二臣亟濬碭山河道引入二洪以殺南注之勢二十六年秋河決曹縣水入城二尺漫金鄉魚臺定陶城武衝穀亭總河都御史詹瀚請於趙皮寨諸口多穿支河以分水勢詔可三十一年九月河決徐州房村集至邳州新安運道淤阻五十里總河副都御史曾鈞上治河方略乃濬房村至雙溝曲頭築徐州高廟至邳州沂河又言劉伶臺至赤晏廟凡八十里乃黃河下流淤沙壅塞疏濬宜先次則草灣老黃河口衝激渰沒安東一縣亦當急築更築長堤磯礮以備衝激又三里溝新河口視舊口水高六尺開舊口有沙淤之患而爲害稍輕開新口未免渰沒之虞而漕舟頗便宜暫閉新口建置閘座且增築高家堰長堤而新莊諸閘螿石以遏橫流帝命侍郎吳鵬振災戶而悉從鈞奏三里溝新河者督漕都御史應檀以先年開清河口通黃河之水以濟運今黃河

入海下流澗口安東俱漲塞河流壅而漸高瀉入清河口沙停易淤屢濬屢塞溝在淮水下流黃河未合之上故閉清河口而開之使船由通濟橋遡溝出淮以達黃河者也時濬徐邳將訖工一夕水湧復淤帝用嚴嵩言遣官祭河神而鵬鈞復共奏請急築濬草灣劉伶臺建閘三里溝迎納泗水清流且於徐州以上至開封濬支河一二令水分殺其冬漕河工竣進鈞秩侍郎三十七年七月曹縣新集淤新集地接梁靖口歷夏邑丁家道口馬牧集韓家道口司家道口至蕭縣薊門出小浮橋此賈魯河故道也自河患亟別開支河出小河以殺水勢而本河漸澀至是遂決趨東北段家口析而爲六曰大溜溝小溜溝秦溝濁河胭脂溝飛雲橋俱由運河至徐洪又分一支由碭山堅城集下郭貫樓析而爲五曰龍溝母河梁樓溝楊氏溝胡店溝亦由小浮橋會徐洪而新集至小浮橋故道二百五十餘里遂淤不可復矣自後河忽東忽西靡有定向水得分瀉者數年不至壅潰然分多勢弱淺者僅二尺識者知其必淤至四十四年七月河決沛縣上下二百餘里運道俱淤全河逆流自沙河至徐州以北至曹縣棠

林集而下北分二支南流者遶沛縣戚山楊家集入秦溝至徐北流者遶豐縣華山東北由三教堂出飛雲橋又分而爲十三支或橫絕或逆流入漕河至湖陵城口散漫湖坡達於徐州浩渺無際而河變極矣乃命朱衡爲工部尙書兼理河漕又以潘季馴爲僉都御史總理河道明年二月復遣工科給事中何起鳴往勘河工衡巡行決口舊渠已成陸而感應期所鑿新河故跡尙在地高河決至昭陽湖不能復東乃定計開濬而季馴則以新河土淺泉湧勞費不貲留城以上故道初淤可復也由是二人有隙起鳴至沛還上言舊河之難復有五黃河全徙必殺上流新集龐家屯趙家圈皆上流也以不貲之財投於河流已棄之故道勢必不能一也自留城至沛莽爲巨浸無所施工二也橫亘數十里褰裳無路十萬之衆何所棲身三也挑濬則淖陷築岸則無土且南塞則北奔四也夏秋淫潦難保不淤五也新河開鑿費省且可絕後來潰決之患宜用衡言開新河而兼採季馴言不全棄舊河廷臣議定衡乃決開新河時季馴持復故道之議廷臣又多以爲然遂勘議新集郭貫樓諸上源地衡言河出境山以

北則閘河淤出徐州以南則二洪涸惟出境山至小浮橋四十餘里間乃兩利而無害自黃河橫流碭山郭貫樓支河皆已淤塞改從華山分爲南北二支南出秦溝正在境山南五里許運河可資其利惟北出沛縣西及飛雲橋逆上魚臺爲患甚大朝廷不忍民罹水災拳拳故道命勘上源但臣參考地形有五不可自新集至兩河口皆平原高阜無尺寸故道可因郭貫樓抵龍溝頗有河形又係新淤無可駐足其不可一也黃河所經鮮不爲患由新集則商虞夏邑受之由郭貫樓則蕭碭受之今改復故道則魚沛之禍復移蕭碭其不可二也河西注華山勢若建瓴欲從中鑿渠挽水南向必當築壩橫截遏其東奔於狂瀾巨浸之中築壩數里爲力甚難其不可三也役夫三十萬曠日持久騷動三省其不可四也大役踵興工費數百萬一有不繼前功盡隳其不可五也惟當開廣秦溝使下流通行修築南岸長堤以防奔潰可以甦魚沛昏墊之民從之衡乃開魚臺南陽抵沛縣留城百四十餘里而濬舊河自留城以下抵境山茶城五十餘里由此與黃河會又築馬家橋堤三萬五千二百八十丈石堤三十里

遏河之出飛雲橋者趨秦溝以入洪於是黃水不東侵漕道通而沛流斷矣方
工未成河復決沛縣敗馬家橋堤論者交章請罷衡未幾工竣帝大喜賦詩四
章志喜以示在直諸臣隆慶元年五月加衡太子少保始河之決也支流散漫
遍陸地既而南趨濁河迨新河成則盡趨秦溝而南北諸支河悉併流焉然河
勢益大漲三年七月決沛縣自考城虞城曹單豐沛抵徐州俱受其害茶城淤
塞漕船阻邳州不能進已雖少通而黃河水橫溢沛地秦溝濁河口淤沙旋疏
旋壅朱衡已召還工部及總河都御史翁大立皆請於梁山之南別開一河以
漕避秦溝濁河之險後所謂洳河者也詔令相度地勢未果行四年秋黃河暴
至茶城復淤而山東沙薛汶泗諸水驟溢決仲家淺運道由梁山出戚家港合
於黃河大立復請因其勢而濬之是時淮水亦大溢自泰山廟至七里溝淤十
餘里而水從諸家溝傍出至清河縣河南鎮以合於黃河大立又言開新莊閘
以通回船復陳瑄故道則淮可無虞獨黃河在睢寧宿遷之間遷徙未知所定
泗州陵寢可虞請濬古睢河由宿遷歷宿州出小浮橋以洩二洪之水且規復

清河魚溝分河一道下草灣以免衝激之患則南北運道庶幾可保時大立已內遷方受代而季馴以都御史復起總理河道部議令區畫九月河復決邳州自睢寧白浪淺至宿遷小河口淤百八十里糧艘阻不進大立言比來河患不在山東河南豐沛而專在徐邳故先欲開沭河口以遠河勢開蕭縣河以殺河流者正謂浮沙壅聚河面增高爲異日慮耳今秋水洊至橫溢爲災權宜之計在棄故道而就新衝經久之策在開沭河以避洪水乞決擇於二者部議主塞決口而令大立條利害以聞大立遂以開沭口就新衝復故道三策並進且言其利害各相參會罷去策未決而季馴則主復故道時茶城至呂梁黃水爲兩淮所束不能下又不得決至五年四月乃自靈璧雙溝而下北決三口南決八口支流散溢大勢下睢寧出小河而匙頭灣八十里正河悉淤季馴役丁夫五萬盡塞十一口且濬匙頭灣築縷堤三萬餘丈匙頭灣故道以復旋以漕船行新溜中多漂沒季馴罷去六年春復命尙書衡經理河工以兵部侍郎萬恭總理河道二人至罷沭河議專事徐邳河修築長堤自徐州至宿遷小河口三百

七十里併繕豐沛大黃堤正河安流運道大通衡乃上言河南屢被河患大爲堤防今幸有數十年之安者以防守嚴而備禦素也徐邳爲糧運正道旣多方以築之則宜多方以守之請用夫每里十人以防三里一鋪四鋪一老人巡視伏秋水發時五月十五日上堤九月十五日下午堤願攜家居住者聽詔如議六月徐邳河堤工竣遂命衡回部賞衡及總理河道都御史萬恭等銀幣有差是歲御史吳從憲言淮安而上清河而下正淮泗河海衝流之會河潦內出海潮逆流停蓄移時沙泥旋聚以故日就壅塞宜以春夏時濬治則下流疏暢汎溢自平帝卽命衡與漕臣勘議而督理河道署郎中事陳應薦挑挖海口新河長十里有奇闊五丈五尺深一丈七尺用夫六千四百餘人衡之被召將還也上疏言國家治河不過濬淺築堤二策濬淺之法或爬或撈或逼水而衝或引水而避此可人力勝者然茶城與淮水會則在清河茶城清河無水不淺蓋二水互爲勝負黃河水勝則壅沙而淤及其消也淮漕水勝則衝沙而通水力蓋居七八非專用人力也築堤則有截水縷水之異截水可施於閘河不可施於黃

河蓋黃河湍悍挾川潦之勢何堅不瑕安可以一堤當之縷水則兩岸築堤不使旁潰始得遂其就下入海之性蓋以順爲治非以人力勝水性故至今百五
六十年爲永賴焉清河之淺應視茶城遇黃河漲落時輒挑河潢導淮水衝刷
雖遇漲而塞必遇落而通無足慮也惟清江浦水勢最弱出口處所適與黃河
相值宜於黃水盛發時嚴閉各閘毋使沙淤若海口則自隆慶三年海嘯壅水
倒灌低窪之地積瀦難洩宜時加疏濬毋使積塞至築黃河兩岸堤第當縷水
不得以攔截爲名疏上報聞而已

明史卷八十三

明史卷八十四

志第六十

總裁官總理事務

經筵講官少保兼太子太保保和殿大學士兼管吏部戶部尚書事加六級張廷玉等奉

敕修

河渠二

黃河下

萬曆元年河決房村築堤窪子頭至秦溝口明年給事中鄭岳言運道自茶城至淮安五百餘里自嘉靖四十四年河水大發淮口出水之際海沙漸淤今且高與山等自淮而上河流不迅泥水愈淤於是邳州淺房村決呂梁二洪平茶城倒流皆坐此也今不治海口之沙乃日築徐沛間堤岸桃宿而下聽其所之民之爲魚未有已時也因獻宋李公義王令圖濬川爬法命河臣勘奏從其所言而是年秋淮河並溢明年八月河決碭山及邵家口曹家莊韓登家口而北淮亦決高家堰而東徐邳淮南北漂沒千里自此桃清上下河道淤塞漕艘梗阻者數年淮揚多水患矣總河都御史傅希鞏改築碭山月隄暫留三口爲洩

水之路其冬並塞之四年二月督漕侍郎吳桂芳言淮揚洪潦奔衝蓋緣海濱
汭港久堙入海止雲梯一徑致海擁橫沙河流汎溢而鹽安高寶不可收拾國
家轉運惟知急漕而不暇急民故朝廷設官亦主治河而不知治海請設水利
僉事一員專疏海道審度地利如草灣及老黃河皆可趨海何必專事雲梯哉
帝優詔報可桂芳復言黃水抵清河與淮合流經清江浦外河東至草灣又折
而西南過淮安新城外河轉入安東縣前直下雲梯關入海近年關口多壅河
流日淺惟草灣地低下黃河衝決駸駸欲奪安東入海以縣治所關屢決屢塞
去歲草灣迤東自決一口宜於決口之西開挑新口以迎埽灣之溜而於金城
至五港岸築堤束水語云救一路哭不當復計一家哭今淮揚鳳泗邳徐不啻
一路矣安東自衆流匯圍祇文廟縣署僅存椽瓦其勢垂陷不如委之以拯全
淮帝不欲棄安東而命開草灣如所請八月工竣長萬一千一百餘丈塞決口
二十二役夫四萬四千帝以海口開濬水患漸平賚桂芳等有差未幾河決韋
家樓又決沛縣縷水堤豐曹二縣長堤豐沛徐州睢寧金鄉魚臺單曹田廬漂

溺無算河流齧宿遷城帝從桂芳請遷縣治築土城避之於是御史陳世寶請復考黃河故道言河自桃源三義鎮歷清河縣北至大河口會淮入海運道自淮安天妃廟亂淮而下十里至大河口從三義鎮出口向桃源大河而去凡七十餘里是爲老黃河至嘉靖初三義鎮口淤而黃河改趨清河縣南與淮會自此運道不由大河口而徑由清河北上矣近者崔鎮屢決河勢漸趨故道若仍開三義鎮口引河入清河北或令出大河口與淮流合或從清河西別開一河引淮出河上游則運道無恐而淮泗之水不爲黃流所漲部覆允行桂芳言淮水向經清河會黃河趨海自去秋河決崔鎮清江正河淤澱淮口梗塞於是淮弱河強不能奪草灣入海之途而全淮南徙橫灌山陽高寶閘向來湖水不踰五尺堤僅七尺今堤加丈二而水更過之宜急護湖堤以殺水勢部議以爲必淮有所歸而後堤可保請令桂芳等熟計報可開河護堤二說未定而河復決崔鎮宿沛清桃兩岸多壞黃河日淤墊淮水爲河所迫徙而南時五年八月也希摯議塞決口東水歸漕桂芳欲衝刷成河以爲老黃河入海之路帝令急塞

決口而俟水勢稍定乃從桂芳言時給事中湯聘尹議導淮入江以避黃會桂芳言黃水向老黃河故道而去下奔如駛淮遂乘虛湧入清口故道淮揚水勢漸消部議行勘以河淮既合乃寢其議管理南河工部郎中施天麟言淮泗之水不下清口而下山陽從黃浦口入海浦口不能盡洩浸淫高寶邵伯諸湖而湖堤盡沒則以淮泗本不入湖而今入湖故也淮泗之入湖者又緣清口向未淤塞而今淤塞故也清口之淤塞者又緣黃河淤塞日高淮水不得不讓河而南徙也蓋淮水併力敵黃勝負或亦相半自高家堰廢壞而清口內通濟橋朱家等口淮水內灌於是淮泗之力分而黃河得以全力制其敵此清口所以獨淤於今歲也下流既淤則上流不得不決每歲糧艘以四五月畢運而堤以六月七月壞水發之時不能爲力水落之後方圖堵塞甫及春初運事又迫僅完堤工於河身無與河身不挑則來年益高上流之決必及於徐呂而不止於邳遷下流之涸將盡乎邳遷而不止於清桃須不惜一年糧運不惜數萬帑藏開挑正河寬限責成乃爲一勞永逸至高家堰朱家等口宜及時築塞使淮泗併力

足以敵黃則淮水之故道可復高寶之大患可減若興鹽海口堙塞亦宜大加
疏濬而湖堤多建減水大閘堤下多開支河要未有不先黃河而可以治淮亦
未有不疏通淮水而可以固堤者也事下河漕諸臣會議淮之出清口也以黃
水由老黃河奔注而老黃河久淤未幾復塞淮水仍漲溢給事中劉鉉請亟開
通海口而簡大臣會同河漕諸臣往治乃命桂芳爲工部尙書兼理河漕而裁
總河都御史官桂芳甫受命而卒六年夏潘季馴代時給事中李涑請多濬海
口以導衆水之歸給事中王道成則請塞崔鎮決口築桃宿長堤修理高家堰
開復老黃河並下河臣議季馴與督漕侍郎江一麟相度水勢言海口自雲梯
關四套以下闊七八里至十餘里深三四丈欲別議開鑿必須深闊相類方可
注放工力甚難且未至海口乾地猶可施工其將入海之地潮汐往來與舊口
等耳舊口皆係積沙人力雖不可濬水力自能衝刷海無可濬之理惟當導河
歸海則以水治水卽濬海之策也河亦非可以人力導惟當繕治堤防俾無旁
決則水由地中沙隨水去卽導河之策也頻年以來日以繕堤爲事顧卑薄而

不能支迫近而不能容雜以浮沙而不能久是以河決崔鎮水多北潰爲無隄也淮決高家堰黃浦口水多東潰隄弗固也不咎制之未備而咎築堤爲下策豈通論哉上流旣旁潰又岐下流而分之其趨雲梯入海口者譬猶強弩之末耳水勢益分則力益弱安能導積沙以注海故今日濬海急務必先塞決以導河尤當固堤以杜決而欲堤之不決必真土而勿雜浮沙高厚而勿惜鉅費讓遠而勿與爭地則堤乃可固也沿河堤固而崔鎮口塞則黃不旁決而衝漕力專高家堰築朱家口塞則淮不旁決而會黃力專淮黃旣合自有控海之勢又懼其分而力弱也必暫塞清江浦河而嚴司啓閉以防其內奔姑置草灣河而專復雲梯以還其故道仍接築淮安新城長堤以防其末流使黃淮力全涓滴悉趨於海則力強且專下流之積沙自去海不濬而闢河不挑而深所謂固堤卽以導河導河卽以濬海也又言黃水入徐歷邳宿桃清至清口會淮而東入海淮水自洛及鳳歷盱泗至清口會河而東入海此兩河故道也元漕江南粟則由揚州直北廟灣入海未嘗溯淮陳瑄始堤管家諸湖通淮爲運道慮淮水

漲溢則築高家堰堤以捍之起武家墩經大小澗至阜寧湖而淮不東侵又慮黃河漲溢則堤新城北以捍之起清江浦沿鉢池山柳浦灣迤東而黃不南侵其後堤岸漸傾水從高堰決入淮郡遂同魚鼈而當事者未考其故謂海口壅閉宜亟穿支渠詎知草灣一開西橋以上正河遂至淤阻夫新河闊二十餘丈深僅丈許較故道僅三十之一豈能受全河之水下流既壅上流自潰此崔鎮諸口所由決也今新河復塞故河漸已通流雖深闊未及原河十一而兩河全下沙隨水刷欲其全復河身不難也河身既復闊者七八里狹亦不下三四百丈滔滔東下何水不容匪惟不必別鑿他所卽草灣亦可置勿濬矣故爲今計惟修復陳瑄故蹟高築南北兩堤以斷兩河之內灌則淮揚昏墊可免塞黃浦口築寶應堤濬東關等淺修五閘復五壩則淮南運道無虞堅塞桃源以下崔鎮口諸決則全河可歸故道黃淮旣無旁決並驅入海則沙隨水刷海口自復而桃清淺阻又不足言此以水治水之法也若夫爬撈之說僅可行諸閘河前人屢試無功徒費工料於是條上六議曰塞決口以挽正河曰築堤防以杜潰

決曰復開壩以防外河曰創滾水壩以固隄岸曰止濬海工程以省糜費曰寢開老黃河之議以仍利涉帝悉從其請七年十月兩河工成賚季馴一麟銀幣而遣給事中尹瑾勘實八年春進季馴太子太保工部尙書廕一子一麟等遷擢有差是役也築高家堰堤六十餘里歸仁集堤四十餘里柳浦灣堤東西七十餘里塞崔鎮等決口百三十築徐睢邳宿桃清兩岸遙堤五萬六千餘丈碭豐大壩各一道徐沛豐碭縷堤百四十餘里建崔鎮徐昇季泰三義減水石壩四座遷通濟閘於甘羅城南淮揚閘堤壩無不修築費帑金五十六萬有奇其秋擢季馴南京兵部尙書季馴又請復新集至小浮橋故道給事中王道成河南巡撫周鑑等不可而止自桂芳季馴時罷總河不設其後但以督漕兼理河道高堰初築清口方暢流連數年河道無大患至十五年封邱偃師東明長垣屢被衝決大學士申時行言河所決地在三省守臣畫地分修易推委河道未大壞不必設都御史宜遣風力老成給事中一人行河乃命工科都給事中常居敬往居敬請修築大社集東至白茅集長堤百里從之初黃河由徐州小浮

橋入運其河深且近洪能刷洪以深河利於運道後漸徙沛縣飛雲橋及徐州大小溜溝至嘉靖末決邵家口出秦溝由濁河口入運河淺迫茶城茶城歲淤運道數害萬曆五年冬河復南趨出小浮橋故道未幾復堙潘季馴之塞崔鎮也厚築堤岸東水歸漕嗣後水發河臣輒加堤而河身日高矣於是督漕僉都御史楊一魁欲復黃河故道請自歸德以下丁家道口濬至石將軍廟令河仍自小浮橋出又言善治水者以疏不以障年來堤上加堤水高凌空不啻過潁濱河城郭決水可灌宜測河身深淺隨處挑濬而於黃河分流故道設減水石門以洩暴漲給事中王士性則請復老黃河故道大略言自徐而下河身日高而爲堤以束之堤與徐州城等束益急流益迅委全力於淮而淮不任故昔之黃淮合今黃強而淮益縮不復合矣黃強而一啓天妃通濟諸閘則灌運河如建瓴高寶一梗江南之運坐廢淮縮則退而侵泗爲祖陵計不得不建石堤護之堤增河益高根本大可虞也河至清河凡四折而後入海淮安高寶鹽興數百萬生靈之命託之一丸泥決則盡成魚蝦矣紛紛之議有欲增堤泗州者有

欲開顏家灌口永濟三河南鬻高家堰北築滾水壩者總不如復河故道爲一勞永逸之計也河故道由三義鎮達葉家衝與淮合在清河縣北別有濟運河在縣南蓋支河耳河強奪支河直趨縣南而自棄北流之道然河形固在也自桃源至瓦子灘凡九十里窪下不耕無室廬墳墓之礙雖開河費鉅而故道一復爲利無窮議皆未定居敬及御史喬璧星皆請復專設總理大臣乃復命潘季馴爲右都御史總督河道時帝從居敬言罷老黃河議而季馴抵官言新集故道故老言銅幫鐵底當開但歲儉費繁未能遽行又言黃水濁而強汶泗清且弱交會茶城伏秋黃水發則倒灌入漕沙停而淤勢所必至然黃水一落漕卽從之沙隨水去不濬自通縱有淺阻不過旬日往時建古洪內華二閘黃漲則閉閘以遏濁流黃退則啓閘以縱泉水近者居敬復增建鎮口閘去河愈近則吐納愈易但當嚴閘禁如清江浦三閘之法則河渠永賴矣帝方委季馴卽從其言罷故道之議未幾水患益甚十七年六月黃水暴漲決獸醫口月堤漫李景高口新堤衝入夏鎮內河壞田廬沒人民無算十月決口塞十八年大溢

徐州水積城中者逾年衆議遷城改河季馴濬魁山支河以通之起蘇伯湖至小河口積水乃消十九年九月泗州大水州治渰三尺居民沉溺十九浸及祖陵而山陽復河決江都邵伯又因湖水下注田廬浸傷工部尙書曾同亨上其事議者紛起乃命工科給事中張貞觀往泗州勘視水勢而從給事中楊其休言放季馴歸用舒應龍爲工部尙書總督河道二十年三月季馴將去條上辨惑者六事力言河不兩行新河不當開支渠不當濬又著書曰河防一覽大旨
在築堤障河束水歸漕築堰障淮逼淮注黃以清刷濁沙隨水去合則流急急則蕩滌而河深分則流緩緩則停滯而沙積上流旣急則海口自闢而無待於開其治堤之法有縷堤以束其流有遙堤以寬其勢有滾水壩以洩其怒法甚詳言甚辨然當是時水勢橫潰徐泗淮揚閒無歲不受患祖陵被水季馴謂當自消已而不驗於是季馴言訕而分黃導淮之議由此起矣貞觀抵泗州言臣謁祖陵見泗城如水上浮盂盂中之水復滿祖陵自神路至三橋丹墀無一不被水且高堰危如累卵又高寶隱禍也今欲洩淮當以闢海口積沙爲第一義

然洩淮不若殺黃而殺黃於淮流之既合不若殺於未合但殺於既合者與運無妨殺於未合者與運稍礙別標本究利害必當殺於未合之先至於廣入海之途則自鮑家口黃家營至魚溝金城左右地勢頗下似當因而利導之貞觀又會應龍及總漕陳于陞等言淮黃同趨者惟海而淮之由黃達海者惟清口自海沙開濬無期因而河身日高自河流倒灌無已因而清口日塞以致淮水上浸祖陵漫及高寶而興泰運堤亦衝決矣今議闢清口沙且分黃河之流於清口上流十里地去口不遠不至爲運道梗分於上復合於下則衝海之力專合必於草灣之下恐其復衝正河爲淮城患也塞鮑家口黃家營二決恐橫衝新河散溢無歸兩岸俱堤則東北清沐海安窪下地不虞潰決計費凡三十六萬有奇若海口之塞則潮汐莫窺其涯難施畚鍤惟淮黃合流東下河身條而漸深海口刷而漸闢亦事理之可必者帝悉從其請乃議於清口上流北岸開腰鋪支河達於草灣既而淮水自決張福堤直隸巡按彭應參言祖陵度可無虞且方東備倭警宜暫停河工部議令河臣熟計應龍貞觀言爲祖陵久遠計

支河實必不容已之工請候明春倭警寧息舉行其事遂寢二十一年春貞觀
報命議開歸徐達小河口以救徐邳之溢導濁河入小浮橋故道以紓鎮口之
患下總河會官集議未定五月大雨河決單縣黃堙口一由徐州出小浮橋一
由舊河達鎮口聞邳城陷水中高寶諸湖堤決口無算明年湖堤盡築塞而黃
水大漲清口沙墊淮水不能東下於是挾上源阜陵諸湖與山溪之水暴浸祖
陵泗城滄沒二十三年又決高郵中堤及高家堰高良澗而水患益急矣先是
御史陳邦科言固堤束水未收刷沙之利而反致衝決法當用濬其方有三冬
春水涸令沿河淺夫乘時撈淺則沙不停而去一也官民船往來船尾悉繫鈿
犁乘風搜滌則沙不寧而去二也做水磨水碓之法置爲木機乘水滾盪則沙
不留而去三也至淮必不可不棄黃故高堰斷不可棄湖溢必傷堤故周家橋
潰處斷不可開已棄之道必淤滿故老黃河草灣等處斷不可復疏下所司議
戶部郎中華存禮則請復黃河故道并濬草灣而是時腰鋪猶未開工部侍郎
沈節甫言復黃河未可輕議至諸策皆第補偏救弊而已宜概停罷乃召應龍

還工部時二十二年九月也既而給事中吳應明言先因黃淮遷徙無常設遙縷二堤束水歸漕及水過沙停河身日高徐邳以下居民盡在水底今清口外則黃流阻遏清口內則淤沙橫截強河橫灌上流約百里許淮水僅出沙上之浮流而瀦蓄於盱泗者遂爲祖陵患矣張貞觀所議腰鋪支河歸之草灣或從清河南岸別開小河至駱家營馬廠等地出會大河建閘啓閉一遇運淺卽行此河亦策之便者至治泗水則有議開老子山引淮水入江者宜置閘以時啓閉拆張福堤而提清口使河水無南向部議下河漕諸臣會勘直隸巡按牛應元因謁祖陵目擊河患繪圖以進因上疏言黃高淮壅起於嘉靖末年河臣鑿徐呂二洪巨石面沙日停河身日高潰決由此起當事者計無復之兩岸築長堤以束曰縷堤縷堤復決更於數里外築重堤以防曰遙堤雖歲決歲補而莫可誰何矣黃淮交會本自清河北二十里駱家營折而東至大河口會淮所稱老黃河是也陳瑄以其迂曲從駱家營開一支河爲見今河道而老黃河淤矣慶曆間復開草灣支河黃舍故道而趨以致清口交會之地二水相持淮不勝

黃則竄入各閘口淮安士民於各閘口築一土埂以防之嗣後黃淮暴漲水退沙停清口遂淤今稱門限沙是也當事者不思挑門限沙乃傍土埂築高堰橫亘六十里置全淮正流之口不事復將從旁入黃之張福口一併築堤塞之遂倒流而爲泗陵患矣前歲科臣貞觀議關門限沙裁張福堤其所重又在支河腰鋪之開總之全口淤沙未盡挑關卽腰鋪工成淮水未能出也況下流鮑王諸口已決難以施工豈若復黃河故道盡關清口淤沙之爲要乎且疏上流不若科臣應明所議就草灣下流濬諸決口俾由安東歸五港或於周家橋量爲疏通而急塞黃堍口挑蕭碭渠道濬符離淺阻至宿遷小河爲淮水入黃正路急宜挑關使有所歸應龍言張福堤已決百餘丈清口方挑沙而腰鋪之開尤不可廢工部侍郎沈思孝因言老黃河自三義鎮至葉家衝僅八千餘丈河形尙存宜亟開濬則河分爲二一從故道抵顏家河入海一從清口會淮患當自弭請遣風力科臣一人與河漕諸臣定畫一之計乃命禮科給事中張企程往勘而以水患累年迄無成畫遷延糜費罷應龍職爲民常居敬張貞觀彭應參

等皆譴責有差御史高舉請疏周家橋裁張福堤闢門限沙建滾水石壩於周家橋大小澗口武家墩綠楊溝上下而壩外濬河築岸使行地中改塘埂十二閘爲壩灌閘外十二河以闢入海之路濬芒稻河且多建濱江水閘以廣入江之途然海口日壅則河沙日積河身日高而淮亦不能安流有灌口者視諸口頗大而近日所決蔣家鮑家界家三口直與相射宜挑濬成河俾由此入海工部主事樊兆程亦議闢海口而言舊海口決不可濬當自鮑家營至五港口挑濬成河令從灌口入海俱下工部請并委企程勘議是時總河工部尙書楊一魁被論乞罷因言清口宜濬黃河故道宜復高堰不必修石堤不必砌減水閘壩不必用帝不允辭而詔以盡心任事御史夏之臣則言海口沙不可劈草灣河不必濬腰鋪新河四十里不必開雲梯關不必闢惟當急開高堰以救祖陵且言歷年以來高良澗土堤每遇伏秋卽衝決大澗口石堤每遇洶湧卽崩潰是高堰在爲高寶之利小而高堰決則爲高寶之害大也孰若明議而明開之使知趨避乎給事中黃運泰則又言黃河下流未洩而遽開高堰周橋以洩淮

水則淮流南下黃必乘之高寶閘盡爲沼而運道月河必衝決矣不如濬五港口達灌口門以入於海之爲得也詔并行勘議企程乃上言前此河不爲陵患自隆慶末年高寶淮揚告急當事狃於目前清口旣淤又築高堰以遏之堤張福以束之障全淮之水與黃角勝不虞其勢不敵也迨後螿石加築堙塞愈堅舉七十二溪之水匯於泗者僅留數丈一口出之出者什一停者什九河身日高流日壅淮日益不得出而濬蓄日益深安得不倒流旁溢爲陵泗患乎今議疏淮以安陵疏黃以導淮者言人人殊而謂高堰當決者臣以爲屏翰淮揚殆不可少莫若於其南五十里開周家橋注草子湖大加開濬一由金家灣入芒稻河注之江一由子嬰溝入廣洋湖達之海則淮水上流半有宣洩矣於其北十五里開武家墩注永濟河由窰灣閘出口直達涇河從射陽湖入海則淮水下流半有歸宿矣此急救祖陵第一義也會是時祖陵積水稍退一魁以聞帝大悅仍諭諸臣急協議宣洩於是企程一魁共議欲分殺黃流以縱淮別疏海口以導黃而督漕尙書褚鈇則以江北歲稔民不堪大役欲先洩淮而徐議分

黃御史應元折衷其說言導淮勢便而功易分黃功大而利遠顧河臣所請亦第六十八萬金國家亦何靳於此御史陳燿嘗令寶應慮周家橋既開則以高郵邵伯爲壑運道民產鹽場交受其害上疏爭之語甚激大旨分黃爲先而淮不必深治且欲多開入海之路令高寶諸湖之水皆東而後周家橋武家墩之水可注而淮安知府馬化龍復進分黃五難之說潁州兵備道李弘道又謂宜開高堰缺遂據以上聞給事中林熙春駁之言淮猶昔日之淮而河非昔日之河先是河身未高而淮尙安流今則河身既高而淮受倒灌此導淮固以爲淮分黃亦以爲淮工部乃覆奏云先議開腰鋪支河以分黃流以倭倣災傷停寢遂貽今日之患今黃家壩分黃之工若復沮格淮壅爲害誰職其咎請令治河諸臣導淮分黃亟行興舉報可二十四年八月一魁興工未竣復條上分淮導黃事宜十事十月河工告成直隸巡按御史蔣春芳以聞復條上善後事宜十六事乃賞賚一魁等有差是役也役夫二十萬開桃源黃河壩新河起黃家嘴至安東五港灌口長三百餘里分洩黃水入海以抑黃強闢清口沙七里建武

家墩高良澗周家橋石閘洩淮水三道入海且引其支流入江於是泗陵水患平而淮揚安矣然是時一魁專力桃清淮泗閒而上流單縣黃堍口之決以爲不必塞鈇及春芳皆請塞之給事中李應策言漕臣主運河臣主工各自爲見宜再令析議一魁言黃堍口一支由虞城夏邑接碭山蕭縣宿州至宿遷出白洋河一小支分蕭縣兩河口出徐州小浮橋相距不滿四十里當疏濬與正河會更通鎮口閘裏湖之水與小浮橋二水會則黃堍口不必塞而運道無滯矣從之於是議濬小浮橋沂河口小河口以濟徐邳運道以洩碭蕭漫流培歸仁堤以護陵寢是時徐邳復見清泗運道不利鈇終以爲憂二十五年正月復極言黃堍口不塞則全河南徙害且立見議者亦多恐下齧歸仁爲二陵患三月小浮橋等口工垂竣一魁言運道通利河徙不相妨已有明驗惟議者以祖陵爲慮請徵往事折之洪武二十四年河決原武東南至壽州入淮永樂九年河北入魚臺未幾復南決由渦河經懷遠入淮時兩河合流歷鳳泗以出清口未聞爲祖陵患正統十三年河北衝張秋景泰中徐有貞塞之復由渦河入淮弘

治二年河又北衝白昂劉大夏塞之復南流一由中牟至潁壽一由亳州至渦河入淮一由宿遷小河口會泗全河大勢縱橫潁亳鳳泗間下溢符離睢宿未聞爲祖陵慮亦不聞堤及歸仁也正德三年後河漸北徙由小浮橋飛雲橋穀亭三道入漕盡趨徐邳出二洪運道雖濟而泛溢實甚嘉靖十一年朱裳始有渦河一支中經鳳陽祖陵未敢輕舉之說然當時猶時濬祥符之董益口寧陵之五里鋪滎澤之孫家渡蘭陽之趙皮寨又或決睢州之地邱店界牌口野鷄岡寧陵之楊村鋪俱入舊河從亳鳳入淮南流未絕亦何嘗爲祖陵患嘉靖二十五年後南流故道始盡塞或由秦溝入漕或由濁河入漕五十年來全河盡出徐邳奪泗入淮而當事者方認客作主日築垣而窘之以致河流日壅淮不敵黃退而內瀦遂貽盱泗祖陵之患此實由內水之停壅不由外水之衝射也萬曆七年潘季馴始慮黃流倒灌小河白洋等口挾諸河水衝射祖陵乃作歸仁堤爲保障計復張大其說謂祖陵命脈全賴此堤習聞其說者遂疑黃堙之決下齧歸仁不知黃堙一決下流易洩必無上灌之虞況今小河不日竣工引

河復歸故道去歸仁益遠奚煩過計爲報可一魁旣開小浮橋築義安山濬小河口引武沂泉濟運及是年四月河復大決黃堙口溢夏邑永城由宿州符離橋出宿遷新河口入大河其半由徐州入舊河濟運上源水枯而義安東水橫壩復衝二十餘丈小浮橋水脈微細二洪告涸運道阻澀一魁因議挑黃堙口迤上掃灣淤嘴二處且大挑其下李吉口北下濁河救小浮橋上流數十里之涸復上言黃河南旋至韓家道盤岔河丁家莊俱岸闊百丈深踰二丈乃銅幫鐵底故道也至劉家窪始強半南流得山西坡永涸湖以爲壑出溪口入符離河亦故道也惟徐邳運道淺涸所以首議開小浮橋再加挑闢必大爲運道之利乃欲自黃堙挽回全河必須挑四百里淤高之河身築三百里南岸之長堤不惟所費不貲竊恐後患無已御史楊光訓等亦議挑掃灣直渠展濟濁河及築山西坡歸仁堤與一魁合獨鈇異議帝命從一魁言一魁復言歸仁在西北泗州在東南相距百九十里中隔重岡疊嶂且歸仁之北有白洋河朱家溝周家溝胡家溝小河口洩入運河勢如建瓴卽無歸仁祖陵無足慮濁河淤墊高

出地上曹單間闊一二百丈深二三丈尙不免橫流徐邳間僅百丈深止丈餘徐西有淺至二三尺者而夏永韓家道口至符離河闊深視曹單避高就下水之本性河流所棄自古難復且運河本藉山東諸泉不資黃水惟當倣正統間二洪南北口建閘之制於鎮口之下大浮橋之上呂梁之下洪邳州之沙坊各建石閘節宣汶泗而以小浮橋沂河口二水助之更於鎮口西築壩截黃開唐家口而注之龍溝會小浮橋入運以杜灌淤鎮口之害實萬全計也報可二十六年春從楊光訓等議撤缺命一魁兼管漕運六月召一魁掌部事命劉東星爲工部侍郎總理河漕二十七年春東星上言河自商虞而下由丁家道口抵韓家道口趙家圈口將軍廟兩河口出小浮橋下二洪乃賈魯故道也自元及我朝行之甚利嘉靖三十七年北徙濁河而此河遂淤潘季馴議復開之以工費浩繁而止今河東決黃堦由韓家道口至趙家圈百餘里衝刷成河卽季馴議復之故道也由趙家圈至兩河口直接三仙臺新渠長僅四十里募夫五萬濬之踰月當竣而大挑運河小挑濁河俱可節省惟李吉口故道嘗挑復淤去

冬已挑數里前功難棄然至鎮口三百里而遙不若趙家圈至兩河口四十里而近況大浮橋已建閘蓄汶泗之水則鎮口濟運亦無藉黃流報可六月功成加東星工部尙書一魁及餘官賞賚有差初給事中楊廷蘭因黃堦之決請開洳河給事中楊應文亦主其說既而直隸巡按御史俱祺復言之東星既開趙家圈復採衆說鑿洳河以地多沙石工未就而東星病河旣南徙李吉口淤澱日高北流遂絕而趙家圈亦日就淤塞徐邳閒三百里河水尺餘糧艘阻塞二十九年秋工科給事中張問達疏論之會開歸大水河漲商邱決蕭家口全河盡南注河身變爲平沙商賈舟膠沙上南岸蒙牆寺忽徙置北岸商虞多被淹沒河勢盡趨東南而黃堦斷流河南巡撫曾如春以聞曰此河徙非決也問達復言蕭家口在黃堦上流未有商舟不能行於蕭家口而能行於黃堦以東者運艘大可慮帝從其言方命東星勘議而東星卒矣問達復言運道之壞一因黃堦口之決不早杜塞更因并力洳河以致趙家圈淤塞斷流河身日高河水日淺而蕭家口遂決全河奔潰入淮勢及陵寢東星已逝宜急補河臣早定長

策大學士沈一貫給事中桂有根皆趣簡河臣御史高舉獻三策請濬黃堦口以下舊河引黃水注之東遂塞黃堦口而遏其南俟舊河衝刷深則并塞新決之口其二則請開洳河及膠萊河而言河漕不宜并於一人當選擇分任其事江北巡按御史吳崇禮則請自蒙牆寺西北黃河灣曲之所開濬直河引水東流且濬李吉口至堅城集淤道三十餘里而盡塞黃堦以南決口使河流盡歸正漕工部尙書一魁酌舉崇禮之議以開直河塞黃堦口濬淤道爲正策而以洳河爲旁策膠萊爲備策帝命急挑舊河塞決口且兼挑洳河以備用下山東撫按勘視膠萊河三十年春一魁覆河撫如春疏言黃河勢趨邳宿請築汴堤自歸德至靈虹以障南徙且疏小河口使黃流盡歸之則瀾漫自消祖陵可無患帝嘉納之已而言者再疏攻一魁帝以一魁不塞黃堦口致衝祖陵斥爲民復用崇禮議分設河漕二臣命如春爲工部侍郎總理河道如春議開虞城王家口挽全河東歸須費六十萬三十一年春山東巡撫黃克纘言王家口爲蒙牆上源上流旣達則下流不可旁洩宜遂塞蒙牆口從之時蒙牆決口廣八十

餘丈如春所開新河未及其半塞而注之慮不任受有獻策者言河流既回勢若雷霆藉其勢衝之淺者可深也如春遂令放水水皆泥沙流少緩旋淤夏四月水暴漲衝魚單豐沛閒如春以憂卒乃命李化龍爲工部侍郎代其任給事中宋一韓言黃河故道已復陵運無虞決口懼難塞宜深濬堅城以上淺阻而增築徐邳兩岸使下流有所容則舊河可塞給事中孟成己言塞舊河急而濬新河尤急化龍甫至河大決單縣蘇家莊及曹縣縷堤又決沛縣四鋪口太行堤灌昭陽湖入夏鎮橫衝運道化龍議開沭河屬之邳州直河以避河險給事中侯慶遠因言沭河成則他工可徐圖第毋縱河入淮淮利則洪澤水減而陵自安矣三十二年正月部覆化龍疏大略言河自歸德而下合運入海其路有三由蘭陽道考城至李吉口過堅城集入六座樓出茶城而向徐邳是名濁河爲中路由曹單經豐沛出飛雲橋汎昭陽湖入龍塘出秦溝而向徐邳是名銀河爲北路由潘家口過司家道口至何家堤經符離道睢寧入宿遷出小河口入運是名符離河爲南路南路近陵北路近運惟中路既遠於陵且可濟運前

河臣興役未竣而河形尚在因奏開洳有六善帝從其議工部尚書姚繼可言
黃河衝徙河臣議於堅城集以上開渠引河使下流疏通復分六座樓苑家樓
二路殺其水勢既可移豐沛之患又不至沼碭山之城開洳分黃兩工并舉乞
速發帑以濟允之八月化龍奏分水河成事具洳河志中加化龍太子少保兵
部尚書會化龍丁艱候代命曹時聘爲工部侍郎總理河道是秋河決豐縣由
昭陽湖穿李家港口出鎮口上灌南陽而單縣決口復潰魚臺濟寧閒平地成
湖三十三年春化龍言豐之失由巡守不嚴單之失由下埽不早而皆由蘇家
莊之決南直山東相推諉請各罰防河守臣至年來緩堤防而急挑濬堤壞水
溢不咎守堤之不力惟委濬河之不深夫河北岸自曹縣以下無入張秋之路
南岸自虞城以下無入淮之路惟由徐邳達鎮口爲運道故河北決曹鄆豐沛
閒則由昭陽湖出李家口而運道溢南決虞夏徐邳閒則由小河口及白洋河
而運道涸今洳河旣成起直河至夏鎮與黃河隔絕山東直隸閒河不能制運
道之命獨朱旺口以上決單則單沼決曹則曹魚及豐沛徐邳魚碭皆命懸一

線堤防何可緩也至中州荊隆口銅瓦廂皆入張秋之路孫家渡野鷄岡蒙牆寺皆入淮之路一不守則北壞運南犯陵其害甚大請西自開封東至徐邳無不守之地上自司道下至府縣無不守之人庶幾可息河患乃敕時聘申飭焉其秋時聘言自蘇莊一決全河北注者三年初泛豐沛繼沼單魚陳燦之塞不成南陽之堤盡壞今且上灌全濟旁侵運道矣臣親詣曹單上視王家口新築之壩下視朱旺口北潰之流知河之大可憂者三而機之不可失者二河決行堤泛溢平地昭陽日墊下流日淤水出李家口者日漸微緩勢不得不退而上溢溢於南則孫家渡野鷄岡皆入淮故道毋謂蒙牆已塞而無憂於陵溢於北則芝麻莊荊隆口皆入張秋故道毋謂洳役已成而無憂於運且南之夏商北之曹濮其地益卑其禍益烈其挽回益不易毋謂災止魚濟而無憂於民顧自王家口以達朱旺新導之河在焉疏其下流以出小浮橋則三百里長河暢流機可乘者一自徐而下清黃並行沙隨水刷此數十年所未有因而導水歸徐容受有地機可乘者二臣與諸臣熟計河之中路有南北二支北出濁河嘗再

疏再壅惟南出小浮橋地形卑下其勢甚順度長三萬丈有奇估銀八十萬兩
公儲虛耗乞多方處給疏上留中時聘乃大批朱旺口十一月興工用夫五十
萬三十四年四月工成自朱旺達小浮橋延袤百七十里渠廣堤厚河歸故道
六月河決蕭縣郭煖樓人字口北支至茶城鎮口三十五年決單縣三十九年
六月決徐州狼矢溝四十年九月決徐州三山衝縷堤二百八十丈遙堤百七
十餘丈黎林鋪以下二十里正河悉爲平陸邳睢河水耗竭總河都御史劉士
忠開韓家壩外小渠引水由是壩以東始通舟楫四十二年決靈璧陳鋪四十
四年五月復決狼矢溝由蛤鰻周柳諸湖入沭河出直口復與黃會六月決開
封陶家店張家灣由會城大堤下陳留入亳州渦河四十七年九月決陽武脾
沙堤由封邱曹單至考城復入舊河時朝政日弛河臣奏報多不省四十二年
劉士忠卒總河閱三年不補四十六年閏四月始命工部侍郎王佐督河道河
防日以廢壞當事者不能有爲天啓元年河決靈璧雙溝黃鋪由永姬湖出白
洋小河口仍與黃會故道湮涸總河侍郎陳道亨役夫築塞時淮安霖雨連旬

黃淮暴漲數尺而山陽裏外河及清河決口匯成巨浸水灌淮城民蟻城以居舟行街市久之始塞三年決徐州青田大龍口徐邳靈睢河並淤呂梁城南隅陷沙高平地丈許雙溝決口亦滿上下百五十里悉成平陸四年六月決徐州魁山堤東北灌州城城中水深一丈三尺一自南門至雲龍山西北大安橋入石狗湖一由舊支河南流至鄧二莊歷租溝東南以達小河出白洋仍與黃會徐民苦滄溺議集貲遷城給事中陸文獻上徐城不可遷六議而勢不得已遂遷州治於雲龍河事置不講矣六年七月河決淮安逆入駱馬湖灌邳宿崇禎二年春河決曹縣十四鋪口四月決睢寧至七月中城盡圯總河侍郎李若星請遷城避之而開邳州壩洩水入故道且塞曹家口匙頭灣逼水北注以減睢寧之患從之四年夏河決原武湖村鋪又決封邱荊隆口敗曹縣塔兒灣大行堤六月黃淮交漲海口壅塞河決建義諸口下灌興化鹽城水深二丈村落盡漂沒遂巡踰年始議築塞興工未幾伏秋水發黃淮奔注興鹽爲壑而海潮復逆衝壞范公堤軍民及商竈戶死者無算少壯轉徙丐江儀通泰閩盜賊千百

嘯聚至六年鹽城民徐瑞等言其狀帝憫之命議罰河曹官而是時總河朱光祚方議開高堰三閘淮揚在朝者合疏言建義諸口未塞民田盡沉水底三閘一開高寶諸邑蕩爲湖海而漕糧鹽課皆害矣高堰建閘始於萬曆二十三年未幾全塞今高堰日壞方當急議修築可輕言開濬乎帝是其言事遂寢又從御史吳振纓請修宿寧上下西北舊堤以捍歸仁七年二月建義決口工成賜督漕尙書楊一鵬總河尙書劉榮嗣銀幣八年九月榮嗣得罪初榮嗣以駱馬湖運道潰淤創挽河之議起宿遷至徐州別鑿新河分黃水注其中以通漕運計工二百餘里金錢五十萬而其所鑿邳州上下悉黃河故道濬尺許其下皆沙挑掘成河經宿沙落河坎復平如此者數四迨引黃水入其中波流迅急沙隨水下率淤淺不可以舟及漕舟將至而駱馬湖之潰決適平舟人皆不願由新河榮嗣自往督之欲繩以軍法有入者輒苦淤淺弁卒多怨巡漕御史倪于義劾其欺罔誤工南京給事中曹景參復重劾之逮問坐贓父子皆瘐死郎中胡璉分工獨多亦坐死其後駱馬湖復潰舟行新河無不思榮嗣功者當是時

河患日棘而帝又重法懲下李若星以修濬不力罷官朱光祚以建義蘇嘴決口逮繫六年之中河臣三易給事中王家彥嘗切言之光祚亦竟瘐死而繼榮嗣者周鼎修洳利運頗有功在事五年竟坐漕舟阻淺用故決河防例遣戍煙瘴給事中沈允培刑部侍郎惠世揚總河侍郎張國維各疏請寬之乃獲宥免云十五年流賊圍開封久守臣謀引黃河灌之賊偵知預爲備乘水漲令其黨決河灌城民盡溺死總河侍郎張國維方奉詔赴京奏其狀山東巡撫王永吉上言黃河決汴城直走睢陽東南注鄆陵鹿邑必害亳泗侵祖陵而邳宿運河必涸帝令總河侍郎黃希憲急往捍禦希憲以身居濟寧不能攝汴請特設重臣督理命工部侍郎周堪賡督修汴河十六年二月堪賡上言河之決口有二一爲朱家寨寬二里許居河下流水面寬而水勢緩一爲馬家口寬一里餘居河上流水勢猛深不可測兩口相距三十里至汴堤之外合爲一流決一大口直衝汴城以去而河之故道則涸爲平地怒濤千頃工力難施必廣濬舊渠遠數十里分殺水勢然後畚鍤可措顧築濬並舉需夫三萬河北荒旱克西兵火

竭力以供不滿萬人河南萬死一生之餘未審能應募否是不得不借助於撫鎮之兵也乃敕兵部速議而令堪賡刻期興工至四月塞朱家寨決口修堤四百餘丈馬家口工未就忽衝東岸諸掃盡漂沒堪賡請停東岸而專事西岸帝令急竣工六月堪賡言馬家決口百二十丈兩岸皆築四之一中間七十餘丈水深流急難以措手請俟霜降後興工已而言五月伏水大漲故道沙灘壅涸者刷深數丈河之大勢盡歸於東運道已通陵園無恙疏甫上決口再潰帝趣鳩工未奏績而明亡

明史卷八十四

明史卷八十五

志第六十三

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉等奉

敕修

河渠三

運河上

明成祖肇建北京轉漕東南水陸兼輓仍元人之舊參用海運逮會通河開海陸並罷南極江口北盡大通橋運道三千餘里綜而計之自昌平神山泉諸水匯貫都城過大通橋東至通州入白河者大通河也自通州而南至直沽會衛河入海者白河也自臨清而北至直沽會白河入海者衛水也自汶上南旺分流北經張秋至臨清會衛河南至濟寧天井闡會泗沂沭三水者汶水也自濟寧出天井闡與汶合流至南陽新河舊出茶城會黃沁後出夏鎮循洳河達直口入黃濟運者泗沭小沂河及山東泉水也自茶城秦溝南歷徐呂浮邳會大沂河至清河縣入淮後從直河口抵清口者黃河水也自清口而南至於瓜儀

者淮揚諸湖水也過此則長江矣長江以南則松蘇浙江運道也淮揚至京口
 以南之河通謂之轉運河而由瓜儀達淮安者又謂之南河由黃河達豐沛曰
 中河由山東達天津曰北河由天津達張家灣曰通濟河而總名曰漕河其踰
 京師而東若薊州西北若昌平皆嘗有河通轉漕餉軍漕河之別曰白漕衛漕
 閘漕河漕湖漕江漕浙漕因地為號流俗所通稱也淮揚諸水所匯徐兗河流
 所經疏濬決排繫人力是繫故閘河湖於轉漕尤急閘漕者即會通河北至臨
 清與衛河會南出茶城口與黃河會資汶洸泗水及山東泉源泉源之派有五
 曰分水者汶水派也泉百四十有五曰天井者濟河派也泉九十有六曰魯橋
 者泗河派也泉二十有六曰沙河者新河派也泉二十有八曰邳州者沂河派
 也泉十有六諸泉所匯為湖其浸十五曰南旺東西二湖周百五十餘里運渠
 貫其中北曰馬躡南曰蜀山曰蘇魯又南曰馬場又南八十里曰南陽亦曰獨
 山周七十餘里北曰安山周八十三里南曰大小昭陽大湖袤十八里小湖殺
 三之一周八十餘里由馬家橋留城閘而南曰武家曰赤山曰微山曰呂孟曰

張王諸湖連注八十里引薛河由地浜溝出會於赤龍潭並趨茶城自南旺分水北至臨清三百里地降九十尺爲閘二十有一南至鎮口三百九十里地降百十有六尺爲閘二十有七其外又有積水進水減水平水之閘五十有四又爲壩二十有一所以防運河之洩佐閘以爲用者也其後開洳河二百六十里爲閘十一爲壩四運舟不出鎮口與黃河會於董溝河漕者卽黃河上自茶城與會通河會下至清口與淮河會其道有三中路曰濁河北路曰銀河南路曰符離河南近陵北近運惟中路去陵遠於運有濟而河流遷徙不常上流苦潰下流苦淤運道自南而北出清口經桃宿溯二洪入鎮口陟險五百餘里自二洪以上河與漕不相涉也至洳河開而二洪避董溝闢而直河淤運道之資河者二百六十里而止董溝以上河又無病於漕也湖漕者由淮安抵揚州三百七十里地卑積水匯爲澤國山陽則有管家射陽寶應則有白馬汜光高郵則有石白璧社武安邵伯諸湖仰受上流之水傍接諸山之源巨浸連互由五塘以達於江慮淮東侵築高家堰拒其上流築王簡張福二堤禦其分洩慮淮侵

而漕敗開淮安永濟高郵康濟寶應弘濟三月河以通舟至揚子灣東則分二道一由儀真通江口以漕上江湖廣江西一由瓜洲通西江嘴以漕下江兩浙本非河道專取諸湖之水故曰湖漕太祖初起大軍北伐開蹋場口耐牢坡通漕以餉梁晉定都應天運道通利江西湖廣之粟浮江直下浙西吳中之粟由轉運河鳳泗之粟浮淮河南山東之粟下黃河嘗由開封運粟沂河達渭以給陝西用海運以餉遼卒有事於西北者甚鮮淮揚之間築高郵湖堤二十餘里開寶應倚湖直渠四十里築堤護之他小修築無大利害也永樂四年成祖命平江伯陳瑄督轉運一仍由海而一則浮淮入河至揚武陸輓百七十里抵衛輝浮於衛所謂陸海兼運者也海運多險陸輓亦艱九年二月乃用濟寧州同知潘叔正言命尙書宋禮侍郎金純都督周長濬會通河會通河者元轉漕故道也元末已廢不用洪武二十四年河決原武漫安山湖而東會通盡淤至是復之由濟寧至臨清三百八十五里引汶泗入其中泗出泗水陪尾山四泉並發西流至兗州城東合於沂汶河有二小汶河出新泰宮山下大汶河出泰安

仙臺嶺南又出萊蕪原山陰及寨子村俱至靜豐鎮合流遶徂徠山陽而小汶河來會經寧陽北峒城西南流百餘里至汶上其支流曰洸河出峒城西南流三十里會寧陽諸泉經濟寧東與泗合元初畢輔國始於峒城左汶水陰作斗門導汶入洸至元中又分流北入濟由壽張至臨清通漳御入海南旺者南北之脊也自左而南距濟寧九十里合沂泗以濟自右而北距臨清三百餘里無他水獨賴汶禮用汶上老人白英策築壩東平之戴村遏汶使無入洸而盡出南旺南北置閘三十八又開新河自汶上袁家口左徙五十里至壽張之沙灣以接舊河其秋禮還又請疏東平東境沙河淤沙三里築堰障之合馬常泊之流入會通濟運又於汶上東平濟寧沛縣並湖地設水櫃陡門在漕河西者曰水櫃東者曰陡門櫃以蓄泉門以洩漲純復濬賈魯河故道引黃水至塌場口會汶經徐呂入淮運道以定其後宣宗時嘗發軍民十二萬濬濟寧以北自長溝至棗林閘百二十里置閘諸淺濬湖塘以引山泉正統時濬滕沛淤河又於濟寧滕三州縣疏泉置閘易金口堰土壩爲石蓄水以資會通景帝時增置濟

寧抵臨清減水閘天順時拓臨清舊閘移五十丈憲宗時築汶上濟寧決堤百餘里增南旺上下及安山三閘命工部侍郎杜謙勤治汶泗洸諸泉武宗時增置汶上袁家口及寺前鋪石閘濬南旺淤八十里而閘漕之治詳惟河決則挾漕而去爲大害陳瑄之督運也於湖廣江西造平底淺船三千艘二省及江浙之米皆由江以入至淮安新城盤五壩過淮仁義二壩在東門外東北禮智信三壩在西門外西北皆自城南引水抵壩口其外卽淮河清江浦者直淮城西永樂二年嘗一修閘其口淤塞則漕船由二壩官民商船由三壩入淮輓輸甚勞苦瑄訪之故老言淮城西管家湖西北距淮河鴨陳口僅二十里與清江口相值宜鑿爲河引湖水通漕宋喬維嶽所開沙河舊渠也瑄乃鑿清江浦導水由管家湖入鴨陳口達淮十三年五月工成緣西湖築堤互十里以引舟淮口置四閘曰移風清江福興新莊以時啓閉嚴其禁並濬儀真瓜洲河以通江湖鑿呂梁百步二洪石以平水勢開泰州白塔河以達大江築高郵河堤堤內鑿渠四十里久之復置呂梁石閘並築寶應汜光白馬諸湖堤堤皆置涵洞互相

灌注是時淮上徐州濟寧臨清德州皆建倉轉輸濱河置舍五百六十八所舍置淺夫水澀舟膠俾之導行增置淺船三千餘艘設徐沛沽頭金溝山東穀亭魯橋等閘自是漕運直達通州而海陸運俱廢宣德六年用御史白圭言濬金龍口引河水達徐州以便漕末年至英宗初再濬並及鳳池口水徐呂二洪西小河而會通安流自永宣至正統間凡數十載至十三年河決滎陽東衝張秋潰沙灣運道始壞命廷臣塞之景泰三年五月堤工乃完未匝月而北馬頭復決掣漕流以東清河訓導唐學成言河決沙灣臨清告涸地卑堤薄黃河勢急故甫完堤而復決也臨清至沙灣十二閘有水之日其勢甚陡請於臨清以南濬月河通舟直抵沙灣不復由閘則水勢緩而漕運通矣帝卽命學成與山東巡撫洪英相度工部侍郎趙榮則言沙灣抵張秋岸薄故數決請於決處置減水石壩使東入鹽河則運河之水可蓄然後厚堤岸填決口庶無後患明年四月決口方畢工而減水壩及南分水墩先敗已復盡衝墩岸橋梁決北馬頭掣漕水入鹽河運舟悉阻教諭彭墳請立閘以制水勢開河以分上流御史練綱

上其策詔下尙書石璞璞乃鑿河三里以避決口上下與運河通是歲漕舟不前者命漕運總兵官徐恭姑輸東昌濟寧倉及明年運河膠淺如故恭與都御史王竑言漕舟蟻聚臨清上下請亟敕都御史徐有貞築塞沙灣決河有貞不可而獻上三策請置水閘開分水河挑運河六年三月詔羣臣集議方略工部尙書江淵等請用官軍五萬以濬運有貞恐役軍費重請復陳瑄舊制置撈淺夫用沿河州縣民免其役五月濬漕工竣七月沙灣決口工亦竣會通復安都御史陳泰一濬淮揚漕河築口置壩黃河嘗灌新莊聞至清江浦三十餘里淤淺阻漕稍稍濬治卽復其舊英宗初命官督漕分濟寧南北爲二侍郎鄭辰治其南副都御史賈諒治其北成化七年又因廷議分漕河沛縣以南德州以北及山東爲三道各委曹郎及監司專理且請簡風力大臣總理其事始命侍郎王恕爲總河二十一年敕工部侍郎杜謙浚運道自通州至淮揚會山東河南撫按相度經理弘治二年河復決張秋衝會通河命戶部侍郎白昂相治昂奏金龍口決口已淤河並爲一大支由祥符合沁下徐州而去其闕河道淺隘宜

於所經七縣築堤岸以衛張秋下工部議從其請昂又以漕船經高郵蠶社湖多溺請於堤東開復河四十里以通舟越四年河復決數道入運河壞張秋東堤奪汶水入海漕流絕時工部侍郎陳政總理河道集夫十五萬治未效而卒七年春副都御史劉大夏奉敕往治決河夏半漕舟鱗集乃先自決口西岸鑿月河以通漕經營二年張秋決口就塞復築黃陵岡上流於是河復南下運道無阻乃改張秋曰安平鎮建廟賜額曰顯惠神祠命大學士王鏊紀其事勒於石而白昂所開高郵復河亦成賜名康濟其西岸以石甃之又甃高郵堤自杭家閘至張家鎮凡三十里高郵堤者洪武時所築也陳瑄因舊增築延及寶應土人相沿謂之老堤正統三年易土以石成化時遣官築重堤於高郵邵伯寶應白馬四湖老堤之東而王恕爲總河修淮安以南諸決堤且濬淮揚漕河重湖墾民盜決漑田之罰造閘碇以儲湖水及大夏塞張秋而昂又開康濟漕河上下無大患者二十餘年十六年巡撫徐源言濟寧地最高必引上源泲水以濟其口在堽城石瀨之上元時治閘作堰使水盡入南旺分濟南北運成化間

易土以石夫土堰之利水小則遏以入泲水大則閉閘以防沙壅聽其漫堰西流自石堰成水遂橫溢石堰既壞民田亦衝泲河沙塞雖有閘門壓不能啓乞毀石復土疏泲口壅塞以至濟寧而築壩城迤西春城口子決岸帝命侍郎李鎡往勘言壩城石堰一可遏淤沙不爲南旺河之害一可殺水勢不慮戴村壩之衝不宜毀近堰積沙宜濬壩城稍東有元時舊閘引泲水入濟寧下接徐呂漕河東平州戴村則汶水入海故道也自永樂初橫築一壩遏汶入南旺湖漕河始通今自分水龍王廟至天井閘九十里水高三丈有奇若泲河更濬而深則汶流盡向濟寧而南臨清河道必涸泲口不可濬壩城口至柳泉九十里無關運道可弗事柳泉至濟寧汶泗諸水會流處宜疏者二十餘里春城口外障汶水內防民田堤卑岸薄宜與戴村壩並修築從之正德四年十月河決沛縣飛雲橋入運尋塞世宗之初河數壞漕嘉靖六年光祿少卿黃綰論泉源之利言漕河泉源皆發山東南旺馬場樊村安山諸湖泉水所鍾亟宜修濬且引他泉並蓄則漕不竭南旺馬場堤外孫村地窪若儲爲湖改作漕道尤可免濟寧

高原淺澀之苦帝命總河侍郎章拯議而拯以黃水入運運船阻沛上方爲御史吳仲所劾拯言河塞難遽通惟金溝口迤北新衝一渠可令運船由此入昭陽湖出沙河板橋其先阻淺者則西歷雞塚寺出廟道北口通行下部併議未決給事中張嵩言昭陽湖地庫河勢高引河灌湖必致瀰漫使湖道復阻請罷拯別推大臣部議如嵩言拯再疏自劾乞罷不許卒引運船道湖中其冬詔拯還京別敘而命擇大臣督理諸大臣多進治河議詹事霍韜謂前議役山東河南丁夫數萬疏濬淤沙以通運然沙隨水下旋濬旋淤今運舟由昭陽湖入雞鳴臺至沙河迂迴不過百里若沿湖築堤浚爲小河河口爲閘以待蓄洩水溢可避風濤水涸易爲疏濬三月而土堤成一年而石堤成用力少取效速黃河愈溢運道愈利較之役丁夫以浚淤土勞逸大不侔也尙書李承勳謂於昭陽湖左別開一河引諸泉爲運道自留城沙河爲尤便與都御史胡世寧議合七年正月總河都御史盛應期奏如世寧策請於昭陽湖東鑿新河自江家口南出留城口長百四十里刻期六月畢土工未半而應期罷去役遂已其後三十

年朱衡始循其遺跡濬而成之是年冬總河侍郎潘希曾加築濟沛閘東西兩堤以拒黃河十九年七月河決野雞岡二洪涸督理河漕侍郎王以旂請濬山東諸泉以濟運且築長堤聚水如閘河制遂清舊泉百七十八開新泉三十一以旂復奏四事一請以諸泉分隸守土官兼理其事毋使堙塞一請於境山鎮徐呂二洪之下各建石閘蓄水數尺以行舟旁留月河以洩暴汛築四木閘於武家溝小河口石城匙頭灣而置方船於沙坊等淺以備撈濬一言漕河兩岸有南旺安山馬場昭陽四湖名爲水櫃所以匯諸泉濟漕河也豪強侵占蓄水不多而昭陽一湖淤成高地大非國初設湖初意宜委官清理添置閘壩斗門培築堤岸多開溝渠濬深河底以復四櫃一言黃河南徙舊閘口俱塞惟孫繼一口獨存導河出徐州小浮橋下徐呂二洪此濟運之大者請於孫繼口多開一溝及時疏濬庶二洪得濟帝可其奏而以管泉專責之部曹徐呂二洪者河漕咽喉也自陳瑄鑿石疏渠正統初復濬洪西小河漕運參將湯節又以洪迅敗舟於上流築堰逼水歸月河河南建閘以蓄水勢成化四年管河主簿郭昇

以大石築兩堤錮以鐵錠鑿外洪敗船惡石三百而平築裏洪堤岸又鑿石岸東西四百餘丈十六年增鑿呂梁洪石堤石壩二百餘丈以資牽輓及是建閘行者益便之四十四年七月河大決沛縣漫昭陽湖由沙河至二洪浩渺無際運道淤塞百餘里督理河漕尙書朱衡循覽感應期所鑿新河遺跡請開南陽留城上下總河都御史潘季馴不可衡言是河直秦溝有所東隘伏秋黃水盛昭陽受之不爲壑也乃決計開濬身自督工重懲不用命者給事中鄭欽劾衡故與難成之役虐民倖功朝廷遣官勘新舊河孰利給事中何起鳴勘河還言舊河難復有五而新河之難成者亦有三顧新河多舊堤高阜黃水難侵濬而通之運道必利所謂三難者一以夏村迤北地高恐難接水然地勢高低大約不過二丈一視水平加深何患水淺一以三河口積沙深厚水勢湍急不無阻塞然建壩攔截歲一挑濬之何患沙壅一以馬家橋築堤微山取土不便又恐水口投埽勢必不堅然使委任得人培築高厚無必不可措力之理開新河便下廷臣集議言新河已有次第不可止況百中橋至留城白洋淺出境山疏濬

補築亦不全棄舊河羣議俱合帝意乃決時大雨黃水驟發決馬家橋壞新築東西二堤給事中王元春御史黃襄皆劾衡欺誤起鳴亦變其說會衡奏新舊河百九十四里俱已流通漕船至南陽出口無滯詔留衡與季馴詳議開上源築長堤之便隆慶元年正月衡請罷上源議惟開廣秦溝堅築南長堤五月新河成西去舊河三十里舊河自留城以北經謝溝下沽頭中沽頭金溝四閘過沛縣又經廟道口湖陵城孟陽八里灣穀亭五閘而至南陽閘新河自留城而北經馬家橋西柳莊滿家橋夏鎮楊莊硃梅利建七閘至南陽閘合舊河凡百四十里有奇又引鮎魚諸泉及薛河沙河注其中而設壩於三河之口築馬家橋堤遏黃水入秦溝運道乃大通未幾鮎魚口山水暴決沒漕艘帝從衡請自東邵開支河三道以分洩之又開支河於東邵之上歷東滄橋以達百中橋鑿豸裏溝諸處爲渠使水入赤山湖由之以歸呂孟湖下境山而去衡召入爲工部尙書都御史翁大立代上言漕河資泉水而地形東高西下非湖濬之則涸故漕河以西皆有壑黃流逆奔則以昭陽湖爲散漫之區山水東突則以南陽

湖爲瀦蓄之地宜由回回墓開通以達鴻溝令穀亭湖陵之水皆入昭陽湖卽濬鴻溝廢渠引昭陽湖水沿渠東出留城其湖地退灘者又可得田數千頃大立又言薛河水湍悍今盡注赤山湖入微山湖以達呂孟湖此尙書衡成績也惟呂孟之南爲邵家嶺黃流填淤地形高仰秋水時至翕納者小浸淫平野奪民田之利微山之西爲馬家橋比草創一堤以開運道土未及堅而時爲積水所撼以尋丈之址二流夾攻慮有傾圮宜鑿邵家嶺令水由地浜溝出境山以入漕河則湖地可耕湖堤不潰更於馬家橋建減水閘視旱澇爲啓閉乃通漕長策也並從之三年七月河決沛縣茶城淤塞糧艘二千餘皆阻邳州大立言臣按行徐州循子房山過梁山至境山入地浜溝直趨馬家橋上下八十里閒可別開一河以漕卽所謂沭河也請集廷議上卽命行之未幾黃落漕通前議遂寢時淮水漲溢自清河至淮安城西淤三十餘里決禮信二壩出海寶應湖堤多壞山東諸水從直河出邳州大立以聞其冬自淮安板閘至清河西湖嘴開濬垂成而裏口復塞督漕侍郎趙孔昭言清江一帶黃河五十里宜築堰以

防河溢淮河高良澗一帶七十餘里宜築堰以防淮漲帝令亟濬裏口與大立商築堰事宜并議海口築塞及寶應月河二事四年六月淮河及鴻溝境山疏濬工竣大立方奏聞諸水忽驟溢決仲家淺與黃河合茶城復淤未幾自泰山廟至七里溝淮河淤十餘里其水從朱家溝旁出至清河縣河南鎮以合於黃河大立請開新莊閘以通回船兼濬古睢河洩二洪水且分河自魚溝下草灣保南北運道帝命新任總河都御史潘季馴區畫頃之河大決邳州睢寧運道淤百餘里大立請開洳口蕭縣二河會季馴築塞諸決河水歸正統漕船獲通大立孔昭皆以遲誤漕糧削籍開洳之議不果行五年四月河復決邳州王家口自雙溝而下南北決口十餘損漕船運軍千計沒糧四十萬餘石而匙頭灣以下八十里皆淤於是膠萊海運之議紛起會季馴奏邳河功成帝以漕運遲遣給事中雒遵往勘總漕陳爝及季馴俱罷官六年從雒遵言修築茶城至清河長堤五百五十里三里一鋪鋪十夫設官畫地而守又接築茶城至開封兩岸堤從朱衡言繕豐沛大黃堤衡又言漕河起儀真訖張家灣二千八百餘里

河勢凡四段各不相同清江浦以南臨清以北皆遠隔黃河不煩用力惟茶城至臨清則聞諸泉爲河與黃相近清河至茶城則黃河卽運河也茶城以北當防黃河之決而入茶城以南當防黃河之決而出防黃河卽所以保運河故自茶城至邳遷高築兩堤宿遷至清河盡塞缺口蓋以防黃水之出則正河必淤昨歲徐邳之患是也自茶城秦溝口至豐沛曹單創築增築以接縷水舊堤蓋以防黃水之入則正河必決往年曹沛之患是也二處告竣故河深水東無旁決中潰之虞沛縣之窰子頭至秦溝口應築堤七十里接古北堤徐邳之間堤逼河身宜於新堤外別築遙堤詔如其議以命總河侍郎萬恭萬曆元年恭言祖宗時造淺船近萬非不知滿載省舟之便以聞河流淺故不敢過四百石也其制底平倉淺底平則入水不深倉淺則負載不滿又限淺船用水不得過六拏伸大指與食指相距爲一拏六拏不過三尺許明受水淺也今不務遵行而競雇船搭運雇船有三害搭運有五害皆病河道請悉遵舊制從之恭又請復淮南平水諸閘上言高寶諸湖周遭數百里西受天長七十餘河徒恃百里長

堤若障之使無疏洩是潰堤也以故祖宗之法偏置數十小閘於長堤之間又爲令曰但許深湖不許高堤故設淺船淺夫取湖之淤以厚堤夫閘多則水易落而堤堅濬勤則湖愈深而堤厚意至深遠也比年畏修閘之勞每壞一閘卽堙一閘歲月既久諸閘盡堙而長堤爲死障矣畏濬淺之苦每湖淺一尺則加堤一尺歲月既久湖水捧起而高寶爲孟城矣且湖漕勿堤與無漕同湖堤勿閘與無堤同陳瑄大置減水閘數十湖水溢則瀉以利堤水落則閉以利漕最爲完計積久而減水故迹不可復得湖且沉堤請復建平水閘閘欲密密則水疏無漲瀘患閘欲狹狹則勢緩無齧決虞尙書衡覆奏如其請於是儀真江都高郵寶應山陽設閘二十三濬淺凡五十一處各設撈淺船二淺夫十恭又言清江浦河六十里陳瑄濬至天妃祠東注於黃河運艘出天妃口入黃穿清特半餉耳後黃漲逆注入口浦遂多淤議者不制天妃口而遽塞之令淮水勿與黃值開新河以接淮河曰接清流勿接濁流可不淤也不知黃河非安流之水伏秋盛發則西擁淮流數十里并灌新開河彼天妃口一黃水之淤耳今淮黃

會於新開河口是二淤也防一淤生二淤又生淮黃交會之淺歲役丁夫千百濬治方畢水過復合又使運艘迂八里淺滯而始達於清河孰與出天妃口者之便且利請建天妃閘俾漕船直達清河運盡而黃水盛發則閉閘絕黃水落則啓天妃閘以利商船新河口勿濬可也乃建天妃廟口石閘恭又言由黃河入閘河爲茶城出臨清板閘七百餘里舊有七十二淺自創開新河汶流平行地勢高下不甚相懸七十淺悉爲通渠惟茶黃交會閒運盛之時正值黃河水落之候高下不相接是以有茶城黃家閘之淺連年患之祖宗時嘗建境山閘自新河水平閘沒泥淖且丈餘其閘上距黃家閘二十里下接茶城十里因故基累石爲之可留黃家閘外二十里之上流接茶城內十里之下流且挾二十里水勢衝十里之狹流蔑不勝矣乃復境山舊閘恭建三議尙書衡覆行之爲運道永利而是時茶城歲淤恭方報正河安流回空船速出給事中宋南雍以回空多阻劾恭隱蔽溺職帝切責恭罷去三年二月總河都御史傅希摯請開洳河以避黃險不果行希摯又請濬梁山以下與茶城互用淤舊則通新而挑

舊淤新則通舊而挑新築壩斷流常通其一以備不虞詔從所請工未成而河決崔鎮淮決高家堰高郵湖決清水潭丁志等口淮城幾沒知府邵元哲開菊花潭以洩淮安高寶三城之水東方芻米少通越明年春督漕侍郎張紳以築清水潭堤工鉅不克就欲令糧船暫由圈子田以行巡按御史陳功不可河漕侍郎吳桂芳言高郵湖老堤陳瑄所建後白昂開月河距湖數里中爲土堤東爲石堤首尾建閘名爲康濟河其中堤之西老堤之東民田數萬畝所謂圈子田也河湖相去太遠老堤缺壞不修遂至水入圈子田又成一湖而中堤潰壞東堤獨受數百里湖濤清水潭之決勢所必至宜遵弘治閒王恕之議就老堤爲月河但修東西二堤費省而工易舉帝命如所請行之是年元哲修築淮安長堤又疏鹽城石礮口下流入海五年二月高郵石堤將成桂芳請傍老堤十數丈開挑月河因言白昂康濟月河去老堤太遠人心狃月河之安忘老堤外捍之力年復一年不加省視老中二堤俱壞而東堤不能獨存今河與老堤近則易於管攝御史陳世寶論江北河道請於寶應湖堤補石堤以固其外而於石

堤之東復築一堤以通月河漕舟行其中並議行其冬高郵湖土石二堤新開漕河南北二閘及老堤加石增護堤木城各工竣事桂芳又與元哲增築山陽長堤自板閘至黃浦互七十里閉通濟閘不用而建興文閘且修新莊諸閘築清江浦南堤創板閘漕堤南北與新舊堤接板閘卽故移風閘也堤閘並修淮揚漕道漸固六年總理河漕都御史潘季馴築高家堰及清江浦柳浦灣以東加築禮智二壩修寶應黃浦等八淺提高寶減水閘四又拆新莊閘而改建通濟閘於甘羅城南明初運糧自瓜儀至淮安謂之裏河自五壩轉黃河謂之外河不相通及開清江浦設閘天妃口春夏之交重運畢卽閉以拒黃歲久法弛閘不封而黃水入嘉靖末塞天妃口於浦南三里溝開新河設通濟閘以就淮水已又從萬恭言復天妃閘未幾又從御史劉光國言增築通濟自仲夏至季秋隔日一放回空漕船旣而啓閉不時淤塞日甚開朱家口引清水灌之僅通舟至是改建甘羅城南專向淮水使河不得直射十年督漕尙書凌雲翼以運船由清江浦出口多艱險乃自浦西開永濟河四十五里起城南窰灣歷龍江

閘至楊家澗出武家墩折而東合通濟閘出口更置閘三以備清江浦之險是時漕河就治淮揚免水災者十餘年初黃河之害漕也自金龍口而東則會通以淤迨塞沙灣張秋閘漕以安則徐沛閘數被其害至崔鎮高堰之決黃淮交漲而害漕乃在淮揚閘湖潰則敗漕季馴以高堰障洪澤俾堰東四湖勿受淮侵漕始無敗而河漕諸臣懼湖害日夜常惴惴十三年從總漕都御史李世達議開寶應月河寶應汜光湖諸湖中最湍險者也廣百二十餘里槐角樓當其中形曲如箕瓦店翼其南秤鉤灣翼其北西風鼓浪往往覆舟陳瑄築堤湖東蓄水爲運道上有所受下無所宣遂決爲八淺匯爲六潭與鹽諸場皆沒而淮水又從周家橋漫入溺人民害漕運武宗末年郎中楊最請開月河部覆不從嘉靖中工部郎中陳毓賢戶部員外范韶御史聞人詮運糧千戶李顯皆以爲言議行未果至是工部郎中許應逵建議世達用其言以奏乃決行之濬河千七百餘丈置石閘三減水閘二築堤九千餘丈石堤三之一子堤五千餘丈工成賜名弘濟尋改石閘爲平水閘應逵又築高郵護城堤其後弘濟南北閘夏

秋淮漲吞吐不及舟多覆者神宗季年督漕侍郎陳荐於南北各開月河以殺河怒而溜始平十五年督漕侍郎楊一魁請修高家堰以保上流砌范家口以制旁決疏草灣以殺河勢修禮壩以保新城詔如其議一魁又改建古洪閘先是汶泗之水由茶城會黃河隆慶閒濁流倒灌稽阻運船郎中陳瑛移黃河口於茶城東八里建古洪內華二閘漕河從古洪出口後黃水發淤益甚一魁既改古洪帝又從給事中常居敬言令增築鎮口閘於古洪外距河僅八十丈吐納益易糧運利之工部尙書石星議季馴居敬條上善後事宜請分地責成接築塔山縷堤清江浦草壩創築寶應西堤石砌邵伯湖堤疏濬裏河淤淺當在淮揚興舉察復南旺馬踏蜀山馬場四湖建築坎河滾水壩加建通濟永通二閘察復安山湖地當在山東興舉帝從其議未幾衆工皆成十九年季馴言宿遷以南地形西窪請開縷堤放水沙隨水入地隨沙高庶水患消而費可省又請易高家堰土堤爲石築滿家閘西攔河壩使汶泗盡歸新河設減水閘於李家口以洩沛縣積水從之十月淮湖大漲江都淳家灣石堤邵伯南壩高郵中

堤朱家墩清水潭皆決郎中黃曰謹築塞僅竣而山陽堤亦決二十一年五月恆雨漕河汎溢潰濟寧及淮河諸堤岸總河尙書舒應龍議築堰城壩遏汶水之南開馬踏湖月河口導汶水之北開通濟閘放月河土壩以殺洶湧之勢從其奏數年之閒會通上下無阻而黃淮並漲高堰及高郵堤數決害漕應龍卒罷去建議者紛紛未有所定楊一魁代應龍爲總河尙書力主分黃導淮治逾年工將竣又請決湖水以疏漕渠旨高寶諸湖本沃壤也自淮黃逆壅遂成昏墊今入江入海之路旣濬宜開治涇河子嬰溝分灣河諸閘及瓜儀二閘大放湖水就湖疏渠與高寶月河相接旣避運道風波之險而水涸成田給民耕種漸議起科可充河費命如議行時下流旣疏淮水漸帖而河方決黃壩口督漕都御史褚鈇恐洩太多徐邳淤阻力請塞之一魁持不可濬兩河口至小浮橋故道以通漕然河大勢南徙二洪漕屢涸復大挑黃壩下之李吉口挽黃以濟之非久輒淤一魁入掌部事二十六年劉東星繼之守一魁舊議李吉口淤益高歲冬月卽其地開一小河春夏引水入徐州如是者三年大抵至秋卽淤乃

復開趙家圈以接黃開洳河以濟運趙家圈旋淤洳河未復而東星卒於是鳳陽巡撫都御史李三才建議自鎮口閘至磨兒莊做閘河制三十里一閘凡建六閘於河中節宣汶濟之水聊以通漕漕舟至京不復能如期矣東星在事開邵伯月河長十八里闊十八丈有奇以避湖險又開界首月河長千八百餘丈各建金門石閘二漕舟利焉三十二年總河侍郎李化龍始大開洳河自直河至李家港二百六十餘里盡避黃河之險化龍憂去總河侍郎曹時聘終其事疏敘洳河之功言舒應龍創開韓家莊以洩湖水而路始通劉東星大開良城侯家莊以試行運而路漸廣李化龍上開李家港鑿都水石下開直河口挑田家莊殫力經營行運過半而路始開故臣得接踵告竣因條上善後六事運道由此大通其後每年三月開洳河壩由直河口進九月開召公壩入黃河糧艘及官民船悉以爲準四十四年巡漕御史朱堦請修復泉湖言宋禮築壩戴村奪二汶入海之路灌以成河復導洙泗沂諸水以佐之汶雖率衆流出全力以奉漕然行遠而竭已自難支至南旺又分其四以南迎淮六以北赴衛力分

益薄況此水夏秋則漲冬春而涸無雨卽夏秋亦涸禮逆慮其不可恃乃於沿河昭陽南旺馬踏蜀山安山諸湖設立斗門名曰水櫃漕河水漲則瀦其溢出者於湖水消則決而注之漕積泄有法盜決有罪故旱澇恃以無恐及歲久禁弛湖淺可耕多爲勢豪所占昭陽一湖已作藩田比來山東半年不雨泉欲斷流按圖而索水櫃茫無知者乞敕河臣清核亟築堤壩斗門以廣蓄儲帝從其請方議濬泉湖而河決徐州狼矢溝由蛤鰻諸湖入沭河出直口運船迎溜艱險督漕侍郎陳荐開武河等口洩水平溜後二年決口長淤沙河始復故道總河侍郎王佐加築月壩以障之至泰昌元年冬佐言諸湖水櫃已復安山湖且復五十五里誠可利漕請以水櫃之廢興爲河官殿最從之天啓元年淮黃漲溢決裏河王公祠淮安知府宋統殷山陽知縣練國事力塞之三年秋外河復決數口尋塞是年冬濬永濟新河自凌雲翼開是河未幾而閉總河都御史劉士忠嘗開壩以濟運已復塞而淮安正河三十年未濬故議先挑新河通運船回空乃濬正河自許家閘至惠濟祠長千四百餘丈復建通濟月河小閘運船

皆由正河新河復閉時王家集磨兒莊湍溜日甚漕儲參政朱國威謀改濬一河以爲漕計令同知宋士中自泃口迤東抵宿遷陳溝口復泝駱馬湖上至馬頰河往迴相度乃議開馬家洲且疏馬頰河口淤塞上接泃流下避劉口之險又疏三泃河流沙十三里開滔莊河百餘丈濬深小河二十里開王能莊二十里以通駱馬湖口築塞張家等溝數十道束水歸漕計河五十七里名通濟新河五年四月工成運道從新河無劉口磨兒莊諸險之患明年總河侍郎李從心開陳溝地十里以竟前工崇禎三年淮安蘇家嘴新溝大壩並決沒山鹽高泰民田五年又決建義北壩總河尙書朱光祚濬駱馬湖避河險十三處各順濟河六年良城至徐塘淤爲平陸漕運愆期奪光祚官劉榮嗣繼之八年駱馬湖淤阻榮嗣開河徐宿引注黃水被劾得重罪侍郎周鼎繼之乃專力於泃河濬麥河支河築王母山前後壩勝陽山東堤馬蹄厓十字河攔水壩挑良城閘抵徐塘口六千餘丈九年夏泃河復通由宿遷陳溝口合大河鼎又修高家堰及新溝濊田營堤增築天妃閘石工去南旺湖彭口沙疆濬劉呂莊至黃林莊

百六十里而是時黃淮漲溢日甚倒灌害漕鼎在事五年卒以運阻削職繼之者侍郎張國維甫莅任卽以漕涸被責十四年國維言濟寧運道自棗林閘溯師家莊仲家淺二閘歲患淤淺每引泗河由魯橋入運以濟之伏秋水長足資利涉而挾沙注河水退沙積利害參半旁自白馬河匯鄒縣諸泉與泗合流而出魯橋力弱不能敵泗河身半淤不爲漕用然其上源寬處正與仲家淺閘相對導令由此入運較魯橋高下懸殊且易細流爲洪流又減沙滲之患而濟仲家淺及師莊棗林有三便又言南旺水本地脊惟藉泰安新泰萊蕪寧陽汶上東平平陰肥城八州縣泉源由汶入運故運河得通今東平平陰肥城淤沙中斷請亟濬之復上疏運六策一復安山湖水櫃以濟北閘一改挑滄浪河從萬年倉出口以利四閘一展濬汶河陶河上源以濟邳派一改道沂河出徐塘口以並利邳宿其二卽開三州縣淤沙及改挑白馬湖也皆命酌行國維又濬淮揚漕河三百餘里當是時河臣竭力補苴南河稍寧北河數淺阻而河南守臣壅黃河以灌賊河大決開封下流日淤河事益壞未幾而明亡矣

明史卷八十五

明

史

卷八十五

志

五

中華書局聚

明史卷八十六

志第六十二

總裁官總理事務

經筵講官少保兼太子太保保和殿大學士兼管吏部戶部尙書事加六級張廷玉等奉

敕修

河渠四

運河下

海運

江南運河自杭州北郭務至謝村北爲十二里洋爲塘棲德清之水入之踰北陸橋入崇德界過松老抵高新橋海鹽支河通之繞崇德城南轉東北至小高陽橋東過石門塘折而東爲王灣至阜林水深者及丈過永新入秀水界踰陡門鎮北爲分鄉鋪稍東爲繡塔北由嘉興城西轉而北出杉青三閘至王江涇鎮松江運艘自東來會之北爲平望驛東通鶯脰湖湖州運艘自西出新興橋會之北至松陵驛由吳江至三里橋北有震澤南有黃天蕩水勢澎湃夾浦橋屢建北經蘇州城東鮎魚口水由鬻塘入之北至楓橋由射瀆經澚墅關過白鶴鋪長洲無錫兩邑之界也錫山驛水僅浮瓦礫過黃埠至洛社橋江陰九里

河之水通之西北爲常州漕河舊貫城入東水門由西水門出嘉靖末防倭改從南城壕江陰順塘河水由城東通丁堰沙子湖在其西南宜興鍾溪之水入之又西直瀆水入之又西爲奔牛呂城二閘常鎮界其中皆有月河以佐節宣後並廢其南爲金壇河溧陽高淳之水出焉丹陽南二十里爲陵口北二十五里爲黃泥壩舊皆置閘練湖水高漕河數丈一由三思橋一由仁智橋皆入運北過丹徒鎮有猪婆灘多軟沙丹徒以上運道視江潮爲盈涸過鎮江出京口閘閘外沙堵延袤二十丈可藏舟避風由此浮於江與瓜步對自北郭至京口首尾八百餘里皆平流歷嘉而蘇衆水所聚至常州以西地漸高仰水淺易洩盈涸不恆時濬時壅往往兼取孟瀆德勝兩河東浮大江以達揚泰洪武二十六年嘗命崇山侯李新開溧水胭脂河以通浙漕免丹陽輪輓及大江風濤之險而三吳之粟必由常鎮三十一年濬奔牛呂城二壩河道永樂間修練湖堤卽命通政張璉發民丁十萬濬常州孟瀆河又濬蘭陵溝北至孟瀆河閘六千餘丈南至奔牛鎮千二百餘丈已復濬鎮江京口新港及甘露三港以達於江

漕舟自奔牛溯京口水涸則改從孟瀆右趨瓜洲抵白塔以爲常宣德六年從武進民請疏德勝新河四十里八年工竣漕舟自德勝北入江直泰興之北新河由泰州壩抵揚子灣入漕河視白塔尤便於是漕河及孟瀆德勝三河並通皆可濟運矣正統元年廷臣上言自新港至奔牛漕河百五十里舊有水車捲江潮灌注通舟漑田請支官錢置車詔可然三河之入江口皆自卑而高其水亦更迭盈縮八年武進民請濬德勝及北新河浙江都司蕭華則請濬孟瀆巡撫周忱定議濬兩河而罷北新築壩白塔河之大橋閘以時啓閉而常鎮漕河亦疏濬焉景泰間漕河復淤遂引漕舟盡由孟瀆三年御史練綱言漕舟從夏港及孟瀆出江逆行三百里始達瓜洲德勝直北新而白塔又與孟瀆斜直由此兩岸橫渡甚近宜大疏淤塞帝命尙書石璞措置會有請鑿鎮江七里港引金山上流通丹陽以避孟瀆險者鎮江知府林鶚以爲迂道多石壞民田墓多宜濬京口閘甘露壩道里近功力省乃從鶚議浙江參政胡清又欲去新港奔牛等壩置石閘以蓄泉亦從其請而濬德勝河與鑿港之議俱寢然石閘雖建

蓄水不能多漕舟仍入孟瀆天順元年尙寶少卿凌信言糧艘從鎮江裏河爲便帝以爲然命糧儲河道都御史李秉通七里港口引江水注之且濬奔牛新港之淤巡撫崔恭又請增置五閘至成化四年閘工始成於是漕舟盡由裏河其入二河者回空之艘及他舟而已定制孟瀆河口與瓜儀諸港俱三年一濬孟瀆寬廣不甚淤裏河不久輒涸則又改從孟瀆弘治十七年部臣復陳夏港孟瀆遠浮大江之害請亟濬京口淤而引練湖灌之詔速行正德二年復開白塔河及江口大橋通江二閘十四年從督漕都御史臧鳳言濬常州上下裏河漕舟無阻者五十餘載萬曆元年又漸涸復一濬之歲貢生許汝愚上言國初置四閘曰京口曰丹徒防三江之涸曰呂城曰奔牛防五湖之洩自丹陽至鎮江蓄爲湖者三曰練湖曰焦子曰杜墅歲久居民侵種焦杜二湖俱涸僅存練湖猶有侵者而四閘俱空設矣請濬三湖故址通漕總河傅希摯言練湖已濬而焦子杜墅源少無益其議遂寢未幾練湖復淤淺五年御史郭思極陳世寶先後請復練湖濬孟瀆而給事中湯聘尹則請於京口旁別建一閘引江流內

注潮長則開縮則閉御史尹良任又言孟瀆渡江入黃家港水面雖闊江流甚平由此抵泰興以達灣頭高郵僅二百餘里可免瓜儀不測之患至如京口北渡金山而下中流遇風有漂溺患宜挑甘露港夾岸洲田十餘里以便回泊御史林應訓又言自萬緣橋抵孟瀆兩厓陡峻雨潦易圯且江潮湧沙淤塞難免宜於萬緣橋黃連樹各建閘以資蓄洩又言練湖自西晉陳敏遏馬林溪引長山八十四溪之水以溉雲陽堤名練塘又曰練河凡四十里許環湖立涵洞十三宋紹興時中置橫埂分上下湖立上中下三閘八十四溪之水始經辰溪衝入上湖復由三閘轉入下湖洪武間因運道澀依下湖東堤建三閘借湖水以濟運後乃漸堙今當盡革侵占復濬爲湖上湖四際夾阜下湖東北臨河原埂完固惟應補中間缺口且增築西南與東北相應至三閘惟臨湖上閘如故宜增建中下二閘更設減水閘二座界中下二閘間共革田五千畝有奇塞涖堤私設涵洞止存其舊十三處以宣洩湖水冬春卽閉塞毋得私啓蓋練湖無源惟藉瀦蓄增堤啓閘水常有餘然後可以濟運臣親驗上湖地仰八十四溪之

水所由來懼其易洩下湖地平衍僅高漕河數尺又常懼不盈誠使水裕堤堅則應時注之河有全力矣皆下所司酌議十三年鎮江知府吳撫謙復言練湖中堤宜飭有司春初卽修以防衝決且禁勢豪侵占從之十七年濬武進橫林漕河崇禎元年濬京口漕河五年太常少卿姜志禮建漕河議言神廟初先臣寶著漕河議當事采行不開河而濟運者二十餘年後復佃湖妨運歲累畚鍤故老有言京口閘底與虎邱塔頂平是可知挑河無益蓄湖爲要也今當革佃修閘而高築上下湖圍埂蓄水使深且漕河閘座非僅京口呂城新聞奔牛數處而已陵口尹公橋黃泥壩新豐大犢山節節有閘皆廢去並宜修建而運道支流如武進洞子河連江橋河扁擔河丹陽簡橋河陳家橋河七里橋河丁議河越瀆河滕村溪之大壩頭丹陽甘露港南之小閘口皆應急修整至奔牛呂城之北各設減水閘歲十月實以土商民船盡令盤壩此皆舊章所當率由近有欲開九曲河使運船竟從泡港閘出江直達揚子橋以免瓜洲啓閘稽遲者試而後行可也回空糧艘及官舫宜由江行而於河莊設閘啓閉數役並行漕

事乃大善矣議不果行江漕者湖廣漕舟由漢沔下潯陽江西漕舟出章江鄱陽而會於湖口暨南直隸寧太池安江寧廣德之舟同浮大江入儀真通江閘以溯淮揚入閘河瓜儀之間運道之咽喉也洪武中餉遼卒者從儀真上淮安由鹽城汎海餉梁晉者亦從儀真赴淮安盤壩入淮江口則設壩置閘凡十有三濬揚子橋河至黃泥灣九千餘丈永樂間濬儀真清江壩下水港及夾港河修沿江堤岸洪熙元年濬儀真壩河後定制儀真壩下黃泥灘直河口二港及瓜洲二港常州之孟瀆河皆三年一濬宣德間從侍郎趙新御史陳祚請濬黃泥灘清江閘成化中建閘於儀真通江河港者三江都之留潮通江者二已而通江港塞弘治初復開之既又於總港口建閘蓄水儀真江都二縣間有官塘五區築閘蓄水以溉民田豪民占以爲業真揚之間運道阻梗嘉靖二年御史秦鉞請復五塘從之萬曆五年御史陳世寶言儀真江口去閘太遠請於上下十數丈許增建二閘隨湖啓閉以截出江之船盡令入閘庶免遲滯疏上議行白塔河者在泰州上通邵伯下接大江斜對常州孟瀆河與泰興北新河皆浙

漕間道也自陳瑄始開宣德間從趙新陳祚請命瑄役夫四萬五千餘人濬之
建新開潘家莊大橋江口四閘正統四年水潰閘塞都督武興因閉不用仍自
瓜洲盤壩瓜洲之壩洪武中置凡十五列東西二港間永樂間廢東壩為廠以
貯材木止存西港七壩漕舟失泊屢遭風險英宗初年乃復濬東港既而巡撫
周忱築壩白塔河之大橋閘以時啓閉漕舟稍分行自鎮江裏河開濬漕舟出
甘露新港徑渡瓜洲而白塔北新皆以江路險遠捨而不由矣衛漕者即衛河
源出河南輝縣至臨清與會通河合北達天津自臨清以北皆稱衛河詳具本
志白漕者即通濟河源出塞地經密雲縣霧靈山為潮河川而富河督口河七
渡河桑乾河三里河俱會於此名曰白河南流經通州合通惠及榆渾諸河亦
名潞河三百六十里至直沽會衛河入海賴以通漕楊村以北勢若建瓴底多
淤沙夏秋水漲苦潦冬春水微苦澁衝潰徙改頗與黃河同粟兒渡者在武清
通州間尤其要害處也自永樂至成化初年凡八決輒發民夫築堤而正統元
年之決為害尤甚特敕太監沐敬安遠侯柳溥尚書李友直隨宜區畫發五軍

營卒五萬及民夫一萬築決堤又命武進伯朱冕尙書吳中役五萬人去河西務二十里鑿河一道導白水入其中二工並竣人甚便之賜河名曰通濟封河神曰通濟河神先是永樂二十一年築通州抵直沽河岸有衝決者隨時修築以爲常迨通濟河成決岸修築者亦且數四萬曆三十一年從工部議挑通州至天津白河深四尺五寸所挑沙土卽築堤兩岸著爲令大通河者元郭守敬所鑿由大通橋東下抵通州高麗莊與白河合至直沽會衛河入海長百六十里有奇十里一閘蓄水濟運名曰通惠又以白河榆河渾河合流亦名潞河洪武中漸廢永樂四年八月北京行部言宛昌平西湖景東牛欄莊及青龍華家甕山三閘水衝決岸命發軍民修治明年復言自西湖景東至通流凡七閘河道淤塞自昌平東南白浮村至西湖景東流水河口一百里宜增置十二閘從之未幾閘俱堙不復通舟成化中漕運總兵官楊茂言每歲自張家灣舍舟車轉至都下僱值不貲舊通惠河石閘尙存深二尺許修閘瀦水用小舟剝運便又有議於三里河從張家灣烟墩橋以西疏河泊舟者下廷臣集議遣尙書

楊鼎侍郎喬毅相度上言舊閘二十四座通水行舟但元時水在宮牆外舟得入城內海子灣今水從皇城金水河出故道不可復行且元引白浮泉往西逆流今經山陵恐妨地脈又一畝泉過白羊口山溝兩水衝截難引若城南三里河舊無河源正統間修城壕恐兩多水溢乃穿正陽橋東南窪下地開壕口以洩之始有三里河名自壕口八里始接渾河舊渠兩岸多廬墓水淺河窄又須增引別流相濟如西湖草橋源出玉匠局馬跑等地泉不深遠元人曾用金口水洶湧沒民舍以故隨廢惟玉泉龍泉及月兒柳沙等泉皆出西北循山麓而行可導入西湖請濬西湖之源閉分水清龍閘引諸泉水從高粱河分其半由金水河出餘則從都城外壕流轉會於正陽門東城壕且閉令勿入三里河併流大通橋閘河隨旱澇啓閉則舟獲近倉甚便帝從其議方發軍夫九萬修濬會以災異詔罷諸役所司以漕事大乃命四萬人濬城壕而西山玉泉及抵張家灣河道則以漸及焉越五年乃敕平江伯陳銳副都御史李裕侍郎翁世資王詔督漕卒濬通惠河如鼎毅前議明年六月工成自大通橋至張家灣渾河

口六十餘里濬泉三增閘四漕舟稍通然元時所引昌平東泉俱遏不行獨引一西湖又僅分其半河窄易盈涸不一載澀滯如舊正德二年嘗一濬之且修大通橋至通州閘十有二壩四十有一嘉靖六年御史吳仲言通惠河屢經修復皆爲權勢所撓顧通流等八閘遺跡俱存因而成之爲力甚易歲可省車費貲二十餘萬且歷代漕運皆達京師未有貯國儲於五十里外者帝心以爲然命侍郎王軌何詔及仲偕相度軌等言大通橋地形高白河六丈餘若濬至七丈引白河達京城諸閘可盡罷然未易議也計獨濬治河閘但通流閘在通州舊城中經二水門南浦土橋廣利三閘皆闐闐衢市不便轉輓惟白河濱舊小河廢壩西不一里至堰水小壩宜修築之使通普濟閘可省四閘兩關轉搬力而尙書桂萼言不便請改修三里河帝下其疏於大學士楊一清張璠一清言因舊閘行轉搬法省運軍勞費宜斷行之璠亦言此一勞永逸之計萼所論費廣功難帝乃却萼議明年六月仲報河成因疏五事言大通橋至通州石壩地勢高四丈流沙易淤宜時加濬治管河主事宜專委任毋令兼他務官吏聞夫以

罷運裁減宜復舊額慶豐上聞平津中聞今已不用宜改建通州西水關外剝船造費及遞歲修艚俱宜酌處帝以先朝屢勤行未卽功仲等四閱月工成詔予賞悉從其所請仲又請留督工郎中何棟專理其事爲經久計從之九年擢棟右通政仍管通惠河道是時仲出爲處州知府進所編通惠河志帝命送史館采入會典且頒工部刊行自此漕艘直達京師迄於明末人思仲德建祠通州祀之薊州河者運薊州官軍餉道也明初海運餉薊州天順二年大河衛百戶閔恭言南京並直隸各衛歲用旗軍運糧三萬石至薊州等衛倉越大海七十餘里風濤險惡新開沽河北望薊州正與水套沽河直袤四十餘里而徑且水深其間阻隔者僅四之一若穿渠以運可無海患下總兵都督宋勝巡按御史李敏行視可否勝等言便遂開直沽河闊五丈深丈五尺成化二年一濬二十年再濬并濬鴉鴻橋河道造豐潤縣海運糧儲倉正德十六年運糧指揮王瓚言直沽東北新河轉運薊州河流淺潮至方可行舟邊關每置餉宜濬使深廣從之初新河三歲一濬嘉靖元年易二歲以爲常十七年濬殷留莊大口至

舊倉店百十六里豐潤環香河者濬自成化間運粟十餘萬石以餉薊州東路者也後堙廢餉改薊州給大不便嘉靖四十五年從御史鮑承允請復之且建三閘於北濟張官屯鴉鴻橋以瀦水昌平河運諸陵官軍餉道也起鞏華城外安濟橋抵通州渡口袤百四十五里其中淤淺三十里難行隆慶六年大濬運給長陵等八衛官軍月糧四萬石遂成流通萬曆元年復疏鞏華城外舊河

海運始於元至元中伯顏用朱清張瑄運糧輸京師僅四萬餘石其後日增至三百萬餘石初海道萬三千餘里最險惡既而開生道稍徑直後殷明略又開新道尤便然皆出大洋風利自浙西抵京不過旬日而漂失甚多洪武元年太祖命湯和造海舟餉北征士卒天下既定募水工運萊州洋海倉粟以給永平後遼左及迤北數用兵於是靖海侯吳禎延安侯唐勝宗航海侯張赫舳艫侯朱壽先後轉遼餉以爲常督江浙邊海衛軍大舟百餘艘運糧數十萬賜將校以下綺帛胡椒蘇木錢鈔有差民夫則復其家一年溺死者厚恤三十年以遼東軍餉贏羨第令遼軍屯種其地而罷海運永樂元年平江伯陳瑄督海運糧

四十九萬餘石餉北京遼東二年以海運但抵直沽別用小船轉運至京命於天津置露囤千四百所以廣儲蓄四年定海陸兼運瑄每歲運糧百萬建百萬倉於直沽尹兒灣城天津衛籍兵萬人戍守至是命江南糧一由海運一由淮黃陸運赴衛河入通州以爲常陳瑄上言嘉定瀕海當江流之衝地平衍無大山高嶼海舟停泊或值風濤觸堅膠淺輒敗宜於青浦築土爲山立埃表識使舟人知所避而海險不爲患詔從之十年九月工成方百丈高三十餘丈賜名寶山御製碑文紀之十三年五月復罷海運惟存遮洋一總運遼薊糧正統十三年減登州衛海船百艘爲十八艘以五艘運青萊登布花鈔錠十二萬餘觔歲賞遼軍成化二十三年侍郎邱濬進大學衍義補請尋海運故道與河漕並行大略言海舟一載千石可當河舟三用卒大減河漕視陸運費省什三海運視陸省什七雖有漂溺患然省牽卒之勞駁淺之費挨次之守利害亦相當宜訪素知海道者講求勘視其說未行弘治五年河決金龍口有請復海運者朝議弗是嘉靖二年遮洋總漂糧二萬石溺死官軍五十餘人五年停登州造船

二十年總河王以旂以河道梗澀言海運雖難行然中間平度州東南有南北新河一道元時建閘直達安東南北悉由內洋而行路捷無險所當講求帝以海道迂遠却其議三十八年遼東巡撫侯汝諒言天津入遼之路自海口至右屯河通堡不及二百里其中曹泊店月坨桑姜女墳桃花島皆可灣泊部覆行之四十五年順天巡撫耿隨朝勘海道自永平西下海百四十五里至紀各莊又四百二十六里至天津皆傍岸行舟其間開洋百二十里有建河糧河小沽大沽河可避風初允其議尋以御史劉黷疏沮而罷是年從給事中胡應嘉言革遮洋總隆慶五年徐邳河淤從給事中宋良佐言復設遮洋總存海運遺意山東巡撫梁夢龍極論海運之利言海道南自淮安至膠州北自天津至海倉島人商賈所出入臣遣卒自淮膠各運米至天津無不利者淮安至天津三百里風便兩旬可達舟由近洋島嶼聯絡雖風可依視殷明略故道甚安便五月前風順而柔此時出海可保無虞命量撥近地漕糧十二萬石俾夢龍行之六年王宗沐督漕請行海運詔令運十二萬石自淮入海其道由雲梯關東

北歷鷹游山安東衛石臼所夏河所齊堂島靈山衛古鎮膠州鼇山衛大嵩衛
行村寨皆海面自海洋所歷竹島寧津所靖海衛東北轉成山衛劉公島威海
衛西歷寧海衛皆海面自福山之眾島至登州城北新海口沙門等島西歷桑
島岬岬島自岬岬西歷三山島芙蓉島萊州大洋海倉口自海倉西歷淮河海
口魚兒鋪西北歷侯鎮店唐頭塞自侯鎮西北大清河小清河海口乞溝河入
直沽抵天津衛凡三千三百九十里萬曆元年卽墨福山島壞糧運七艘漂米
數千石溺軍丁十五人給事御史交章論其失罷不復行二十五年倭寇作自
登州運糧給朝鮮軍山東副使于仕廉復言餉遼莫如海運海運莫如登萊蓋
登萊度金州六七百里至旅順口僅五百餘里順風揚帆一二日可至又有沙
門鼉磯皇城等島居其中天設水遞止宿避風惟皇城至旅順二百里差遠得
便風不半日可度也若天津至遼則大洋無泊淮安至膠州雖僅三百里而由
膠至登千里而遙礁礙難行惟登萊濟遼勢便而事易時頗以其議爲然而未
行也四十六年山東巡撫李長庚奏行海運特設戶部侍郎一人督之事具長

庚傳崇禎十二年崇明人沈廷揚爲內閣中書復陳海運之便且輯海運書五卷進呈命造海舟試之廷揚乘二舟載米數百石十三年六月朔由淮安出海望日抵天津守風者五日行僅一旬帝大喜加廷揚戶部郎中命往登州與巡撫徐人龍計度山東副總兵黃允恩亦上海運九議帝卽令督海運先是寧遠軍餉率用天津船赴登州候東南風轉粟至天津又候西南風轉至寧遠廷揚自登州直輸寧遠省費多尋命赴淮安經理海運爲督漕侍郎朱大典所沮乃命易駐登州領寧遠餉務十六年加光祿少卿福王時命廷揚以海舟防江尋命兼理糧務南都旣失廷揚崎嶇唐魯二王間以死當嘉靖中廷臣紛紛議復海運漕運總兵官萬表言在昔海運歲溺不止十萬載米之舟駕船之卒統卒之官皆所不免今人策海運輒主邱濬之論非達於事者也

明史卷八十六

明

史

卷八十六

志

九

中華書局聚